

為奴紂又囚之

周厲王卽位三十年好利近榮夷公大夫芮良夫諫

厲王不聽卒以榮公為卿士用事王行暴虐侈傲國

人謗王召公諫曰

召康公之後穆公虎為王卿士

民不堪命矣王怒

得衛巫

衛國之巫也

使監謗者以告則殺之其謗鮮矣諸

侯不朝三十四年王益嚴國人莫敢言道路以目

以目

相視而已

厲王喜告召公曰吾能弭謗矣乃不敢言召公

又諫之王不聽於是國人莫敢出言

漢文帝時袁盎為中郎將亦以數直諫不得久居中

調為隴西都尉

調選也

景帝即位以太子太傅石奮為九卿迫近憚之以其敬恭履度故徙奮為諸侯相

武帝時汲黯為中大夫以數切諫不得久留內選為

東海太守召為主爵都尉亦以數直諫不得久居位

狄山為博士匈奴求和親群臣議前於帝前山日和

親便帝問其便山曰兵凶器未易數動言難可高帝

欲伐匈奴太困平城乃遂結和親孝惠高后時天下

安樂及文帝欲事匈奴北邊蕭然苦兵蕭然猶騷然

孝景時吳楚七國反景帝往來東宮間謂詒謀於天

下寒心數月懼於兵吳楚已破竟景帝不言兵訖景

征伐之事身更不講天下富實今自陛下興兵擊匈奴中國已

空虛邊大困貧繇是觀之不如和親帝問湯湯張湯

曰愚儒無知狄山曰臣固愚忠若御史大夫湯乃詐

忠湯之治淮南江都以深文痛詆諸侯別疏骨肉使

藩臣不自安臣固知湯之詐忠於是帝作色曰吾使

生居一郡能無使虜入盜乎博士之官故山曰不能

曰居一縣曰不能復曰居一鄣間鄣音之向切謂塞

為城因置吏士而山自度辯窮且下吏度計也見詰

為鄣蔽以折寇也曰能乃遣山乘鄣乘登也登至月餘匈奴斬山

頭而去是後群臣震讟

成帝時朱雲上書求見公卿在前時丞相故安昌侯張禹以帝師位特進甚尊重雲曰臣願賜尚方斬馬劍斷佞臣一人以厲其餘帝問誰也對曰安昌侯張禹帝大怒曰小臣居下訕上廷辱師傅罪死不赦御史將雲下雲攀殿檻折後帝意亦解

劉輔以美才擢爲諫議大夫成帝欲立趙婕妤爲皇后輔上書曰陛下乃觸情縱欲以卑賤之女母天下乎里語曰腐木不可以爲柱卑人不可以爲主臣辱諫諍之官不敢不盡死書奏帝使侍御史收縛輔繫掖庭秘獄後減死罪一等論鬼薪

哀帝寵董賢爲大司馬賢年二十二帝置酒與賢父親屬宴飲帝飲醉從容視賢而笑曰吾欲法堯禪舜何如侍中王闔在坐進諫曰昔周成戲以桐葉封弟叔虞於晉周公入曰天子無戲言耳今天下乃高帝之天下非陛下之天下也陛下以藩王入奉嗣孝成皇帝後當承宗廟傳子孫於無窮豈得以戲言將高祖社稷輸人邪帝默然不悅終以失旨貶爲郎署後漢光武建武中內外群官多帝自選舉加以法理嚴察職事過苦尚書近臣至乃捶撲率曳於前群臣莫敢正言尚書令申屠剛每輒極諫又數言皇太子

宜時就東宮簡任賢保以成其德帝並不納剛以數切諫失旨數年出爲平陰令

和帝時侍郎光祿大夫李法上疏以爲朝政苛碎違永平建初故事宦官權重椒房寵盛又譏史官記事不實後世有識尋功計德必不明信坐失旨下有司免爲庶人

安帝時蘇章爲議郎數陳得失其言甚直出爲武原令

成初世爲尚書郎安帝時掌侍樊豐與帝乳母王聖共譖皇太子廢爲濟陰王初世連上書訟之又言樊

豐王聖誣罔之狀帝既不從而豐等陷以重罪下獄當死有詔免官歸本郡

順帝時宋登爲侍中數上封事抑退權臣繇是出爲潁川太守

桓帝時白馬令李雲上疏言孔子曰帝者諦也今小人譖進財貨公行是帝欲不諦乎帝怒送黃門北寺獄弘農五官掾杜衆傷雲以忠諫獲罪上書願與雲同日死帝愈怒遂并下廷尉大鴻臚陳蕃上疏救雲曰李雲所言雖不識禁忌干上逆旨其意歸於忠國而已昔高祖忍周昌不諱之諫成帝赦朱雲腰領之

誅今日殺雲臣恐剖心之譏復議於世矣故敢觸龍
鱗冒昧以請太嘗楊秉維陽市長沐茂郎中上官資
並上疏請雲帝恚甚有司奏以爲大不敬詔切責蕃
秉免歸田里茂資貶秩二等時帝在濯龍池管霸奏
雲等事霸跪言曰李雲野澤愚儒杜衆郡中小吏出
於狂慙不足加罪帝謂霸曰帝欲不諱是何等語而
嘗侍欲原之邪顧使小黃門可其奏雲衆皆死獄中
靈帝時樂巴爲議郎時大將軍竇武太傅陳蕃被誅
巴以其黨復譴爲永昌太守以功自效辭病不行上
書極諫理陳竇之寃帝怒下詔切責收付廷尉巴自

殺

張鈞時爲郎中以中嘗侍張讓所在貪殘爲人蠹害
乃上書曰宜斬十嘗侍縣頭南郊可不須師旅而大
寇自消天子以鈞章示讓等皆免冠徒跣頓首乞自
致維陽詔獄並出家財以助軍費有詔皆冠履視事
如故帝怒鈞曰此真狂子也十嘗侍固當有一人善
者不鈞復重上猶如前章輒寢不報詔使廷尉侍御
史考爲張角道者御史承讓等阿旨遂誣奏鈞學黃
巾道收掠死獄中而讓等實多與張角交通

魏文帝黃初元年十二月長水校尉戴陵諫不宜數

行戈獵帝大怒陵滅死罪一等

鮑勛爲宮正時文帝欲征吳群臣大議勛面諫以爲不可帝益忿之左遷勛爲治書執法

蘇則爲侍中文帝時人多饑困而軍數出又兼治宮室則數面諫繇此帝頗不悅其後出爲河東相

晉武帝時詔齊王攸將之國祭酒曹志建議以爲不當遣帝覽議大怒曰曹志尚不明吾心况四海乎以議者不指答所問橫造異論策免太宰鄭默於是有司奏收志等結罪詔惟免志官以公還第其餘皆付

廷尉

何雄爲河南尹齊王攸將歸藩雄諫曰陛下子弟雖多然有名望者少齊王臥在京邑所益實深不可不思帝不納雄固諫忤旨起而徑出遂以憤卒

元帝爲晉王時奉朝請周嵩上疏曰臣聞取天下者寧以無事及其有事不足以取天下故古之王者必應天順時義全而後取讓成而後得是以享世長久重光萬載也今議者以殿下化流江漢澤被六州功濟蒼生欲推崇尊號臣謂今梓宮未反舊京未清義夫泣血士女震動宜深明周公之道先雪社稷大耻盡忠言嘉謀之助以時濟弘仁之功崇謙謙之美推

後已之誠然後揖讓以謝天下誰敢不應誰敢不德
繇是忤旨出爲新安太守

後周宣帝爲太子時武帝顧命曰內史王誼社稷臣
宜處以機密不須遠任也及卽位憚誼剛正出爲襄
州總管

劉行本掌朝下大夫宣帝嗣位多失德行本切諫忤
旨出爲河內太守

隋高祖初卽位虞慶則勸高祖盡滅宇文氏高穎楊
愬亦依違從之唯內史令李德林固爭不可高祖作
色怒曰君讀書人不足平章此事於是遂盡誅之自

是品位不加出於高虞之下唯依班例授上儀同進
爵爲子

煬帝時盜賊不止天下大亂納言蘇威每諷諫帝彌
不平後復問伐遼東事威對願赦群盜遣討高麗帝
益怒之

梁毗爲刑部尚書并攝御史大夫事奏劾宇文述私
役部兵煬帝議免述罪毗固諍因忤旨遂令張衡代
爲大夫毗憂憤數月而卒

蕭瑀爲內史侍郎時煬帝至鴈門爲突厥所圍瑀進
計其圍乃解其後帝又將伐遼東謂群臣曰突厥狂

恃勢何能爲以其少時未散瑀遂相恐動情不可恕
因出之爲河池郡守卽日遣之

張虔威爲謁者大夫時煬帝數巡幸百姓疲弊虔威
因上封事以諫帝不悅自此見疎

許善心爲給事郎大業七年從至涿郡帝方自御戎
以東討善心上封事忤旨免官

唐德宗貞元中袁高爲給事中以切直忤旨時宰相
齊映連請以高爲左丞御史大夫皆不行

姜公輔爲諫議大夫同中書門下平章事從德宗幸
山南車駕至城固縣唐安公主薨公主帝之長女昭

德皇后所生性聰敏仁孝上所鍾愛初詔尚韋宥未
克禮會而遇播遷及薨帝悲悼尤甚詔所司厚其葬

禮公輔諫曰非久克復京城公主必須歸葬今於行
路且宜儉薄以濟軍士帝怒謂翰林學士陸贄曰唐

安天亡不欲於此爲塋壙且令造一磚塔安置功費
甚微不合閹宰相論列公輔忽進表章都無道理但

欲指朕過失擬自取名朕比拔擢爲腹心乃負朕如
此贄對曰公輔官是諫議職居宰衡獻替固其職分

本立輔臣置之左右朝夕納誨意在防微而弼之乃
其所也陛下以造塔役費微小非宰相所論之事但

問理之是非豈論事之大小若造塔爲是役雖大而作之何傷若造塔爲非費雖小而言者何罪帝又曰卿未會朕意以公輔才行共宰相都不相當在奉天時已欲罷免後因公輔辭退朕以面許尋屬懷光背叛遂且因循容至山南公輔知朕必擬改官所以固論造塔賣直取名據此用心豈是良善朕所惆悵者只緣如此贊雖再三救護帝怒不已乃罷爲左庶子蕭復爲相扈駕奉天請別對奏云陛下臨御之初聖德光被自用楊炎盧杞秉政損黷皇猷以致今日今雖危悉願陛下深革睿思微臣敢當此任若令臣依阿偷免臣不敢曠職盧杞奏對於帝前阿諛順旨復正色曰盧杞之詞不正德宗愕然退謂左右曰蕭復頗輕朕遂令往江南宣撫後遂罷之

憲宗元和中王承宗叛詔以吐突承璀爲招討使右補闕孟簡拜疏論之坐忤旨出爲寧州刺史錢徽爲翰林學士淮蔡未平徽以連年征伐不息與蕭俛俱有密迭上疏請罷兵因忤帝旨除右庶子罷內職

裴鄰元和末爲起居舍人時有術士柳泌鍊藥帝惑之鄰上疏請令術士先嘗其藥以是忤旨貶江陵縣

令

文宗太和六年百姓上官興殺人危死諫議大夫史館修撰王彥威累上疏以激切忤旨又咨於執政辭許氣盛除河南少尹

疑忌

自古駕御豪傑彈壓區宇必推已以及物執中以作孚坦蕩為懷從容肆體堯舜禹湯率繇是矣暨周成惑群叔之說姬旦有東山之遷鴟鴞之詩義形懲刺厥後勲高佐命威足震主爵祿不足以充其賞禮法不足以扼其勢優崇斯至猜惡彌甚比諸芒刺視如

土芥加以讒構相攻誣讖符合久操兵柄頗得士心或車服僭差交結靡間或以勞自負不慎厥終故雖漢高之豁達光武之寬容去就之間猶不免乎嫌忌矣矧乃天資峻刻舊惡是念欲加之罪其無辭乎書曰任賢勿貳又曰任賢繇已蓋聖哲之明訓也

漢高祖征陳豨還相國蕭何為民請曰長安地陘上林中多空棄地願令民得入田母收棄為禽獸食稗也言恣人田之不取其粟稅也帝大怒曰相國多受

賈人財物為請吾苑乃下何廷尉械繫之數日王衛

尉侍

百官公卿表衛尉王氏無名字史失之也侍謂侍天子也

前問曰相國胡大

罪陛下繫之暴也

前問謂進而請也胡何也

帝曰吾聞李斯相秦

皇帝有善歸王有惡自予今相國多受賈豎金為請

吾死以自媚於民

媚愛也求愛於民

故繫治之王衛尉曰夫

職事苟有便於民而請之真宰相事者陛下奈何乃

疑相國受賈民錢乎且陛下距楚數歲陳豨黥布反

時陛下自將往當是時相國守關中關中搖足則關

西非陛下有也相國不以此時為利乃利賈人之金

乎且秦以不聞其過亡天下夫李斯之分過又何足

法哉陛下何疑宰相之淺也帝不懌

懌怵也感衛尉之言故慙悔而

不悅是日使使持節赦出何

景帝時周亞夫為丞相帝居禁中召亞夫賜食獨置

大箴

箴大箴音側吏反

無切肉又不置箸亞夫心不平顧謂

尚席取箸

尚席主席者也

帝視而笑曰此不足君所乎

帝言賜君

食而不設箸此繇我意於君有不足乎

亞夫免冠謝帝帝曰起亞夫因

趨出帝目送之曰此鞅鞅非少主臣也竟下獄死

武帝時鄭當時字莊以任俠自喜聲聞梁楚間及為

大司農帝使視決河自請治行五日

治行謂莊嚴

帝曰吾

聞鄭莊行千里不齎糧治行者何也

義縱為右內史武帝幸鼎湖病久已而卒起幸其泉

已病愈也言帝久病既愈忽然即幸其泉

道不治帝怒曰縱以我為不行

此道乎啣之至冬楊可方受告緡縱以爲此亂民部
吏捕其爲可使者天子聞使杜式治以爲廢格沮事
武帝使楊可王告緡沒入其財物縱捕爲可棄縱而
使者此爲廢格詔書沮已成之事也沮壞也
宣帝初卽位謁見高廟大將軍霍光從驂乘帝內殿
憚之若有芒刺在背後車騎將軍張安世代光驂乘
天子從容肆體甚安迺及光身死而宗族竟誅故
俗傳之曰威震王者不畜霍氏之禍萌於驂乘

後漢光武時馮勤爲郎中給事尚書司徒侯霸薦前
梁令閭楊楊素有譏議帝嘗嫌之旣見霸奏疑其有
姦大怒賜霸璽書曰崇山幽都何可偶黃鉞一下無
處所欲以身試法邪將殺身以成仁邪使勤奉策至
司徒府勤還陳霸本意申釋事理帝意稍解

魏太祖初爲董卓所辟太祖變易姓名聞行東歸過
故人成臯呂伯奢伯奢出行五子俱在備賓主禮聞
其食器聲以爲圖已遂夜殺之旣而悽愴曰寧我負
人無人負我遂行

周不疑幼有異才聰明敏達太祖初欲以女妻之不
疑不敢當帝愛子倉舒夙有才智謂可與不疑爲信
及倉舒卒帝心忌不疑欲除之文帝諫以爲不可帝
曰此人非汝所能駕御也乃遣刺客殺之帝持法峻

刻諸將有計畫勝出已者隨以法誅之及故人舊怨亦皆無餘其所刑殺輒對之垂泣嗟痛之然終無所活初袁忠爲沛相嘗欲以法治帝後亦殺之

楊脩字德祖好學有俊才爲丞相主簿嘗出行籌太祖有問外事乃逆爲答記勅守舍兒若有令出依次通之旣而果然如是者三操怪其速使廉之知狀於此忌脩且以袁紹之甥慮爲後患遂因事殺之

文帝時臧霸爲鎮東將軍都督青州諸軍事初霸遣別軍在雒會太祖歿霸所部及青州兵以爲天下將亂皆鳴鼓擅去帝卽位以曹休都督青州霸謂休曰國家未肯聽霸爾若假霸步騎萬人必能橫行江表

休言之於帝帝疑霸軍前擅去今意壯乃爾遂東還因霸來朝而奪其兵

晉宣帝以玄石圖有牛繼馬後深忌牛氏遂爲二棹共一口以貯酒焉帝先飲佳者而以毒酒鳩其將牛金

景帝夏侯后母曹氏魏德陽鄉主后雅有識度魏明帝世宣帝居上將之重諸子並有雄才大畧后知帝非魏之純臣而后魏氏之甥帝深忌之遂以鳩終夏侯玄爲景帝所執衛將軍司馬文王流涕請之帝

曰卿忘會趙司空葬乎先是司空趙儼薨大將軍兄弟會葬賓客以百數玄時後至衆賓咸越席而迎繇是惡之

文帝有密疏未之屏也如廁侍中鄭小同詣之還謂之曰卿見吾疏乎對曰否帝猶疑而鳩之卒

王儀高亮雅直爲文帝司馬東閣之役帝問於衆曰近日之事誰任其咎儀對曰責在元帥帝怒曰司馬欲委罪於孤邪遂引出斬之

武帝太始初石苞督揚州時諸葛誕初破滅苞便錄撫淮南士馬強盛邊境多務苞旣勤庶事又以威惠

服物淮北監軍王琛輕苞素又聞童謠曰宮中大馬幾作驢大石壓之不得舒因是密表苞與吳人交通先時望氣者云東南有大兵起及琛表至帝甚疑之會荊州刺史胡烈表吳人欲大出爲寇苞亦聞吳師將入乃築壘遏水自固帝聞之謂羊祐曰吳人每來嘗東西相應無緣偏爾豈石苞果有不順乎祐深明之而帝猶疑焉會苞子喬爲尚書郎帝召之經日不至帝謂爲叛欲討苞而隱其事遂下詔以苞不料賊勢築壘遏水勞擾百姓策免其官遣太尉義陽王望率大軍徵之以備非嘗又勅鎮東將軍琅邪王仲自

下邳會壽春苞用掾孫鑠計放兵步出任都亭待罪
帝聞之意解及苞詣闕以公還第

明帝時羊鑑爲少府及王敦反帝以鑑敦舅又素相
親黨微被嫌責

孝武帝時謝安爲太傅安女壻王國寶專利無簡行
安惡其爲人每抑制之及帝末年嗜酒好肉而會稽
王道子昏瞶尤甚惟狎昵諂邪於是國寶讒諛之計
稍行於主相之間而好利儉詖之徒以安功名盛極
而構會之嫌隙遂成帝嘗召桓伊飲譙安侍坐帝命
伊吹笛伊神色無迁卽吹爲一弄乃放笛云臣於箏
分乃不及笛然自足以韻合歌管請以箏歌并請一
吹笛人帝善其調達乃勅御妓奏笛伊又云御府人
於臣必自不合臣有一奴善相便串帝彌賞其放率
乃許詔之奴旣吹笛伊便撫箏而歌怨詩曰爲君旣
不易爲臣良獨難忠信不可顯乃有見疑患周且使
文武金滕功不刊推心輔王政二叔反流言聲節
慨俯仰可觀安泣下沾襟乃越席而就之埒其鬚曰
使君於此不凡帝甚有愧色

後魏道武時鄧淵爲尚書吏部郎謹於朝事未嘗作
旨其從父弟暉爲尚書郎兇俠好奇與定陵侯和跋

厚善跋有罪誅其子弟奔長安或告暉將送出之暉
是道武疑淵知情遂賜淵死既而恨之時人咸愍惜
焉

庾岳道武時爲司空天賜四年詔賜岳舍地於南宮
岳將家僮治之侯官告岳衣服鮮麗行止風采擬於
人君道武時既不豫多所嫌惡遂誅之時人咸冤惜
焉

賀狄干世爲將初道武普封功臣狄干雖爲姚興所
留遙賜狄干爵襄武侯加秦兵將軍及狄干至道武
見其言語衣服有類羗俗以爲業慕而習之故忿焉
既而殺之弟歸亦剛直方雅與狄干俱死

後周武帝忌齊王憲意欲除之謂小冢宰宇文孝伯
曰公能爲朕圖齊王當以其官位相授孝伯叩頭曰
奉先帝遺詔不許濫誅骨肉齊王陛下叔父戚近功
高社稷重臣棟梁所寄陛下若妄加刑戮微臣又願
肯曲從則臣爲不忠之臣陛下爲不孝之子也帝不
懌因漸疎之乃與于智王端鄭譚等密圖其事後令
智告憲謀逆遣孝伯召憲入遂誅之

隋高祖禪位後封宇文忻爲杞國公帝嘗欲令忻率
兵擊突厥高穎言於帝曰忻有異志不可委以大兵

乃止忻既佐命功臣類經將領有威名於當世帝疑是微忌焉以遣去官

楊素爲尚書左僕射貴寵日隆朝臣莫不畏附唯兵部尚書柳述以帝婿之重數於帝前面折素大理卿梁毘抗表言素作威作福高祖漸疎忌之後因出勅曰僕射國家之宰輔不可躬親細務但三日一度向省評論大事外示優崇實奪之權也終仁壽之末不復通判省事帝天性沉猜素無學術好爲小數不達大體故忠臣義士莫得盡心竭辭其草創元勳及有功諸將誅夷罪退罕有存者

王雄爲右衛大將軍參預朝政貴寵冠絕一時與高穎虞慶則蘇威稱爲四貴帝惡其得衆陰忌之不欲其典兵焉乃册爲司空亦外示優崇實奪其權也雄無職務乃閉門不通賓客

薛道衡爲內史侍郎上儀同三司仁壽中楊素專掌朝政道衡與素善高祖不欲道衡久知機密因命簡較司徒總管道衡久蒙驅策一旦違離不勝悲戀言之哽噎帝愴然改容曰爾光陰晚暮侍奉誠勞朕欲令爾將攝兼撫萌俗今爾之去朕如斷一臂於是賚物三百段九環金帶并時服一襲馬十疋慰勉遣之

後爲濟州刺史上表求致仕煬帝謂內史侍郎虞基曰道衡將至當以秘書監待之道衡旣至上高祖文皇帝頌帝覽之不悅顧謂蘇威曰道衡致美先朝此魚藻之義也於是拜司隸大夫將置之罪道衡不悟司隸刺史房彥謙素相善知必及禍勸之杜絕賓客卑辭下氣而道衡不能用會議新令久不能決道衡謂朝士曰向者使高穎不死令決當久行有人奏之帝怒曰汝憶高穎耶付執法者勸之道衡自以非大過促憲司早斷暨於奏日冀帝赦之勅家人具饌以備賓客來候者及奏帝令自盡道衡殊不意未能引決憲司重奏繼而殺之妻子徙日東時年七十天下冤之

煬帝卽位初楊素爲僕射素雖有建立之策及平楊諒之功然特爲帝所猜忌外示殊禮內情甚薄太史言隋分野有大喪因改封於楚與隋同分欲以厭當之素寢疾之日帝每令名醫診候賜以上藥然密問醫人嘗恐不死

竇杭爲幽州總管時漢王諒之作亂也煬帝將發幽州兵以討之時帝恐杭有貳心問可任者於楊素時李子雄爲江州刺史坐事免素進子雄受大將軍

元善爲國子祭酒以高頴有宰相之具嘗言於帝帝初然之及頴得罪帝以善之言爲頴游說深責望之善憂懼先患消渴於是疾動而卒

蕭琮梁蕭啓之後雖復羈旅見豪貴無所降下嘗與賀若弼深相友善弼旣被誅復有童謠言其復起煬帝繇是忌之遂徙其家未幾而卒

宇文弼爲禮部尚書以才能著稱煬帝頗忌之時帝漸好聲色尤勤遠畧弼謂高頴曰昔周天元好聲色而國亡以今方之不亦過乎又言長城之役幸非急務有人奏之竟坐誅死天下寃之

李敏娶周樂平公主女宇文氏爲光祿大夫大業十年煬帝復征遼東遣敏於黎陽督運時或言敏一名洪兒帝疑洪字當讖嘗面告之與其引決敏繇是大懼數與李渾及渾兄子善衡等屏人私語宇文述知而奏之竟與渾同誅年三十九其妻宇文氏後數月亦賜鳩而終

庾質爲太史令煬帝性多忌尅齊王暕亦被猜嫌質子儉時爲齊王屬帝謂質曰汝不能一心事我乃使兒事齊王何向背如此邪質曰臣事陛下子事齊王實是一心不敢有二帝怒不解繇是出爲合水令

元弘嗣爲金紫光祿大夫大業中煬帝復征遼東會
奴賊寇隴右詔弘嗣擊之及楊玄感作亂逼東都弘
嗣屯兵安定或告之謀應玄感者代王遣執之送行
在所以無反行當釋帝疑不解除名徙日南道死
楊注大業中爲銀青光祿大夫及楊玄感反河南贊
持裴弘策出師禦之戰不利弘策出還遇注而屏人
交語旣而留守樊子蓋斬弘策以狀奏注帝疑之出
爲梁郡通守

樊子蓋大業十一年從駕汾陽宮至于鴈門車駕爲
突厥所圍欲潰而出子蓋諫曰萬乘主豈宜輕脫望
躬親出慰撫厚爲勲格人心自奮不足爲憂帝從之
其後援兵稍至虜乃引去納言蘇威追論勲格大重
宜在斟酌子蓋執奏不宜失信帝曰公欲收物情邪
子蓋默然不敢對

魚俱羅爲碣石道將軍征高麗還江南劉元進作亂
詔俱羅將兵向會稽諸郡逐捕之于時百姓思亂從
盜如市俱羅擊賊帥來燮管崇等無不捷然賊勢浸
盛散而復聚俱羅度賊非歲月可平諸子並在京畿
又見天下漸亂終恐道路隔絕於時東都饑饉穀食
踊貴俱羅遣家僕將船米至東都糶之益市財貨潛

迎諸子朝廷微知之恐其有異志發使察驗使者至前後察問不得其罪帝復令大理司直梁敬真就鑾將詣東都俱羅相表異人目有重瞳陰爲帝之所忌敬真希旨奏俱羅師徒敗衄於是斬於東都市家口籍沒

唐太宗貞觀中李君羨爲左驍衛大將軍武昌郡公貞觀中有謠言當有女主王天下太宗惡之後當宴三品已上遣作酒令仍各稱其小名君羨自稱小名五娘子太宗愕然因大笑曰何物女子如此勇猛其後竟以事誅之至天授中則天復其官爵

魏徵爲特進知門下省事嘗密薦中書侍郎杜正倫及吏部尚書侯君集有宰相之材徵卒後正倫以罪黜君集犯逆伏誅太宗始疑徵阿黨徵又自錄前後諫諍言詞徃復以示史官起居郎褚遂良太宗知之愈不悅先許以衡山公主降其長子叔玉於是手詔停婚顧其家漸衰矣

德宗時嚴震爲山南西道節度使帝忽遽行幸梁州山南地素貧福又遭連山賊剽劫之後雖云十五州之地其寔未敵江南三數縣戶口震悉心供應人既不擾事亦不闕然累奏百姓困竭須使支持帝以爲

結恩於百姓也

嚴懷志以涇原裨將隨渾瑊會吐蕃背盟懷志等陷沒居吐蕃中十餘年逃入以西諸國爲所掠賣又脫走經十餘國至天竺占波國泛海而歸貞元十四年始至温州徵詣京師德宗以懷志處蕃久不欲令出外囚之伏內順宗卽位始釋之初懷志之陷父母俱存及歸父母皆歿妻嫁佗人

呂溫者以小吏事崔漢衡貞元初吐蕃背盟漢衡爲吐蕃所虜將殺之溫趨往以背受亦吐蕃義之繇是與漢衡俱免及漢衡歸獨留蕃中吐蕃尚浮屠法溫因求爲僧久之乃得歸亦以習吐蕃事囚焉順宗卽位釋之與嚴懷志俱授中郎將

憲宗元和十二年淮西平十三年襄陽節度使李愬奏請判官大將已下官凡一百五十員帝不悅謂裴度曰李愬誠有奇功然奏請過多使李晟渾瑊之勲業又何如哉遂留中不下

後唐莊宗在鄴時明宗爲相州刺史天祐十三年滄州小較毛璋以城歸欵莊宗命明宗率師至滄州慰撫軍民明宗旣至毛璋開門迎謁遣璋入覲軍城又安時書吏誤爲申狀云某已至滄州禮上畢莊宗覽

狀大怒曰諱諱明宗各反邪時末帝掌莊宗親軍在帳下

顧謂末帝曰爾父固予所悉此蓋王建立安重誨戲

予斬二僕之首而還末帝惶恐既而明宗旋師行臺

斬其書吏謝之乃移安國軍節度使李存審鎮滄州

承制授明宗安國軍節度邢維磁等州觀察處置等

使

安金全為朔州刺史事莊宗為騎將莊宗神勇冠世

而性忌不欲臣下勝已故金全與王建及位不踰刺

史移稱疾以避禍

愍帝庶順元年正月以內皇城使安重益為陳州刺

史去冬秦王之釁重益將騎追王至府廨出之伏下

害之至是帝心惡之不欲在左右仍令典方州

三月遣供奉官王廷悅劉贊各以玉帶金錯刀賜

州張延朗與元張虔劉竺帥各進潞王書疑其兩

故有是賜

無斷

傳曰惡惡而不能去善善而不能用此優游不斷之

謂也自漢而下居民上者或失於剛克之訓存夫

容之道淑慝斯混失於洞分幾微有初闡於先見不

能斥去邪說割絕私愛念宗社之大計思邦國之

圖而乃牽於文義制於近習惑於衆多之說迫於
倖之勢以至猶豫靡決禍釁旋構噬臍無及發矢莫
進蓋夫當斷不斷其為害大矣誠方策之深戒焉

漢元帝時蕭望之死擢周堪為光祿勳堪弟子張猛
為光祿大夫給事中大見信任弘恭石顯憚之堪性
公方自見孤立遂直道而不曲是歲夏寒日清無光
恭顯及許史皆言堪猛用事之咎帝內重堪又患衆
口之浸潤無所取信時長安令楊興以材能幸嘗稱
譽堪帝欲以為助乃見問興朝臣斷斷不可光祿勳

何邪 斷斷忿嫉之意 興者傾巧士謂帝疑堪因順指

曰堪非獨不可於朝廷自州里亦不可也臣見衆人
聞堪前與劉更生等謀毀骨肉以為當誅故臣前言
堪不可誅傷為國養恩也帝曰然此何罪而當誅今
宜奈何興曰愚以為可賜爵關內侯食邑三百戶勿
令典事明主不失師傅之恩此最策之得者也帝於
是疑會城門較尉諸葛豐亦言堪猛短帝因發怒免
豐帝又曰豐言堪猛貞信不立朕閔而不治又惜其
材能未有所效其左遷堪為河東太守猛槐里令頗
等專權日甚帝牽制文義優游不斷為文義所牽 制故不斷
宣之業衰焉

成帝時太將軍王鳳用事會日蝕京兆尹王章素剛直敢言乃奏封事請退鳳章每召諫帝輒辟左右言

日時太后從弟長樂衛尉弘子侍中音弘者太后之叔父也音則

從父獨側聽具知章言以語鳳鳳聞之稱病出就第

上疏乞骸骨謝帝曰臣材駑愚戇得以外屬兄弟七

人封為列侯宗族蒙恩賞賜無量輔政出入七年

家委任臣鳳所言輒聽薦士嘗用無一功善陰陽不

調災異數見咎在臣鳳奉職無狀此臣一當退也五

經傳記師所誦說咸以日蝕之咎在於大臣非其人

易曰折其右肱豐卦九三爻此臣二當退也河平以

來臣久病連年數出外曠職素餐此臣三當退也

職任徒受祿秩也陛下以皇太后故不忍誅廢臣猶自知

遠流放又重自念重音直用切兄弟宗族所蒙不測當

身靡骨死輦載下靡碎也音武皮切不當以無益之故有

寢門之心誠歲餘以來所苦加侵誠實也日月益甚

勝大願願乞骸骨歸自治養冀賴陛下神靈未埋

齒朞月之間幸得瘳愈復望帷幄不然必寘溝壑

以非材見私天下知臣受恩深也以病得全骸骨

天下知臣被恩見哀重巍巍也巍巍高貌重音直用也進退

國為厚萬無纖芥之議論者不云疏斥外戚也唯陛下哀憐

辭指甚哀太后聞之為垂涕不御食帝少而親倚

弗忍廢乃報鳳曰朕秉事不明政事多闕故天變

臻咸在朕躬婁古將軍乃深引過自干欲乞骸骨而

退則朕將何嚮焉書不云乎公母困我周書維詩

辭也言公必須留京師務專精神安心自持期於

瘳稱朕意焉亟急瘳於是鳳起視事帝使尚書劾

章死獄中自是公卿見鳳側目而視

晉武帝知太子即惠弗克負荷然恃皇孫聰睿故

廢立之心復慮非賈后所生終致危敗時朝廷咸知

不堪政事帝亦疑焉嘗悉召東宮官屬使以尚書事

令太子決之太子不能對賈妃遣左右代對多引古

義給使張泓曰太子不學陛下所知今宜以事斷不

可引書妃從之泓乃具草令太子書之帝覽而大悅

太子遂安又賈充既為帝所遇欲專各勢而更純

華溫顛向秀和嶠之徒皆與任愷善楊珧王恂華

等充所親敬於是朋黨紛然帝知之召充愷晏於

乾殿而謂充等曰朝廷宜一大臣當和充愷各拜

而罷既而充愷等以帝知之而不責結怨愈深

惠帝居大位政出群下紀綱大壞貨賂公行勢位之

家以貴陵物忠賢路絕讒邪得志更相薦舉天下

之互市焉賈后將誅楊駿段廣跪而言於帝曰楊駿受恩先帝竭心輔政且孤公無子豈有反理願陛下審之帝不答

孝武帝時會稽王道子荒恣博平令吳興閩人與疏陳之帝益不平而逼於太妃無所廢黜乃出王為兖州殷仲堪為荊州王恂為僕射王雅為太子傅以張王室而潛制道子也道子復委任王緒王暕朋黨競扇友愛道盡太妃每和解之而道子不能中書郎徐邈以國之至親唯道子而已宜在敦穆容言於帝曰昔漢文明主猶悔淮南世祖聰達負

齊王兄弟之際實宜深慎帝納之復委任道子如隋煬帝時趙才為右侯衛大將軍帝幸江都待遇昵時江都糧盡將士離心內史侍郎虞世基秘書袁充等多勸帝幸丹陽帝廷議其事才極陳入京之策世基盛言渡江之便帝默然無言才與世基相而出

唐高祖時太子建成令楊文幹起兵及高祖馳使太宗以謀之太宗曰文幹小豎狂悖起兵州府官已應搗勦縱其假息時刻但須遣一將耳高祖曰幹事連建成恐應之者衆汝宜自行還立汝為太子

吾不能效隋文帝誅殺骨肉廢建成封作蜀王地
僻小易制若不能事汝亦易取耳太宗既行元吉及
四妃更爲建成內請封倫又外爲遊說高祖意便
改遂寢不行復令建成還京居守唯責以兄弟不
相容歸罪於中允王珪左衛率韋挺及天策兵曹
淹等並留之雋州後太宗宴於建成官中毒高祖乃
謂太宗曰發跡晉陽本是汝計尅平宇內是汝大功
欲升儲位汝固讓不受以成美志建成自居東宮
歷年所今復不忍奪之觀汝兄弟終是不和同在
邑必有忿競汝還行臺居於維陽自陝已東悉宜
之仍令汝建天子旌旗如梁孝王故事太宗泣而
曰今日之授實非所願不能遠離膝下言訖嗚咽
不自勝高祖曰昔陸賈漢臣尚有通過之事况吾
方之主天下爲家東西兩宮塗路咫尺憶汝卽往
勞悲也及將行建成元吉相與謀曰秦王今往維
既得土地甲兵必爲後患留在京師制之一匹夫耳
密令數人上封事曰秦王左右多是東人聞往維
非甞欣躍觀其情狀自今一去不作來意高祖於是
遂停

玄宗天寶十四載時肅宗爲皇太子安祿山至維

有詔以太子監國召宰臣楊國忠韋見素謂之日
太子仁孝朕尋欲傳以大位今遇寇難委之監國正
副朕懷事寧之後朕當高枕耳帝徃在東宮恭謹仁
孝日聞于外百姓思傳寶位十餘年矣及下詔之日
國人相賀楊國忠專宰朝政祿山反以誅國忠為名
盛言國忠號國夫人罪惡六軍將士皆切齒願除其
黨以解國難國忠大懼聚族而哭入而號訴於貴妃
妃悲號銜土請命于玄宗翼日有司進儀注遂寢而
不行天下失望

代宗時李栖筠為御史大夫時元載專政栖筠正身
守道無所畏憚垂入相者數回帝憚載有內外之助
竟不能決猶是依違累年竟以憂憤遺疾薨海內
惜之

德宗建中四年十月在奉天靈武留後杜希全監州
刺史載休顏夏州刺史時崋春合率兵六千赴難
至帝召宰相盧杞關播與白志貞渾瑊同議來路利
害杞與志貞以漢谷路為便瑊曰漢谷險隘必為賊
所邀若取乾陵北適附栢城守固而行便取城東北
鷄子堆下與城中犄角相應且分賊勢朱泚必不敢
更於陵寢徃來杞曰漢谷路近若慮逆賊邀擊即

出兵應接更取乾陵路過恐驚陵寢城曰今朱泚圍城斬伐松柏以夜繼日驚動多矣况又城中事危諸道救兵不至唯希全等率先赴難所繫不輕若此軍得於鷄子堆下營固守善地則朱泚可以計破杞曰陛下以順討逆豈同逆賊乎若令希全等北來卽是自驚陵寢白志貞後贊其言帝重違之遂命取漢谷路景子希全等軍至漢谷路果爲逆賊邀擊奪據木口乘高以大弩巨石左右連擊殺傷頗甚

文宗開成三年正月五日宰相李石自親仁里將入朝盜發於故郭尙父宅引弓射石矢纔破膚馬逸而迴盜伏坊間揮刀斫石斷馬尾竟以馬逸得還第帝聞之駭愕遣中使撫問賜金瘡藥因差六軍兵士二十人衛從是日京師大恐嘗叅官入朝者九人而已旬日方安石拜章辭位者三乃授荆南節度使李訓之亂起石於嘗僚之中付之衡柄石忘身徇國不顧患難振舉朝綱國威再復而中官仇士良切惡之伏戎加害帝深知其故不能理乃至罷免及不赴鎮賜宴之儀並闕人士傷之恥君子之道消也後唐莊宗同光二年中書奏曰諸道節度防禦刺史各著功名並全忠孝洎蒙昇獎皆荷渥恩雖萌爲

之心未展分憂之効况聞藩府不可以久虛侯伯不
可以久缺藩府虛則兵不輯侯伯闕則化不行繇此
觀之爲務甚急請令歸本任不奉詔旨不得輒離治
使從之是時諸藩府連帥或屯師于邊或在闕下皆
遣人權典後事人望旣卑法多掎斂時議甚危之宰
相故有是奏帝雖依久終却遲留及後王室危難
起鄴都率深此也

四年三月壬戌宰相豆盧革率百官上表請出內
財帛勞軍以軍情有變故也其辭畧云臣竊知內
所積有餘租庸贍軍不足今內外諸軍室家不能相
保儻非此時安卹臣懼人心離合表奏不報時知星
者上言昨夜惡星入大庫宜散帑藏以給三軍又奏
流星犯天棊主御前有急兵宜爲之備帝召宰臣於
便殿劉皇后出宮中粧奩銀盆各二并皇子滿喜等
三人調宰臣曰外人不知謂內庫金寶無數諸道所
進旋以給賜今宮中有者卽粧奩纓孺而已可市之
贍軍革等惶恐而退時出錢帛給賜諸軍樞密使張
居翰李紹宏宣徽使李唐王供奉內使景進各獻錢
幣數千以助賞軍是時編昨饑饉軍士之家乏食
營婦女掇蔬於野衛軍日望頒給復怨租庸刻削月

糧諸軍騰口流言不息宰臣延英奏對每請出內府財以給諸軍帝將行之尋爲劉后所沮而止旣而都城變擾軍人幸其搖動縱行優賞不滿其心至是積錢帛金銀賜之軍士負物而詬曰吾妻子已歿方與賞錢冀吾陳力一何謬也議者聞之知禍亂旦夕矣閔帝時未洪寔與康義誠有隙應順元年潞王據絳陽將稱兵向闕二月辛酉義誠將議出征閔帝幸左藏庫親給軍士錢帛是日義誠與洪寔同於庫中石論用兵利害洪寔言自出軍討逆累發兵師今聞小賊無一人一騎來者不如以禁軍據門自固彼安敢徑來然後徐圖進取全策也義誠怒曰若如此言寔寔反矣洪寔曰公自惟誰反其聲漸厲帝聞召而之洪寔猶理前謀又曰義誠言臣圖反據發兵討誠反必矣閔帝不能明辨命逐洪寔旣而義誠果禁軍迎降潞王

廢帝清泰元年六月三司使劉昫上言天下州郡天成二年括定稅率迨今八年近有民於本道及闕訴田不均乞簡視累行蠲放漸失賦租請朝臣選清強巡行簡視從之昫奉詔便欲曉諭樞密使耶齊言俟更詳議其事不報帝猶豫少決皆此

冊府元龜

冊府元龜

巡按福建監察御史臣李嗣京 訂正

知長樂縣事 臣夏允彝參閱

知建陽縣事 臣黃國琦較釋

閩位部 一百八十二

總序

仲尼有言化令神者稱皇德合天者稱帝德合仁義者稱王斯並穹昊有命曆數在躬大庇生民奄宅區宇者也其或真人未應中夏多難本非靈心之所眷暫為人望之攸屬或紹承於大統或專據於一方雖

復置宗祊改正朔建官以治嚮明以朝然與受河雒之符應龍馬之紀者殊矣故載籍譬之閏餘明其非正焉昔庖犧氏繼天而王德始於木其後三正五運迭相紹襲而共工氏雖伯九州自謂水德居犧農水火之間非其序也故不載於易不見於書茲閏之始也降及嬴秦雖并六國亦自謂水德復在周漢水火之間又非其序也故高祖弗之繼班氏謂之伯此亦共工氏之比也其後建安失御三國分峙魏文受山陽之禪都天地之中謂之正統得其宜矣劉先主僻處梁益孫大帝遠據江吳自竊尊名靡有神器誠非共工之匹然亦異於正統故同爲閏焉劉氏雖爲孝景之後有季漢之稱蓋以赤伏之數已盡黃星之兆又彰不足據矣及晉元南遷五胡迭盛瞻烏之嘆生於中原餘分之基傳於江左汜夫典午陵替靈寶集迫故宋武撥亂而起焉及元徽兇惡天王肆逆故齊高專政而代焉暨東昏奢淫蕭懿被殺故梁武興兵而取焉逮江陵不守貞陽被廢故陳武假名而興焉雖則自謂水火木土之運然而都邑居於下國聲教隔於中州永初始基不能混一長城失德歸於夷滅城郭翦而無餘宗祀倏而俱滅隋氏早已受宇文之

禪應炎上之德則此與夫爲虞賓助周祭者殊矣故亦謂之閏焉其後唐氏衰微朱梁凌奪雖則稱金行宅天邑然而莊宗以長安之屬籍總大鹵之兵威自是中興殄茲仇敵首藏於大社家靡於遺統斯亦不得爲正矣故繼之于閏共工之迹舊史無聞然秦氏而下凡八朝焉以其聲名文物憲章禮樂方冊所紀咸有可觀至於昏弱之迹凌夷之政亦可爲鑒戒代厥盤盂今並著之于篇若夫王莽桓玄之類皆不終其身自取其斃唐末諸方鎮或功德無聞或封疆至小並存別部不得預於斯焉凡七十八門

氏號

誕生

名諱

氏號

自秦盜周鼎二世而滅赤伏之末孫劉並起江表四代介于南紀東魏析派高齊逼禪逮于朱梁遂移唐祚率非五行更代之序乃當紫色餘分之目其於命族之本系享年之修促號謚之稱傳襲之數咸用討於史牘類例比次蓋有條而不紊披文而可見也秦始皇姓嬴氏其先帝顓頊之苗裔孫取女脩女脩織玄鳥隕卵女脩吞之生子大業大業取少典之子曰女華生大費與禹平水土已成帝錫玄圭禹受曰

非予能成亦大費為輔帝舜曰咨爾費贊禹功其錫爾阜旒爾後嗣將大出乃妻之姚姓之玉女謂錫之玄玉妻

以姚姓之女也大費拜受佐舜調馴鳥獸多馴服是為栢翳

舜賜姓嬴氏大費生子二人一曰大廉實為裕氏二

曰若本實為費氏其玄孫曰費昌子孫或在中國或

在夷狄費昌當夏桀之時去夏歸商為湯御以敗桀

於鳴條大廉玄孫曰孟戲中衍鳥身人言帝大戊聞

而卜之使御吉遂致使御而妻之自大戊以下中衍

之後遂世有功以佐殷國故嬴姓多顯遂為諸侯其

玄孫曰中湑一作生蜚廉蜚廉生惡來父子俱以材

力事紂蜚廉復有子曰季勝季勝等孟增幸於周成

王是為宅皐狼皐狼生衡父衡父生造父徐偃王作

亂臨淮有徐縣古徐國造父為繆王御長驅歸周以救亂繆王

以趙城封造父趙城在河東永安縣造父族繇此為趙氏自黃

廉生季勝已下五世至造父別居趙趙襄其後也惡

來革者蜚廉子也早死有子曰女防女防生旁皐旁

皐生大几大几生大駱大駱生非子以造父之寵皆

蒙趙城姓趙氏非子居大丘今槐里也孝王召使主馬于

汧渭之間孝王欲以非子為大駱適嗣而大駱娶中

侯之女生子成為適乃分土為附庸邑之秦今天水隴西縣

秦復使續嬴氏祀號曰秦嬴秦嬴生秦侯秦侯生公

伯公伯生秦仲秦仲立三年周厲王無道諸侯咸叛

之西戎反王室滅大丘大駱之族周宣王即位秦仲

八年也乃以秦仲為大夫誅西戎西戎殺秦仲秦仲立

二十二年死於戎有子五人其長者曰莊公周宣王

乃召莊公昆弟五人與兵七千人使伐西戎破之於

是復予秦仲後及其先大駱地大丘并有之為西垂

大夫莊公居其故西大丘生三人其長男世父曰戎

殺我大父仲我非殺戎王則不敢入邑遂將擊戎讓

其弟為太子莊公立四十年卒太子代立是為襄公

襄公七年周幽王為犬戎所殺襄公將兵救周戰甚

力有功又以兵送平王東遷平王封襄公為諸侯賜

之以其西之地曰戎無道侵奪我岐豐之地秦能攻

逐戎即有其地與誓封爵之襄公十二年卒文公立

四十八年文公天子卒謚為靜公靜公之長子為太

子是文公孫也五十年文公卒靜公子立是為寧公

寧公立十二年卒有子三人長男武公為太子武公

弟德公同母魯姬子生出子寧公卒太庶長弗忌成

壘三公廢太子而立出子為君出子六年三父等復

殺出子立故太子武公二十年武公卒立其弟德公

德公立二年卒生子三人長子宣公中子成公少子
 繆公宣公立十二年卒生子九人莫立立其弟成公
 成公立四年卒子七八莫立立其弟繆公繆公立三
 十七年用繇余謀伐戎王益國十二開地千里遂霸
 西戎三十九年繆公卒有子四十人其大子瑩代立
 是為康公康公立十二年卒子共公立共公五年卒
 子桓公立桓公二十七年卒子景公立景公四十年
 卒子哀公立哀公三十六年卒太子夷公蚤死立夷
 公子為惠公惠公立十年卒子悼公立悼公十二年
 卒子厲其公立厲其公三十四年卒子躁公立躁公
 十四年卒立其弟懷公懷公四年自殺太子昭子
 處大臣乃立昭子之子是為靈公靈公十年卒子獻
 公不得立立靈公季父悼子是為簡公簡公十六年
 卒子惠公立惠公三年卒出子立出子二年庶長邈
 靈公子獻公于河西而立之獻公二十四年卒子孝
 公立孝公二十四年卒子惠文君立是為惠王惠王
 十四年更為元年至十四年卒子武王立武王四年
 卒無子立異母弟是為昭襄王昭襄王五十六年卒
 子孝文王立孝文王元年卒子莊襄王立莊襄王二
 年卒子政立是為秦始皇帝在位三十七年子胡亥

立是爲二世皇帝二世三年諸侯並起叛秦趙高殺二世立子嬰子嬰立月餘諸侯誅之遂滅秦

蜀先主姓劉氏涿郡人漢景帝子中山靖王勝之後勝子貞元狩六年封涿縣陸城亭侯坐酎金失侯因家焉先主祖雄父弘世仕州郡雄舉孝廉官至東郡范令建安二十六年四月先主卽皇帝位於成都武擔之南在位三年太子禪立是爲後主母曰甘皇后在位四十年降於魏封安樂公至太始七年薨於維陽

吳大帝姓孫氏名權吳郡富春人蓋孫武之後父堅爲後漢破虜將軍領豫州刺史獻帝初平三年袁術使堅征荊州爲黃祖軍士所射殺興平元年術以堅部曲還其子策爲折衝較尉行殄寇將軍平定江東策自領會稽太守術旣僭號策以書絕之魏太祖表策爲討虜將軍封爲吳侯建安五年爲吳郡太守許貢客所殺創甚乃呼權以印綬授之黃初元年魏受漢禪二年封權爲吳王其年魏遣曹休等圍南郡權遂改年黃武臨江拒守九年四月權卽皇帝位母曰吳皇后在位二十四年年七十一太子亮嗣位是爲廢帝母曰皇后潘氏在位七年大將軍孫綝廢爲會

稽王時年十六繼迎權第六子瑯琊王休紹位是為
景帝母曰敬懷皇后王氏在位七年年三十薨謚曰
景皇帝兄子皓紹位是為歸命侯皓廢太子和之子
權之孫也母曰昭獻皇后何氏在位十七年降於晉
賜號歸命侯死於維揚年四十二

宋高祖武帝姓劉氏彭城縣綏里人漢高帝弟楚元
王交二十一世交生紅懿侯富富生宗正辟彊辟彊
生陽城繆侯德德生陽城節侯安民安民生陽城釐
侯慶忌慶忌生陽城肅侯岑岑生宗丘年年生東武
城令令生東萊太守景景生明經洽洽生博士弘弘

生瑯琊都尉悝悝生魏定襄太守某史失名其生邪城

令亮亮生晉北平太守膺膺生相國掾熙熙生封令
旭孫旭孫生混始過江居晉陵郡丹徒縣之京口里
官至武原令混生東安太守靖靖生郡功曹翹翹生
帝晉元熙二年四月以宋王受禪即皇帝位于建康
宮太極殿母曰穆皇后趙氏在位三年年六十七大
子義紹位是為少帝母曰張夫人在位三年撫軍將
軍謝晦司空錄尚書事徐羨之等宣太后令廢帝為
榮陽王又使中書舍人邢安泰害之年十九羨之等
迎武帝第三子宜都王義隆紹位是為文帝母曰胡

婕妤在位三十年年四十七為太子劭所弑第三子

駿紹位為孝武帝母曰路叔媛在位十一年年三十

五太子子業紹位是為前廢帝母曰王皇后在位二

年為湘東王彧所廢年十七彧遂紹位是為明帝母

曰沈婕妤在位八年年三十太子昱紹位是為後廢

帝母曰陳貴妃在位六年年十五為齊王蕭道成所

廢以明帝第三子安成王準紹位是為順帝母曰陳

昭華

明帝晚年痿疾不能御內諸弟姬有懷孕者取入宮乃生男與六宮所愛者養之而殺其母順

帝即桂陽王休範子也母不知何氏而以昭華為母在位三年年十三禪于齊

南齊太祖高皇帝姓蕭氏漢相國何二十四世孫何

子齊定侯延生侍中彪彪生公府掾章章生皓皓生

仰仰生御史大夫望之望之生光祿大夫育育生御

史中丞紹紹生光祿勳閎閎生濟陰太守闡闡生吳

郡太守永永生中山相苞苞生博士周周生蛇丘長

矯矯生州從事達達生孝廉休休生廣陵郡承豹豹

生太中大夫裔裔生淮陰令整整生即丘令雋雋生

輔國參軍樂子樂子生右軍承之承之生帝初何居

沛何孫彪免官居東海蘭陵縣中都里晉元康年分

東海為蘭陵郡中朝亂淮陰令整過江晉陵武進縣

僑置本土加以南名於是為南蘭陵人也帝以宋履

帝昇明三年四月遂受禪卽皇帝位母曰孝皇后陳氏在位四年年五十六太子順紹位是爲武帝母曰劉皇后在位十二年年五十四皇太孫昭業紹位是爲鬱林王母曰皇太子妃王氏在位二年年二十二爲高帝庶兄始安王道生之子西昌侯鸞所殞迎新安王昭文紹位是爲海陵王在位一年亦爲西昌侯鸞所殺年十五鸞紹位是爲明帝母曰懿后在位五年年四十七太子寶卷紹位是爲東昏侯母曰明敬劉皇后在位四年雍州刺史蕭衍舉義奉明帝第八子荊州刺史南康王寶融卽位於江陵是爲和帝舉兵向關冠軍將軍王珍國侍中張楞率兵入殿殞之年十九和帝在位二年禪于梁爲梁所殞年十五梁高祖武帝姓蕭氏蘭陵中都里人漢相國何之後何生鄴定侯延延生侍中彪彪生公府掾章章生皓皓生太子傳望之望之生光祿大夫育育生御史中丞紹紹生光祿勳閎閎生濟陰太守闡闡生吳郡太守永永生中山相苞苞生博士周周生蛇丘長矯矯生州從事達達生孝廉休休生廣陵郡丞豹豹生太中大夫裔裔生淮陰令整整生濟陰太守鎔鎔生州治中副副生南臺治書道賜道賜生順之齊高帝族

弟也參預佐命封臨湘縣侯歷官侍中衛尉太子詹事領軍將軍丹陽尹贈鎮北將軍順之生帝齊中興二年四月梁王受禪卽皇帝位母曰獻皇后張氏帝在位四十九年年八十六太子綱紹位是爲簡文帝母曰穆太后丁氏在位三年爲景侯所廢年四十九武帝第七子荊州刺史持節都督荆雍湘司郢寧梁南北秦九州諸軍事湘東王繹卽位于江陵是爲孝元帝母曰文宣太后阮氏在位三年江陵爲西魏所陷帝遂遇害帝第九子晉安王方智立是爲敬帝母曰夏太后在位二年禪于陳帝薨於外邸年十六後梁宣帝武帝之孫昭明太子統之第三子中大通三年封岳陽郡王歷官宣惠將軍知石頭戍事瑯琊彭城二郡太守東陽州刺史及江陵陷爲周太祖所立稱皇帝於其國在位八年年三十四太子毓立是爲明帝在位二十三載年四十四太子琮立二年陳文帝徵入朝因留不遣

陳高祖武帝姓陳氏吳興長城下若里人漢太丘長寔之後世居潁川寔玄孫准晉太尉准生康康生達永嘉南遷爲丞相掾歷太子洗馬出爲長城令悅其山水遂家焉達生康康生盱眙太守英英生尚書

公弼公弼生步兵較尉鼎鼎生散騎嘗侍高高生
安令詠詠生安安生太守猛猛生太掌卿道巨道巨
生文讚文讚生帝梁敬帝太平二年十月以陳王受
禪卽皇帝位母曰董氏安皇后帝在位三年年五十
七兄子臨川郡王禧紹位是爲文帝在位八年太子
伯宗紹位是爲廢帝母曰沈皇后在位二年太皇太
皇后令降爲臨海郡王以始興昭烈王第二子太尉
安成王瑒紹位是爲孝宣帝在位十四年年五十三
太子叔寶紹位母曰柳皇后在位八年貞明三年正
月爲隋所滅遂降于隋至仁壽四年薨於維陽年五

十二

東魏孝靜帝姓元氏后魏孝文帝之曾孫清河王
之孫嗣清河王亶之世子母曰胡妃孝武帝永熙三
年八月拜開府儀同三司孝武入關大將軍勃海王
高歡與百官會議推帝以奉明帝之后時年十一在
位十七年禪于北齊明年薨于中山國年二十八
北齊顯祖文宣帝姓高氏渤海菑人七世祖隱晉玄
菟太守隱生慶慶生泰泰生湖三世仕慕容氏及慕
容寶敗國亂湖率亂衆歸魏爲右將軍湖生四子第
三子謚仕魏位至侍御史坐法徙居懷朔鎮謚生

樹生歡仕東魏爲丞相歡薨長子澄嗣遇害帝以弟嗣位天平八年六月以丞相齊王受禪卽皇帝位母曰婁太后在位十年年三十一太子殷紹位是爲廢帝母曰李皇后在位一年年十七文宣母弟嘗山王演立是爲孝昭帝在位一年年二十七母弟長廣王湛立是爲武成帝在位五年禪位於太子緯是爲后主武成年二十一後主母曰胡皇后在位十二年爲後周所滅年二十二

梁太祖神武元聖孝皇帝姓朱氏宋州碭山人其先舜司徒虎之後高祖黠曾祖茂琳祖信父誠帝卽誠之第三子母曰文惠王皇后唐哀帝天祐四年四月以相國梁王受禪卽皇帝位在位八年年六十一明年第四子東京留守均王友貞平庶人友珪紹位是爲末帝母曰元貞張皇后在位十一年爲后唐所滅

誕生

夫天命所佑運歷攸歸有開必先休應斯見故其生也必有禎符之朕神靈之紀以啓其祚焉非獨乘五勝而起繼三徵而王者有是徵也至於居餘分之次擅一方之地者亦復嘉祥貴象兆於厥初斯蓋上稽靈心雖殊於天序下觀人事亦異於甞民表神道之

玄遠成史氏而昭著者矣

秦始皇以昭王四十八年正月生於邯鄲及生名爲

政

以正月
旦生日

吳武烈帝堅母懷妊夢腸出繞吳昌門寤而懼之以
告鄰母鄰母曰安知非吉徵也

太帝母吳氏孕而夢月入其懷旣而生策及帝在孕
又夢日入其懷以告堅曰昔姪策夢月入我懷今也
又夢日入我懷何也堅曰日月者陰陽之精極貴之
象吾子孫其興乎

廢帝亮以赤烏七年三月生於內殿

宋高祖以晉哀帝興寧元年歲次癸亥三月壬寅夜
生神光炤室盡明是夕甘露降於墓樹

少帝以晉義熙二年生於京口高祖年踰不惑尚未
有男及帝生甚悅

文帝以晉義熙三年生於京口

孝武帝以文帝元嘉七年八月庚午夜生有光炤室

前廢帝以元嘉二十六年正月甲申生

明帝以元嘉十六年十月戊寅生

後廢帝以大明七年正月辛丑生於衛尉府

順帝太始五年癸丑生

南齊高祖以宋元嘉四年丁卯生

武帝以元嘉二十七年六月己未生於建康縣之清

溪宅其夜陳孝后

高帝母

劉昭后

帝母也

同夢龍據屋上

故小字龍兒

梁高祖以宋孝武太明八年甲辰歲生於秣陵縣同

夏里三橋家初帝母張后嘗夢抱日已而有娠其後

忽見庭前昌蒲花光采非嘗遂取吞之是月生帝將

產之夕有異光后見庭內若有衣冠陪列焉

簡文帝以天監二年十月丁未生于顯陽殿

孝元帝母阮脩容夢龍罩其床

一云夢月

天監七年

八月丁巳生帝于後宮舉室中非嘗香有紫胞之異

陳高祖以梁天監二年癸未歲生於吳興長城下若

里

廢帝以梁承聖三年五月庚寅生

宣帝以梁大通二年七月辛酉生有赤光蒲堂室

後主以梁承聖二年十一月戊寅生於江陵

北齊文宣帝母婁太后既孕每夜有赤光炤室私嘗

怪之及產名之曰侯尼鮮卑言有相子也初婁太后

有孕六男二女皆感夢孕文襄則夢一斷龍文宣則

夢一大龍首尾屬天地張口動目勢狀驚人孝昭則

夢蟻龍於地武成則夢龍浴於海

後主母胡后夢於海上坐玉盆日入裙下遂有娠天保七年五月五日生於并州邸

幼主母穆皇后武平元年六月生於鄴

梁太祖以唐太中六年壬申歲十月二十一日生於碭山縣午溝里是夕所居廬舍之上有赤氣上騰里人望之皆驚奔來曰朱家火發矣及則廬舍儼然旣而鄰人以誕孩告衆咸異之

開平元年五月辛巳有司奏以降誕之日爲大明節休假前後各一日十月庚午大明節內外臣寮各以奇貨良馬上壽故事內殿開宴召釋道二教對御談論宣旨罷之命閤門使以香合賜宰臣佛寺行香

二年十月己未大明節諸道節度刺史各進獻鞍馬銀器綾帛以祝壽宰臣百官設齋於相國寺

三年十月癸未大明節帝御文明殿設齋僧道召宰臣翰林學士預之諸道節度刺史及內外諸司使咸

有進獻

臣欽若等曰梁太祖實錄自開平四年後不書誕節

末帝以唐文德元年戊申歲九月十二日生於東京乾化二年三月文武百官上言請以九月十二日帝降誕日爲明聖節休假三日

名諱

名以制義所以著象類之說諱不偏下所以申臣子之情是知名諱之來古今通道而餘分之在位亦偏方之所奉雖本以嘉稱期於象德或求諸義訓契彼未然蓋成敗之有端若符應之素定然則稽之人事察彼天道諒盛衰之在德豈名稱之足云乎

秦始皇帝名政以昭王四十八年正月生於邯鄲

云一

名正以正月

且生故也

二世皇帝名胡亥

始皇時燕人盧生秦周書緯亡秦者胡也始皇不知此為人名反備

北

蜀先王名備字玄德

後主名禪字公嗣譙周曰春秋傳著晉穆侯名太子

曰仇弟曰成師師服曰異哉君之名子也嘉耦曰妃

怨耦曰仇今君名太子曰仇弟曰成師始兆亂矣兄

其替乎其後果如服言及漢靈帝名二子曰史侯董

侯既立為帝後皆免為諸侯備言具也禪言授也若

言漢已具矣當授與人也意者甚於穆侯靈帝之名

蜀既亡咸以周言為驗

吳大帝名權字仲謀

廢帝名亮字子明

景帝名休字子烈

後主名皓字元景一名彭宗字皓宗

宋高祖名裕字德輿小字寄奴孔子河雒識日空完無主奇人中女子獨

立又為雙

少帝名義符小字車兵

文帝諱義隆小字車兒

孝武帝諱駿字休龍小字道人

前廢帝諱子業小字法師

明帝諱彧字體景小字榮期

後廢帝諱昱字德融小字慧震初明帝諸子在孕皆

以周易筮之卽以所得之卦為小字故帝字慧震其餘皇子亦如之

順帝諱準字仲謀小字知觀

南齊太祖諱道成字紹伯小字鬪將王子年歌曰

知其姓草肅肅穀中最細低頭熟穀中精細者稻

道也熟猶成也孝經鈞命決曰誰者起視將皆帝之

符應事具閏位徵應門

武帝諱頤字宣遠小字龍兒

鬱林王諱昭業字元尚小字法身

海陵王諱昭文字季尚

明帝諱鸞字景栖小字玄度

東昏侯諱寶卷字智藏本名賢明帝輔政後改焉論者

日名以行義往賢垂範備而之禪術士識之東昏已卷矣藏以終之其兆先徵蓋天所命矣

和帝諱寶融字知昭

梁高祖諱衍字叔達小字練兒帝初為梁王將受齊

禪沈約言於帝曰識之行中水作天子此乃歷數在

記

簡文帝諱綱字世讚小字六通

元帝諱繹字世誠小字七符

敬宗諱方智字惠相小字法真

後梁宣帝諱瑒字理孫

明帝諱巋字仁遠

召國公諱琮字温文

陳高祖諱霸先字興國小字法生

文帝諱蒨字子章

廢帝諱伯宗字奉業小字藥王

宣帝諱頊字紹世小字師利

後主諱叔寶字元秀小字黃奴初文帝謂宣帝曰我

諸子皆以伯為名汝諸子宜用叔為稱宣帝因以訪

毛喜喜即條自古名賢杜叔英虞叔卿等二十餘人

以啓之文帝稱善或言後主名叔寶反語爲少福敗
亡之徵也

東魏孝靜帝諱善見

北齊文宣帝諱洋字子進母武明太后以生帝於晉
陽樂其後童謠曰一束藁兩頭然河邊殺獍飛上天
藁然兩頭於文爲高字河邊殺獍爲水邊羊指帝名
也

廢帝諱殷字正道初文宣命邢邵爲帝名字從而尤
之曰殷家弟及正字一止吾身後兒不得也邵懼請
改焉文宣不許曰天也

孝昭帝諱演字延安

武成帝諱湛

後主諱緯字仁綱初清河未武帝夢大蝟攻破鄴城
故索境內蝟膏以厭之識者以後主名聲與蝟相傳
亡齊徵也

梁太祖諱晃初名溫唐僖宗中和三年授宣武軍節
度使賜名全忠天祐四年受禪下令曰王者創業興
邦立名傳世必難知而示訓從易避以便人或稽其
符命應彼開基之義垂諸象德之言爰考簡書求於
往代周王昌發之號漢帝詢衍之文或崇一德以

稱或爲二名而更易先王令典布在縑緗寡人本名兼於二字且異帝王之稱仍兼避易之難郡職縣官多須改換况宗廟不遷之業憲章百世之規事叶典儀豈憚革易寡人今改名晃是以天意雅符於明德日光顯契於瑞文昭融萬邦理斯在是庶順玄穹之意永臻康濟之期宜令有司分告天地宗廟其舊名中外章疏不得更有迴避

末帝諱頊初名友貞卽位下制曰朕仰膺天聰近雲家讐旋開將相之謀請紹祖宗之業群情見迫三議莫從祇受推崇懼不負荷方欲烝嘗寢廟禋類郊丘合徵定體之辭用表事神之敬其或於文尚淺在理未周亦冀隨時別置制義雖臣子行孝重更名於已孤而君父稱尊貴難知而易避今則虔遵古典詳考前聞允諧龜筮之占庶合帝王之道載惟涼德尤備嘉名中外群僚當體朕意宜改名鏗貞明中又改爲頊或解云頊字一十一月一八果以一十一年十月九日亡

冊府元龜

冊府元龜

巡按福建監察御史臣李嗣京 訂正

知建陽縣事 臣曹鼎臣奏聞

知建陽縣事 臣黃國琦較釋

閩位部

勳業

自秦承六世之餘烈并吞宇內武功震耀遂建大業
 玄德馮宗室之緒仲謀藉父兄之業遺值世亂分
 勢勝奄宅吳蜀是為鼎國宋齊梁陳迭王南紀東
 北齊創都於鄴莫不因嗷嗷之資糾櫜櫜之旗

義慷慨或乘機奮發解紛排難夷兇禁暴威懷遠
以成厥功威能驅策賢智而任其謀訓練驍果而盡
其力勤身征伐以清外侮積日累勞以稔民聽然後
謳訟咸集嗜欲將至端委揖讓南面而君民者焉

秦始皇帝莊襄王之子

臣欽若等曰自莊襄王已
上事具列國君部諸門

年

十三代莊襄王立為秦王當是時秦地已并巴蜀漢

中越宛有郢置南郡北收上郡以東有河東太原上

黨郡東至滎陽滅二周置三川郡呂不韋為相招致

賓客游士欲以并天下李斯為舍人

主廄內少史官
名也或曰侍從

賓客謂之
舍人也

蒙驁王齮

一作
龍

庶公為將軍

庶秦
邑

王年少

初即位委國事大臣元年晉陽反蒙驁擊定之二二年

庶公將軍攻卷斬首三萬三年蒙驁攻韓取十三城

又攻魏氏陽有詭四年拔之五年攻魏定酸棗

陳留
有酸棗

棗
縣燕虛長平

平一作千汝
南有長平縣

雍丘山陽

陳留有雍丘
河內有山陽

皆拔之取二十城六年韓魏趙衛楚共擊秦取壽陵

秦出兵五國兵罷拔衛迫東郡其君角率其支屬從

居野王阻其山保魏之河內七年蒙驁處以攻龍狐

慶都

慶一
作庶

還兵攻汲八年王弟長安君成蟜將軍擊

趙九年攻魏垣蒲陽十一年將軍王翦桓騎楊端和

攻鄴取九城王翦攻闕與棗楊

在并
州

十三年桓騎

趙平陽殺趙將扈輒斬首十萬十四年攻趙軍於平陽取宜安破之殺其將軍定平陽武城十五年太興

兵一軍至鄴一軍至太原取狼孟屬太十六年發卒

受地韓南陽假守騰魏獻地於秦秦置麗邑十七年

內史騰攻韓得韓王安盡納其地十八年大興兵攻

趙王翦將上地蓋咸陽面為上地也下井陘山名端和將河內

邯鄲城羗癸伐趙十九年癸與王翦盡定取趙地

陽得趙王引兵欲攻燕屯中山趙公子嘉率其宗數

百人之代自立為代王東與燕合兵軍上谷二十年

使王翦辛勝攻燕燕代發兵擊秦軍秦軍破燕易水

之西二十一年王賁攻薊乃益發卒諸王翦軍遂破

燕軍取燕薊城得太子丹之首二十二年王賁攻

引河溝灌大梁城壞其王請降盡取其地二十三年

王翦擊荆取陳以南至平輿縣名在汝南虜荆王三十五

年大興兵使王賁將攻燕遼東得燕王喜還攻代

代王嘉王翦定荆江南地降越君二十六年齊王建

與其相后勝發兵守其西界不通秦秦使王賁從燕

南攻齊得齊王建遂并天下為始皇帝

蜀先主涿郡涿縣人祖雄父弘世仕州郡臣欽若等曰自弘已

上事具閏位氏號門吳及宋齊已下放此先王少孤好交結豪俠年少

附之中山大商張世平蘇雙等貲累千金乃多與之
金財先主繇是得用合徒衆後漢靈帝末黃巾起先

主率其屬從較尉鄒靖討賊有功除安喜尉

縣名屬中山

督郵以公事到縣先主求謁不通直入縛督郵杖二

百解綬繫其頸著馬下棄官亡命頃之大將軍何進

遣都尉母丘毅詣丹陽募兵先主與俱行至下邳遇

賊力戰有功除爲下密丞後去官後爲高唐尉遷令

爲賊所破往奔中郎將公孫瓚瓚表爲別部司馬

與青州刺史田楷拒冀州牧袁紹數有戰功試守平

原令後領平原相郡民劉平素輕先主耻爲之下使

客刺之客不忍刺語之而去袁紹攻公孫瓚先主與田

楷東屯齊曹公征徐州徐州牧陶謙遣使告急於田楷

楷與先主俱救之時先主自有兵千餘人及幽州烏

丸雜胡騎又畧得饑民數千人旣到陶謙以丹陽兵

四千益先主先主遂去楷歸謙謙表爲豫州刺史屯

小沛謙病篤謂別駕糜竺曰非劉備不能安此州也

謙死竺率州人迎先主先主未敢當下邳陳登謂先

主曰今漢室陵遲海內傾覆立功立事在於今日彼

州殷富戶口百萬欲屈使君撫臨州事先主曰袁公

路近在壽春此君四世五公海內所歸君可以州與

之登日公路驕豪非治亂之主今欲為使君合步騎
 十萬上可以安主濟民成五霸之業下可以割地守
 境書功於竹帛若使君不見聽許登亦未敢聽使君
 也北海相孔融謂先主曰袁公路豈憂國忘家者邪
 冢中枯骨何足介意今日之事百姓與能天與不取
 悔不可追先主遂領徐州

時陳登等遣使詣袁紹曰天降災於禍臻鄆州州將

殂殞生民無主恐懼姦雄一旦承隙以貽盟主日曷
 之憂輒共奉故平原相劉備府君以為宗主永使百
 姓知有依歸方今寇難縱雄不遑釋甲謹遣下吏奔
 告于執事紹答曰劉玄德弘雅有信義今徐州樂戴
 之誠副袁術來攻先主拒之於盱眙淮陰曹公表先
 主為鎮東將軍封宜城亭侯是歲建安元年也先主

與術相持經月呂布乘虛襲下邳下邳守將曹豹反
 間迎布布虜先主妻子先主轉軍於海西楊奉韓
 寇徐楊間先主邀擊盡斬之先主求和於呂布布
 其妻子先主遣關羽守下邳遂還小沛復合兵得
 餘人呂布惡之自出兵攻先主先主敗走歸曹公
 公厚遇之以為豫州牧將至沛收散卒給其軍糧
 與兵使東擊布布遣高順攻之曹公遣夏侯惇往不
 能救為順所敗復虜先主妻子送布曹公自出東
 助先主圍布於下邳生禽布先主復得妻子從曹公
 還許表先主為左將軍禮之愈重出則同與坐則

席袁術欲經徐州北就袁紹曹公遣先王督朱靈

招要擊術未至術病死先王未出時獻帝舅車騎將

軍董承僻受帝衣帶中密詔當誅曹公先王未發是

時曹公從容謂先王曰今天下英雄惟使君與操耳

本初之徒不足數也先王方食失匕箸時正當雷震

日晉人云迅雷風烈必變良有以也遂與承及長水校尉

种輯將軍吳子蘭王子服等同謀會見使未發事

承等皆伏誅日郭多有數百兵壞李催數萬人但足

下與吾同義耳昔呂不韋之門須子楚而後高今吾

與子繇是也服曰惶懼不敢當且兵又少承曰舉事

訖得曹公成兵顧不足邪服曰今京師豈有所任乎

計先王據下邳靈等還先王乃殺徐州刺史車曹

關羽守下邳而身還小沛東海昌霸反郡縣多叛

公為先王眾數萬人遣孫乾與袁紹連和曹公遣

岱王忠擊之不克五年曹公東征先王先王敗績

公盡收其眾虜先王妻子并禽羽以歸先王走青

青州刺史袁譚先王故茂才也將步騎迎先王先

隨譚到平原譚馳使白紹紹遣人將騎道路奉迎身

去鄴二百里與先王相見駐月餘日所失亡士卒積

來集曹公與袁紹相拒於官渡汝南黃巾劉辟等

先主曹公遣曹仁將兵擊先主先主還紹軍陰欲
紹乃說紹南連荆州牧劉表紹遣先主將本兵復至
汝南與賊龔都等合衆數千人曹公遣蔡陽擊之
先主所殺曹公既破紹自南擊先主先主遣糜竺孫
乾與劉表相聞表自郊迎以上賓禮待之益其兵使
屯新野荆州豪傑歸先主者日益多表疑其心陰擊
之先主駐荆州數年嘗於表坐起至厠見髀裏肉生
慨然流涕還坐表怪問備曰平嘗身不離鞍髀肉皆
消今不復騎髀裏肉生日月若馳老將至矣而功業
不建是以悲耳表使先主拒夏侯惇于禁等於博望
久之先主設伏兵一旦自燒屯僞遜惇等追之爲伏
兵所破十一年曹公北征烏丸先主說表襲許表不
能用曹公南征會表病篤託國於先主曰我兒不才
而諸將並零落我死之後卿便攝荆州先主曰諸子
自賢君其憂病或勸先主宜從表言先主曰此人待
我厚今從其言人必以我爲薄所不恐也表卒其子
琮代立遣使乞降曹公不告先主先主亦不知久之
乃覺遣所親問琮琮令宋忠詣先主宣旨是時曹公
在宛先主大驚駭謂忠曰卿諸人作事如此不早
語今禍至方告我不亦太劇乎引刀向忠曰今斷

頭不足以解忿亦恥大丈夫臨別復殺卿輩遺忠去
乃呼部曲議或勸先主劫將琮及荊州吏士徑南到
江陵先主答曰劉荊州臨亡託我以孤遺背信自濟
吾所不爲死何面目以見劉荊州乎乃駐馬呼琮琮
懼不能起琮左右及荊州人多歸先主先主過辭表
墓涕泣而去比到當陽衆十餘萬輜重數千兩日行
百餘里別遣關羽乘船數百艘使會江陵或謂先主
曰宜速行保江陵今雖擁大衆被甲者少若曹公兵
至何以拒之先主曰夫濟大事必以人爲本今人歸
吾吾何忍棄去曹公以江陵有軍實恐先主據之乃
釋輜重輕軍到襄陽聞先主已過曹公將精騎五千
急追之一日一夜行三百餘里及於當陽之長坂先
主棄妻子與諸葛亮張飛趙雲等數十騎走曹公大
獲其人衆輜重先主斜趨漢津適與羽船會得濟河
遇表長子江夏太守琦衆萬餘人與俱到夏口先主
遣諸葛亮自結於孫權權遣周瑜程普等水軍數萬
與先主并力與曹公戰於赤壁大破之焚其舟船先
主與吳軍水陸并進追到南郡時又疾疫北軍多歿
曹公引歸先主表琦爲荊州刺史又南征四郡武陵
太守金旋長沙太守韓玄桂陽太守趙範零陵太守

劉度皆降廬江雷緒率部曲數萬口稽顙琦病死

下推先主為荊州牧治公安江表傳曰備立營於油口改名為公安

稍畏之進妹固好先主至京見權綱繆恩紀十六年

益州牧劉璋遙聞曹公將遣鍾繇等向漢中討張魯

內懷恐懼別駕從事蜀郡張松說璋曰曹公兵強無

敵於天下若因張魯之資以取蜀楚誰能禁之者乎

璋曰吾固憂之而未有計松曰劉豫州使君之宗室

而曹公深讎也善用兵若使之討魯魯必破魯破則

益州強曹公雖來無能為也璋然之遣法正將四千

人迎先主前後賂遺以巨億計正因陳益州可取之

策先主前見張松後得法正皆厚以恩意機密盡其殷勤之歡因問蜀中濶狹兵器府庫人馬眾寡及

諸要害道里遠近松等具言之又盡地圖山川處所繇是盡知益州虛實也先主留諸葛

亮關羽等據荊州將步卒數萬人入益州至涪璋自

出迎相見甚歡張松令法正曰先主及謀臣龐統

說便可於會所襲璋先主曰此大事也不可倉卒

推先主行大司馬領司隸較尉先主亦推璋行鎮西

大將軍領益州牧璋增先主兵使擊張魯又令督白

水軍先主并三軍萬餘人車甲器械資貨甚盛是歲

璋還成都先主北到葭萌未即討魯厚樹恩德以

眾心明年曹公征孫權權呼先主自救先主遣使

璋曰曹公征吳吳憂危急孫氏與孤本爲唇齒又進在青泥與關羽相拒今不往救羽進必大克轉侵州界其憂有甚於曾曾自守之賊不足慮也乃從璋求萬兵及資寶欲以東行璋但許兵四千其餘皆給半先主激怒其衆曰吾爲益州征疆敵師徒勤瘁不遑寧居今積帑藏之財而恫於賞功望士大夫爲出死力戰其可得乎張松書與先主及法正曰今大事垂可立如何釋此去乎松兄廣漢太守肅懼禍逮已白璋發其謀於是璋收斬松嫌隙始構矣璋勅關公諸將文書勿復關通先主先主大怒召璋白水軍督楊懷責以無禮斬之乃使黃忠卓膺勒兵向璋先主徑至關中質諸將并士卒妻子引兵與忠膺等進到涪據其城璋遣劉蠓冷苞張任鄧貴等拒先主於涪皆破敗退保綿竹璋復遣李嚴督綿竹諸軍嚴率衆降先主軍益彊分遣諸將平下屬縣諸葛亮張飛趙雲等將兵泝流定白帝江州江陽惟關羽留鎮荊州先主進軍圍雒時璋子循守城被攻且一年十九年夏雒城破進圍城都數十日璋出降

時璋遣帳下司馬張裔請先主

先主許以禮其君而安其人也裔還城門乃開先主以裔爲巴郡太守

蜀中殷盛豐樂

先主置酒大饗士卒取蜀城中金銀分賜將士還

穀帛先主復令益州牧諸葛亮爲股肱法正爲謀主
關羽張飛馬超爲爪牙許靖麋竺簡雍爲賓友二十
年孫權以先主已復益州使使報欲得荊州先主言
須得涼州當以荊州相與權忿之乃遣呂蒙襲奪長
沙零陵桂陽三郡先主引兵五萬下公安令關羽入
益陽是歲曹公定漢中張魯遜走巴西先主聞之與
權連和分荊州江夏長沙桂陽東屬南郡零陵武陵
西屬引軍還江州今蕞州也遣黃權將兵迎張魯張魯已
降曹公曹公使夏侯淵張郃屯漢中數數犯暴巴界
先主令張飛進兵宕渠與郃等戰於瓦口破郃等收
兵還南鄭先主亦還成都二十三年先主率諸將進
兵漢中分遣將軍吳蘭雷銅等入武都皆爲曹公所
沒先主次于陽平關與淵郃等相拒二十四年春自
陽平南渡沔水緣山稍前因定軍山勢作營淵將兵
來爭其地先主命黃忠乘高鼓譟攻之大破淵軍斬
淵郃及曹公所署益州刺史趙顛等曹公自長安舉
衆南征積月不拔亡者日多乃引軍還先主遂有漢
中遣劉封孟達李平等攻申耽於上庸是秋羣下上
先主爲漢中王表於漢帝於是還治成都時關羽攻
曹公將曹仁禽于禁於樊俄而孫權襲殺羽取荊州

二十五年魏文帝稱尊號改年曰黃初或傳聞漢帝見害乃發喪制服追謚曰孝愍皇帝是後在所並言眾瑞日月相屬群臣上尊號即皇帝位於成都武擔之南

吳孫堅吳郡富春人少為縣吏年十七與父共載舩至錢唐擊殺海賊胡玉等繇是顯聞府召署假尉會稽妖賊許昌起於句章自稱陽明皇帝與其子韶扇動諸縣眾以萬數堅以郡司馬募召精勇得千餘人與州郡合討破之是歲熹平元年刺史臧旻列上功狀詔書除堅鹽瀆丞數歲徙肝胎丞又徙下邳丞歷

三縣所在有稱吏民親附中平元年黃巾賊帥張角

起於魏郡託有神靈遣八使以善道教化天下而

相連結自稱黃天泰平三月甲子三十六萬一旦俱

發天下響應燔燒郡縣殺害長吏角稱天公將軍角弟寶稱地公將軍

寶弟梁稱人公將軍漢遣車騎將軍皇甫嵩中郎將朱雋將兵

討擊之雋表請堅為佐軍司馬鄉里少年隨在下邳

者皆願從堅又募諸商旅及淮泗精兵合千許人與

雋并力奪擊所向無前一云堅乘勝深入於西華失

分散不知堅所在堅騎驄馬馳還營拮地呼鳴將士

隨馬於草中得堅堅還營十數日創少愈乃復出戰汝穎賊困迫走保宛城堅身當一面登城先入眾乃

蟻附遂大破之雋具以狀聞上拜堅別部司馬邊章

韓遂作亂涼州中郎將董卓拒討無功中平三年遣

司空張溫行車騎將軍西討章等溫表請堅與參軍

事尋拜議郎中時長沙賊區星自稱將軍眾萬餘人

攻圍城邑乃以堅為長沙太守到郡親率眾士施設

方略旬月之間克破星等堅到郡郡中震服任用良吏勅吏曰謹遇良善治官

曹文書必循治周朝郭石亦帥徒眾起於零桂與星

相應遂越境尋討三郡肅然堅為長沙太守是時廣

春長為賊所攻遣使求救於堅堅整嚴救之主簿進

諫堅答曰太守無文德以征伐為功越界攻討以全

異國以此獲罪何愧海內乎漢朝錄前後功封堅為

程侯董卓擅朝政橫恣京城諸州郡並興義兵欲以

討卓堅亦舉兵荊州刺史王獻素遇堅無禮堅過後

之比至南陽眾數萬人南陽太守張咨聞軍至晏然

自若堅以牛酒禮咨咨明日亦答詣堅酒酣長沙主

簿入白堅前移南陽而道路不治軍資不具請收主

簿推問意故咨太懼欲去兵陳四周不得出有頃主

簿復入白堅南陽太守稽停義兵使賊不時討請

出案軍法從事便牽咨於軍門斬之郡中震慄無敢

不獲一云南陽太守張咨既不給軍糧又不肯見

堅欲進兵恐自後患乃詐得疾舉軍震惶通

巫醫禱祀山川遣所親人入說咨言病因欲以兵

咨咨聞之心利其兵即將步騎五六百人詣營

堅臥與相見無何卒然而前到魯陽與袁術相見
起穿劍罵咨遂執斬之
表堅行破虜將軍領豫州刺史遂治兵於魯陽城
進軍討董卓遣長史公孫稱將兵從事還州督促軍
糧施幔於城東門外祖道送稱官屬並會卓遣步騎
數萬人逆堅輕騎數十先到堅方行酒談笑勅部曲
整頓行陣無得妄動後騎漸益堅徐罷坐導引入城
乃謂左右曰向堅所以不即起者恐兵相蹈藉諸君
不得入耳卓兵見堅士衆甚整不敢攻城乃引還堅
移屯梁東大爲卓軍所攻堅與數十騎潰圍而出後
相收兵合戰於陽人大破卓軍梟其都督華雄等是
時或問堅於袁術術還疑不運軍糧陽人去魯陽百
餘里堅夜馳見術術踧躅卽調發軍糧堅還屯卓
堅猛將乃遣將軍李催等來求和親令堅列疏子弟
任刺史郡守者許表用之堅曰卓逆天無道蕩覆王
室今不夷汝三族縣示四海則吾死不瞑目豈將與
乃和親邪復進軍大谷距雒九十里卓自出與堅
於諸陵墓間卓敗走却屯龜池聚兵於陝堅進雒陽
宣陽城門更擊呂布復破走堅乃掃除宗廟平塞諸
陵分兵出函谷關至新安龜池間以截卓後卓謂長
史劉艾曰關東諸將數敗矣無能爲也惟孫堅小

諸將軍宜慎之是時闔東州郡務相兼并以自彊大
袁紹遣會稽周暉為豫州刺史來襲取州堅慨然歎
曰同舉義兵將救社稷逆賊垂破而各若此吾當誰
與戮力乎言發涕下初平三年袁術使堅征荊州劉
表表遣黃祖逆於樊鄧之間堅擊破之追渡漢水遂
圍襄陽單馬行峴山為祖軍士所射殺一云堅悉其
眾攻表表閉
門夜遣將黃祖潛出發兵祖將兵欲還堅逆與戰祖
敗走竄峴山中堅乘勝夜追祖祖部兵從竹水間暗
射堅殺之時年三十七又云劉表將呂公將兵緣山
向堅堅輕騎尋山討公公兵下石中堅頭應時嗣出
兄子賁帥將士眾就術術表賁為豫州刺史權既稱
尊號謚堅曰武烈皇帝

策堅之長子初興義兵策將母徙居舒與周瑜相友
收合士大夫江淮間人咸向之堅薨還葬曲阿已乃
渡江居江都徐州牧陶謙深忌策策舅吳景時為丹
陽太守策乃載母徙曲阿與呂範孫河俱就景因緣
召募約數百人時張紘有母喪策數詣紘啓以世務
曰方今漢祚中微天下擾攘英雄雋傑各擁眾營私
未有能扶危濟亂者也先君與袁氏共破董卓功業
未遂卒為黃祖所害策雖暗雅竊有微志欲從袁陽
州求先君餘兵就舅氏於丹陽收合流散東據吳會
報讐雪恥為朝廷外藩君以為何如紘答曰既素空

劣方君縲經之中無以奉贊盛略策曰君高名播遠
遠近懷歸今日事計決之於君何得不紆慮啓告副
其高山之望若微志得展血讐得報此乃君之勳力
策心所望也因涕泣橫流顏色不變絃見策忠壯內
興王室已寧諸侯貢職今君紹先侯之軌有號武之
名若投丹陽收兵吳會則荆楊可一讐敵可報據長
江奮威德誅除群穢佐輔漢室功業侔於桓文豈徒
外藩而已哉方今世亂多難若功成事立當與同好
俱南濟也策曰一與君同符合契同有永固之分今
便行矣以老母弱弟委付於君策無復回顧之憂策
徑到壽春見袁術涕泣而言曰亡父昔從長沙入討
董卓與明使君會於南陽同盟結好不幸遇難勳業
不終策感惟先人舊恩欲自憑結願明使君垂察其
誠術甚貴異之然未肯還其父兵術謂策曰孤始用
貴舅爲丹陽太守賢從伯陽爲都尉彼精兵之地可
還依召募策遂詣丹陽依舅得數百人而爲涇縣大
帥祖卽所襲幾至危殆於是復往見術術以堅餘兵
千餘人還策太傅馬日磾仗節安集關東在壽春以
禮辟策表拜懷義較尉策騎士有罪逃入術營隱於

內廐策指使人就斬之訖詣術謝術曰兵人好叛當其疾之何為謝也繇是軍中益畏憚之術欲攻徐州從廬江太守陸康求米三萬斛康不與術遣策攻康拔之先是劉繇為揚州刺史州舊治壽春壽春術已據之繇乃渡江治曲阿時吳景尚在丹陽策從兄賁又為丹陽都尉繇至皆追逐之景賁退舍歷陽繇遣樊能于麋陳橫屯江津張英屯當利口以距術術自用故吏瑯邪惠衢為揚州刺史更以景為督軍中郎將與賁共將兵擊英等連年不克策乃說術乞助景等平定江東

策說術云家有舊恩在東願助舅討橫江橫江拔因投本土召募可得三萬兵

以佐明使君經濟漢室術知其恨而以劉繇據曲阿王郎在會稽謂策未必能定故許之術表

為折衝較尉行殄寇將軍兵財千餘騎數十匹賓客願從者數百人比至歷陽衆五六千策母先自曲阿徙於歷陽策又徙母阜陵渡江轉鬪所向皆破莫敢當其鋒而軍令整肅百姓懷之策年少雖有位號而士民皆呼為孫郎百姓聞孫郎至皆失魂魄長吏委城郭竄伏山草及至軍士奉令不敢虜略鷄犬菜茹一無所犯民乃大悅競以牛酒詣軍劉繇既走策入曲阿勞賜將士遣將陳寶詣阜陵迎母及弟發恩布令告諸縣竿融等故鄉部曲來降首者一無所問

從軍者一身行復除門戶不樂者勿彊也旬日之間
四面雲集得見兵二萬餘人馬千餘匹威震江東形
勢轉盛吳人嚴白虎等衆合萬餘人處處屯聚吳景
等欲先擊破虎等乃至會稽策曰虎等群盜非有大
志此成禽耳遂引兵渡浙江據會稽屠東治白虎高
壘堅守使其弟與請和許之與請獨與策會面約既
會策引白刃斫席與體動策笑曰聞卿能坐躍歎
不嘗聊戲卿耳與曰我見刃乃然策知其無能也乃
以手戟投之立死與有勇力白虎衆以其死也甚懼
進攻破之盡更置長吏策自領會稽太守復以吳景
爲丹陽太守以孫賁爲豫章太守分豫章爲廬陵郡
以賁弟輔爲廬陵太守丹陽朱治爲吳郡太守彭城
張昭廣陵張紘秦松陳端等爲謀主時袁術僭號策
以書諫曰董卓無道陵虐王室禍加太后暴及弘農
天子播越宮廟焚毀是以豪傑發憤沛然俱起元惡
旣斃少主東顧乃使主人奉命宣明朝恩偃武修文
與之更始然而河北異謀於黑山曹操毒被於東徐
劉表僭亂於荆南公孫叛逆於朔北正禮阻兵玄德
爭盟是以未獲從命橐弓戢戈當謂使君與國同規
而舍是弗恤宛然有自取之志懼非海內企望之意

也成湯討桀稱有夏多罪武王伐紂曰殷有重罰此
二王者雖有聖德假使時無失道之過無繇逼而取
也今主上非有惡於天下徒以幼小脅於強臣異於
湯武之時也又聞幼主明智聰敏有夙成之德天下
雖未被其恩咸歸心焉若輔而興之則旦奭之美率
土所望也使君五世相承為漢宰輔榮寵之盛莫與
為比宜效忠守節以報王室時人多惑圖緯之言妄
牽非類之交苟以悅主為美不顧成敗之計古今所
慎可不熟慮忠言逆耳駁義致憎苟有益於尊名無
所敢辭術不納策遂絕之曹公表策為討逆將軍封

為吳侯

一云建安二年夏漢朝遣議郎王暢奉使
詔書曰董卓逆亂凶國害民先將軍堅念

平討雅意未遂厥美著聞策尊善道求福不回今以
策為騎都尉襲爵烏程侯領會稽太守策上表謝曰
臣以固陋孤特邊垂陛下廣播高澤不遺細節以
襲爵兼典各郡仰惟榮顧非所克堪興平二年十一
月二十日於吳郡曲阿得袁術所呈表以臣行殄
軍將至被詔書乃知詐擅雖輒捐廢猶用棟樑臣
七十喪失所怙懼有不任堂構之鄙以忝折薪之
誠無去病十八建功世祖列將弱冠佐命臣初領
末年弱冠雖驚懼不武然思竭微命惟術狂惑為
惡深重臣馮威靈奉辭伐罪庶必獻捷以報所受
術死長史楊弘大將張勳等將其眾欲就策廬江
守劉勳要擊悉虜之收其珍寶以歸策聞之偽與
好盟勳新得術眾時豫章上繚宗民萬餘家在江
策勸攻勳取之勳既行策輕軍晨夜襲拔廬江

盡降勳獨與麾下數百人自歸曹公

江表傳曰

公衛將軍董承益州牧劉璋等協力討袁術劉表

嚴當進會術死術從弟喬女壻黃倚等畏懼曹公不

敢守壽春乃共昇術棺樞扶其妻子及部曲男女

劉勳於皖城勳糧食少無以相振乃遣從弟偕告

於豫州太守華歆歆郡素少穀遣吏將偕就海昏

繚使諸宗帥共出三萬斛米以與偕偕住曆月纔得

數千斛偕乃發勳具說形狀使勳來襲誅之勳得

書便潛軍到海昏邑下宗帥知之空壁逃匿勳了

所得時策西計黃祖行及石城聞勳輕身詣海昏

分遣從兄責備率八千人於彭澤待勳自與周瑜

二萬人步襲皖城卽克之得術百工及鼓吹部曲

萬餘人并術勳妻子上用女南李術爲廬江太守

兵三千人以守皖皆徙所得人東詣吳責輔又於彭

澤破勳勳求入楚江從尋陽步上到置馬亭聞策

已克皖乃投西塞至浙築壘自守告急於劉表求

於黃祖祖遣太子射船軍五千人助勳策復勳功大

破勳勳與偕北歸曹公射亦遁走策收得勳兵三千

餘人船千艘遂前進夏口攻黃祖時劉表遣從子

之吳錄載策表曰臣計黃祖以十二月八日到祖

屯沙羨縣劉表遣將助祖並來趣臣臣以十一日

旦部所領江夏太守行建威中郎將周瑜領林陽

守行征虜中郎將呂範領零陵太守行蕩寇中郎

程普兼奉業較尉孫權行先登較尉韓當行武鋒

尉黃蓋等當時俱進身跨馬操陳手擊急鼓以齊

勢吏士奮擊踊躍百倍心精意果各競用命越

壑迅疾若飛火放上風兵激煙下弓弩並發流矢

集日加辰時祖乃潰爛鋒刃所截焱火所焚前無

寇惟祖逆走獲其妻息男女七人斬虎狼韓暭以

三萬餘級其赴水弱者二萬餘口船六千餘艘財

山積雖表未禽祖宿狡猾爲表腹心出作爪牙表

鴟張以祖氣息而祖家屬部曲掃地無餘表孤特

虜成鬼行尸誠皆聖朝神武

遠振臣討有罪得效微勤

是時袁紹方強而策

江東曹公力未能逞且欲撫之乃以弟女配策小

匡又爲子章取賁女皆禮辟策弟權劫又命楊州

問位部

史嚴象舉權茂才建安五年曹公與袁紹相拒於官渡策陰欲襲許迎漢帝密治兵部署語將未發會為

故吳郡太守許貢客所殺先是策殺貢貢小子與客

亡匿江邊策單騎出卒與客遇客擊傷策

陳登為廣陵太守治

射陽登即瑀之從兄子也孫策前西征登陰復遣間

使以印綬與嚴白虎餘黨圖為後害以報瑀見破之

辱策歸復討登軍到丹徒須待運糧策好獵將步騎

數出策驅馳逐鹿所乘馬精駿從騎絕不能及初吳

郡太守許貢上表於漢帝曰孫策驍雄與項籍似宜

加貴寵召還京邑若被詔不得不還若放於外必作

後患策候吏得貢表以示策請貢相見以責讓貢貢

辭無表策即令武士絞殺之貢如客潛民間欲為貢

報讐獵日卒有三人即貢客也策問爾等何人答曰

是韓當兵在此射鹿耳策曰當兵吾皆識之未嘗見

汝等因射一人應弦而倒餘二人怖恚創甚請張長

便舉弓射策中頰後騎尋至皆刺殺之

史昭等謂曰中國方亂夫以吳越之眾三江之固足

以觀成敗公等善相吾弟呼權佩以印綬謂曰舉江

東之眾決機於兩陣之間與天下爭衡卿不如我舉

賢任能各盡其心以保江東我不如卿至夜卒時年

二十六權稱尊號追謚策曰長沙桓王

權策之弟策既定諸郡時權年十五以為陽羨長郡

察孝廉州舉茂才行奉義較尉建安四年從策征廬

江太守劉勲勲破進討黃祖於沙羨五年策薨以事

授權哭未及息策長史張昭謂權曰孝廉此寧哭時

邪乃改易權服扶令上馬使出巡軍曹公表權為討

虜將軍領會稽太守屯吳使丞之郡行文書事待張
昭以師傅之禮而周瑜程普呂範等爲將帥昭延俊
秀聘求名士曾肅諸葛瑾等始爲賓客分部諸將鍾
撫山越討不從命初孫策表用李術爲廬江太守策
亡之後術不肯事權而多納其亡叛權移書求索術
報曰有德見歸無德見叛不應復還權大怒乃以狀
白曹公曰嚴刺史昔爲公所用又是州舉將而李術
凶惡輕犯漢制殘害州司肆其無道宜速誅滅以懲
醜類今欲討之進爲國朝掃除鯨鯢退爲舉將報塞
怨讐此天下達義夙夜所甘心術心懼誅復詭說求

救明公所居阿衡之任海內相瞻願勅執事勿復聽
受是歲舉兵攻術於皖城閉門自守求救於曹公曹
公不救糧食乏盡婦女或丸土而吞之遂屠其城梟
術首徙其部曲三萬餘人八年權西伐黃祖破其舟
軍惟城未克而山寇復動還過豫章使呂範平都陽
會稽程普討安樂太史慈領海昏韓當州秦呂蒙等
爲劇縣令長十年權使賀齊討上饒分爲建平縣十
二年西征黃祖虜其人民而還十三年春權復征黃
祖祖先遣舟兵拒軍都尉呂蒙破其前鋒而凌統董
襲等盡銳攻之遂屠其城祖挺身亡走馮則追梟其

首虜其男女數萬口荆州牧劉表死權將曾肅乞奉

命弔表二子且以觀變肅未到而曹公已臨其境表

子琮舉眾以降劉備欲南濟江肅與相見因傳權旨

為陳成敗備進任夏口使諸葛亮詣權權遣周瑜程

普等行是時曹公新得表眾形勢甚盛諸議者皆望

風畏懼多勸權迎之

曹公與權書問近者奉辭伐罪 旌麾南指劉琮束手今治水軍

八十萬眾方與將軍會獵於吳權 得書以示群臣莫不嚮震失色

惟瑜肅執拒之議

意與權同瑜普為左右督各領萬人與備俱進遇於

赤壁大破曹公曹軍燒其餘船引退士卒饑疫死者

大半備瑜等復追至南郡曹公遂北還留曹仁徐晃

於江陵使樂進守襄陽權自率眾圍合肥使張昭攻

九江之當塗昭兵不利權攻城踰月不能下曹公自

荆州還遣張喜將騎赴合肥未至權退十四年瑜仁

相守歲餘所殺傷甚眾任委城走權以瑜為南郡太

守劉備表權行車騎將軍領徐州牧備領荆州牧屯

公安十六年權徙治秣陵十七年城石頭作濡須塢

十八年正月曹公攻濡須權與相拒月餘曹公望權

軍歎其齊肅乃退

曹公出濡須作油船夜渡州上權 以水軍圍取得三千餘人其沒溺

者亦數千人權數挑戰公堅守不出權乃自來乘輕

船從濡須口入公軍諸將皆以為是挑戰者欲擊之

公曰此必孫權欲身見吾軍部伍也勅軍中皆精嚴

弓弩不得妄發權行五六里迴還作鼓吹公見舟船

器仗軍伍整肅喟然嘆曰生子當如孫仲謀劉景升兒子若豚犬耳

十九年五月權征皖城閏月克之獲廬江太守朱光及參軍董和男女

數萬口是歲劉備定蜀權以備已得益州令諸葛瑾

從求荊州諸郡備不許曰吾方圖涼州涼州定乃盡

以荊州與吳耳權曰此假而不反而欲以虛辭引歲

遂置南三郡長吏關羽盡逐之權大怒遣呂蒙督鮮

于丹徐忠孫規等兵三萬取長沙零陵桂陽三郡使

魯肅以萬人屯巴丘

巴丘今曰巴陵

以禦關羽權任陸口為

諸郡節度蒙到二郡皆服惟零陵太守郝普未下會

備到公安使關羽將三萬兵至益陽權乃召蒙等使

還助肅蒙使人誘普普降盡得三郡將守因引軍還

與孫皎潘璋并魯肅兵並進拒羽於益陽未戰會曹

公入漢中備懼失益州使使求和權令諸葛瑾報更

尋盟好遂分荊州長沙江夏桂陽以東屬權南郡零

陵武陵以西屬備備歸而曹公已還權反自陸口遂

征合肥合肥未下徹軍還兵皆就路權與凌統甘寧

等在津北為魏將張遼所襲統等以死扞權權乘駿

馬越津橋得去二十一年冬曹公次于居巢遂攻濡

須二十二年春權令都尉徐詳請曹公請降公報使

修好誓重結婚二十四年關羽圍曹仁於襄陽曹公

遣左將軍于禁救之會漢水暴起羽以舟兵盡虜禁等精騎三萬送江陵惟城未拔權內憚羽外欲以爲已功牋與曹公乞以討羽自效曹公且欲使羽與權相持以圖之驛傳權書使曹仁以弩射示羽羽猶豫不能去閏月權征羽先遣呂蒙襲公安獲將軍士仁蒙到南郡南郡太守糜芳以城降蒙據江陵撫其老弱釋于禁之囚陸遜別取宜都獲梯歸枝江夷道還屯夷陵守峽口以備蜀闕羽還當陽西討麥城權使誘之羽僞降立幡旗爲象人於城上因遁走兵皆解散尚十餘騎權先使朱然潘璋斷其徑路十二月璋

司馬馬忠獲羽及其子平都督趙累等於章鄉遂定荊州曹公表權爲驃騎將軍假節領荊州牧封南昌侯二十五年正月曹公薨太子丕代爲丞相魏王是年冬魏受漢禪明年四月劉備稱帝於蜀權自公安都鄂魏文帝策封權爲吳王加九錫又明年正月權遣陸遜部將軍宋謙等攻蜀五屯皆破之所斬及投兵降者數萬人劉備奔走僅以身免初權外託事而誠心不疑魏欲遣侍中辛毗尚書桓楷與權盟誓并徵任子權辭讓不受魏乃命曹休張遼臧霸出洞口曹仁出濡須曹真夏侯尚張郃徐晃圍南郡權遣

呂範等督五軍拒之權遂改元黃武臨江拒守使大
中大夫鄭全聘劉備於白帝然猶與魏文帝相往來
至後年乃絕八年春公卿百司皆勸權正尊號四月
丙申遂即皇帝位

冊府元龜

冊府元龜

巡按福建監察御史臣李嗣京 訂正

知甌寧縣事 臣孫以敬參閱

知建陽縣事 臣黃國琦較釋

閏位部 三

勲業第二

宋高祖武皇帝漢高帝弟楚元王交二十一世孫初
為晉冠軍孫無終司馬安帝隆安三年十一月妖賊
孫恩作亂於會稽衛將軍謝琰前將軍劉牢之東討
平之請帝參府軍事十二月牢之至吳而賊緣道屯

結牢之命帝與數十人覘賊遠近會遇賊至衆數千人高祖便進與戰所將人多死而帝意方厲手奮長刀所殺傷甚衆牢之子敬宣疑高祖淹久恐爲賊所困乃輕騎尋之旣而衆騎並至賊乃奔退斬獲千餘人摧鋒而進平山陰恩尋還入海四年五月恩復入會稽殺衛將軍謝琰十月劉牢之復率衆東征恩退走牢之屯上虞使帝戍句章城旣卑小戰士不盈數百帝嘗被堅執銳爲士卒先每戰輒摧鋒陷陣賊乃退還陝口時東伐諸帥御軍無律士卒暴掠甚爲百姓所苦唯帝法令明整所至莫不親賴焉五年春

恩頻攻句章帝屢摧破之恩復走入海三月北出

鹽帝追而翼之築城於海鹽故治賊日來攻城城

兵力甚弱帝屢出破之

臣欽若等日事具閩位謀畧門

五月孫恩

滬瀆殺吳國內史袁崧死者四千人是月帝復破

於婁縣六月恩乘勝淳海奄至丹徒戰士十餘萬

牢之猶屯山陰京邑震動帝倍道兼行與賊俱至

時衆力旣寡加以步遠疲勞而丹徒守軍莫有聞

恩率衆數萬鼓譟登秣山居民皆荷楯而立帝率

數百奔擊大破之投巘赴水死者甚衆恩以鼓自

載僅得還舩雖被摧破猶恃其衆力徑向京師

高大值風不得進旬日乃至白石尋知劉牢之已還
朝廷有備遂走向爵洲八月以帝爲建武將軍下邳
太守領水軍追討至爵州復大破恩恩南走十一月
帝追恩於滬瀆及海塩又破之三戰並大獲俘馘以
萬數恩自是饑饉疾疫死者大半自陝口奔臨海元
興元年驃騎將軍司馬元顯西伐荊州刺史桓玄玄
亦率荆楚大衆下討元顯遣鎮北將軍劉牢之拒之
帝參共軍事次溧洲玄至帝請擊之不許將遣子敬
宣詣玄請和帝與牢之甥東海何無忌並固請不從
遂遣敬宣詣玄玄克京邑殺元顯以牢之爲會稽內
史懼而告帝曰便奪我兵禍其至矣今當北就高素
於廣陵興事卿能從我去乎答曰將軍以勁卒數萬
望風降服彼新得志威震天下三軍人情都已去矣
廣陵豈可得至耶吾當反復還京口耳牢之叛走自
縊死何無忌謂帝曰我將何之帝曰鎮北去必不免
卿可隨我還京口桓玄必不能守節北面我當與卿
圖之今方是玄矯情任筭之日必將用我輩也桓玄
從兄修以撫軍鎮丹徒以帝爲中兵參軍孫恩自奔
敗之後徒旅漸散懼生見獲乃於臨海投水死餘衆
推恩妹夫盧循爲主桓玄欲且緝寧東土以循爲主

嘉大守循雖受命而肆暴不已五月玄復遣帝東
 時循自臨海入東陽二年正月玄復遣帝破循於
 陽循奔永嘉復追破之斬其大帥張士道追討至
 晉安循浮海南走六月加帝彭城內史十二月桓
 篡立帝從桓修入朝玄見帝謂司徒王謚曰昨見
 裕風骨不羸蓋人傑也每遊集輒引接慙慙贈賜
 厚帝愈惡之或說玄曰劉裕龍行虎步視瞻不凡
 不為人下宜早為之所玄曰我方欲平蕩中原非
 裕莫可付以大事關隴平定然後當別議之耳玄乃
 下詔曰劉裕以寡制衆屢摧妖鋒汎海窮追十珍其
 入諸將力戰多被重瘡自元帥以下至於將士並宜
 論賞以敘勲烈先是帝東征盧循何無忌隨至山
 勒於會稽舉義帝以為玄未據極位且會稽遙遠
 事為難俟其篡逆事著徐於京口圖之不憂不克至
 是桓修還京帝託以金創疾動不堪步從乃與無忌
 同船共還建興復之計於是與弟道規沛郡劉毅平
 昌孟昶任城魏詠之高平檀憑之瑯琊諸葛長民大
 原王元德隴西辛扈興東莞童厚之並同義謀時桓
 修弟弘為征虜將軍青州刺史鎮廣陵道規為弘中
 兵參軍昶為州主簿乃令毅潛往就昶聚徒於江

謀起兵殺弘長民爲豫州刺史乃達左軍府參軍謀據歷陽相應元德厚之謀於京邑聚衆攻玄并尅期齊發三年二月己丑朔乙卯帝託以遊獵與無忌等收集義徒凡同謀何無忌魏詠之詠之弟欣之順之檀憑之從子韶弟祇隆與叔道濟道濟從兄範之帝弟道憐沛郡劉藩河內向彌平昌孟懷王管義之陳畱周安穆臨淮劉蔚從弟珪之東莞臧喜從弟寶符從子穆生童茂宗陳郡周道民源陽田演譙國范青等二十七人願從者百餘人丙辰詰旦城開無忌服傳詔服稱詔居前義衆馳入齊聲大呼吏士驚散莫敢動卽斬桓修以徇帝哭甚慟厚加殯斂孟昶勸弘其日出獵未明開門出獵人和道規毅等率壯士五六十人因開門直入弘方噉粥卽斬之因收衆濟江義軍初尅京城修司馬刁弘率文武佐吏來赴帝登城謂之曰郭江州已奉乘輿反正於尋陽我等並被密詔誅除逆黨同會今日賊玄之首已當臬於大航矣諸君非大晉之臣乎今來欲何爲弘信之收衆而退毅旣至帝命誅弘衆推帝爲盟主先移檄於京邑曰夫治亂相因理不當忝狡焉肆虐或值聖明自我大晉陽九屢構隆安已來難結皇室忠臣碎於虎口

貞良弊於豺狼逆臣桓玄陵虐人鬼阻兵荆郢肆暴
都邑天未亡難句力繁興踰年之間遂傾皇祚主上
播越流幸非所神器沉淪七廟毀墜夏后之羅泥犴
有漢之遭莽卓方之於玄未足爲喻自玄篡逆於今
歷年亢旱彌時民無生氣加以庶士疲於轉輸文武
困於造築父子乖離室家分散豈唯大東有杼軸之
悲標梅有傾筐之慨而已哉仰觀天文俯察人事此
而能久孰有可亡凡在有心誰不扼腕裕等所以叩
心泣血不遑啓處者也是故晝寤宵興拔獎忠烈潛
構崎嶇險過履虎輔國將軍劉毅廣武將軍何無忌
鎮北主簿孟昶兖州主簿魏詠之寧遠將軍劉道規
龍驤將軍劉藩振威將軍檀憑之等忠烈斷金精貫
白日荷戈奮袂志在畢命益州刺史毛璩萬里齊美
掃定荆楚江州刺史郭昶之奉迎主上官於尋陽鎮
北參軍王元德等並率部曲保據石頭揚武將軍諸
葛長民收集義士已據歷陽征虜參軍庾順之等潛
相連結以爲內應同力協規所在蜂起卽日斬僞徐
州刺史安城王修青州刺史弘首義衆旣集文武爭
先咸謂不有一統則事無以輯裕辭不獲已遂總軍
要庶上憑祖宗之靈下罄義夫之力翦馘逋逆蕩清

京輦公侯諸軍或世樹忠貞或身荷爵寵而並倪庸
猾豎自効莫繇顧瞻周道寧不吊乎今日之舉良其
會也裕以虛薄才非古人勢接於已踐之機受任於
旣頽之運丹誠未宣感慨憤躍望霄漢以永懷焉山
川以增厲授檄之日神馳賊庭帝乃以孟昶爲長史
總攝後事檀憑之爲司馬百姓願從者千餘人三月
戊午朔遇吳甫之於江乘甫之玄驍將也其兵甚銳
帝躬執長刀大呼以衝之衆皆披靡卽斬甫之進至
羅落橋皇甫敷率數千人逆戰寧遠將軍憑之與帝
各御一隊憑之戰敗見殺其衆退散帝進戰彌厲前
後奮擊應時摧破卽斬敷首玄聞敷等並沒愈懼使
桓謙屯東陵口卞範之屯覆舟山西衆合二萬巳未
旦義軍食畢棄其餘糧進至覆舟山東使張旗幟於
山上以爲疑兵玄又遣武騎將軍庾禕之配以精手
利器助謙等帝躬先士卒以奔之將士皆殊死戰無
不一當百呼聲動天地時東北風急因命縱火煙焰
張天鼓譟之音震京邑謙等諸軍一時奔潰玄始錄
遣軍置陣而走意已决別使領軍將軍殷仲文具舟
於石頭仍將子姪浮江南走庚申帝鎮石頭城立留
臺官焚桓温神主於宣陽門外造晉新主立於大廟

遣諸將帥追玄尙書王謐率百官奉迎乘輿司徒王謐與衆議推帝領揚州固辭乃以謐爲錄尙書事領揚州刺史以帝爲使持節都督楊徐兗豫青冀幽并八州諸軍事領軍將軍徐州刺史先是朝廷承晉氏亂政百司縱弛桓玄雖欲釐整而衆莫從之帝以身範物先威禁內外百官皆肅然奉職二三日間風俗頓改時諸葛長民失期不發刀達執送之未至而玄敗玄經尋陽江州刺史郭昶之備乘輿法物資之玄收畧得二千餘人挾天子走江陵冠軍將軍劉毅輔國將軍何無忌振武將軍劉道規率諸軍追討四月奉武陵王遵爲大將軍承制大赦天下唯桓玄一祖後不在赦例玄子韶又聚衆向歷陽高祖命輔國將軍諸葛長民擊走之無忌道規破玄大將鄭鈐等於桑落州衆軍進據尋陽加高祖都督江州諸軍事玄旣還荆郢大聚兵衆召水軍造樓船器械率衆二萬挾天子發江陵浮江東下與冠軍將軍劉毅等相遇於崢嶸州衆軍大破之玄棄衆復挾天子還復江陵玄黨殷仲文奉晉二皇后還京師玄至江陵因西走南郡太守王騰之荊州別駕王康產奉天子入南郡府初征虜將軍益州刺史毛據遣從孫祐之與參軍

費括送弟喪下有衆二百矐弟子循之時爲玄屯騎
較尉誘玄以人蜀至枚回州括與祐之迎射之益州
都護馮遷斬玄首傳京師又斬玄子昇於江陵帝初
玄敗於崢嶸州義軍以爲大事已定追攝不速玄走
幾一旬衆軍猶不至玄從子振逃於華容之浦中招
聚逆黨數千人晨襲江陵城居民競出赴之玄從兄
謙先匿於沮川亦聚衆以應振爲玄舉哀立喪庭謙
乃率衆官奉璽綬於安帝無忌道規旣至江陵與桓
振戰於靈浮玄黨馮該又設伏于楊林義軍奔敗退
還尋陽兖州刺史辛禺懷貳會北青州刺史劉該反

禺求征該次淮陰又反禺長史羊穆之斬禺傳首十
月帝領青州刺史甲仗百人入殿劉毅諸軍復進至
夏口毅攻魯城道規攻偃月壘皆拔之十二月諸軍
進平巴陵義熙元年正月毅等至江津破桓振江陵
平天子至自江陵以帝爲侍中車騎將軍都督中外
諸軍事使持節徐青二州刺史帝固讓加錄尚書事
又不受屢請歸藩天子不許遣百僚敦勸又親幸帝
第帝惶懼詣闕陳請天子不能奪是月旋鎮丹徒天
子重遣大使都勸又不受乃改授都督荆司梁益寧
雍涼七州并前十六州諸軍事盧循浮海破廣州二

年三月督交廣二州十月帝上言曰昔天禍皇室巨
狡縱篡臣等義惟舊隸豫蒙國恩仰契信順之符俯
厲人臣之憤雖社稷之靈抑亦事繇眾濟其翼獎忠
勤之佐文武畢力之士孰執在已之謙用虧國體之
大輒申攝眾軍先上同謀起義始平京口廣陵二城
臣及撫軍將軍毅等二百七十二人并後起義出都
緣道大戰所餘一千五百六十六人又輔國將軍長
民故給事中王元德等十人合一千八百四十八人
已正其西征眾軍須論集續上於是尚書奏封習謀
主鎮軍將軍裕豫章郡公食邑萬戶賜絹二萬疋其
餘封賞各有差鎮軍府佐吏降故太傅謝安府一等
十一月天子重申前令加帝侍中進號車騎將軍開
府儀同三司固讓詔遣百僚敦勸三年二月帝還京
師將詣廷尉天子先詔獄官不得受詣闕陳讓乃見
聽旋於丹徒四年正月天子徵帝入輔授侍中車騎
將軍開府儀同三司揚州刺史錄尚書徐兖二州刺
史如故帝表解兖州先是遣冠軍劉敬宣伐蜀賊譙
縱無功而返九月以敬宣挫退遜位不許乃降爲中
軍將軍五年二月南燕鮮卑慕容超大掠淮北執陽
平太守劉千載濟南太守趙元驅畧千餘家三月帝

抗表北討以丹陽尹孟昶監中軍留府事四月舟師
發京都泊淮入泗五月至下邳留船艦輜重步軍進
琅邪所過皆築城留守鮮卑梁父莒城二戍並奔走
六月慕容超遣五樓及廣寧王賀賴先據臨朐城既
聞大軍至留羸老守廣固乃悉出臨朐有巨筴水去
城四十里超告五樓曰急往據之晉軍得水則難擊
也五樓馳進龍驤將軍孟龍符領騎居前奔往爭之
五樓乃退衆軍步進有車四千兩分車爲兩翼方軌
徐行車悉張幔御者執稍又以輕騎爲游軍軍令嚴
蕭行伍齊整未及臨朐數里賊鐵騎萬餘前後交至

帝命兖州刺史劉藩弟并州刺史道憐諮議參軍劉
敬宣陶延壽參軍劉懷玉慎仲道素邈等齊力擊之
遣諮議參軍檀韶直趨臨朐韶尅臨朐悉虜超輜重
超聞臨朐已拔引衆走帝親鼓之賊乃大奔超遁還
廣固獲超馬僞輦玉璽豹尾等送於京師斬其大將
段暉等十餘人其餘斬千餘計明日進軍廣固卽屠
大城超退保小城於是設長圍守之圍高三丈外穿
三重塹停江淮轉輸館穀於齊土撫納降附華戎歡
悅援才授爵因而任之七月詔加帝北青冀二州刺
史超大將桓遵遵弟苗並率衆歸順帝方治攻具城

上人曰汝不得張綱何能爲也綱者超僞尚書郎其人有巧思會超遣綱稱藩於姚興乞師請救興僞許之而實憚帝不敢遣綱從長安還泰山太守申宣執送之乃升綱於樓上以示城內城內莫不失色於是使綱大治攻具超求救不獲綱反見虜轉憂懼乃請稱藩求割大峴爲界獻馬千匹不聽圍之轉急河北居民荷戈負糧至者日以千數九月進帝太尉中書監固讓十月張綱治攻具成設諸奇巧飛樓木幔之屬莫不畢備城上火石弓矢無所用之六年二月丁亥屠廣固超踰城走征虜賊曹喬胥獲之殺其王公以下納口萬餘馬二千匹送超京師斬於建康帝帝之北伐也徐道覆至番禺說盧循及循率衆過領冠南康廬陵預章諸郡守皆委任奔走於時平齊問未至卽馳使徵帝帝之初尅齊也欲停鎮下邳清盪河雒旣而被徵使至卽日班師鎮南將軍何無忌與徐道覆戰於豫章敗績無忌被害內外震駭朝廷欲奉乘輿北走就帝尋知賊衆未至人情小安帝至下邳以船運輜重自率精銳步歸至山陽聞無忌被害則慮京邑失守乃卷甲兼行與數十人至淮上問行旅以朝廷消息人曰賊尚未至劉公若還便無所憂也

帝大喜單船過江逕至京口衆乃大安四月癸未帝至京師解嚴息甲循之初下也使道覆向尋陽自寇湘中諸郡荊州刺史道規遣軍至長沙爲循所敗循逕至巴陵與道覆連旗而下帝以南藩覆沒表送章綬詔不聽五月劉毅敗績於桑落州問至內外恟擾時北師始還多創痍疾病京師戰士不盈數千賊旣破江豫二鎮戰士十餘萬舟車百里不絕奔敗還者並聲其雄盛孟昶諸葛長民懼寇漸逼欲擁天子過江帝不聽昶固請不止帝曰今重鎮外傾強寇內逼人情危駭莫有固志若一旦遷動使自瓦解江北亦豈可得至設令得至不過延日月耳今兵士雖少自足以一戰若其尅濟則臣主同休苟厄運必至我當以死衛社稷橫尸廟門遂其繇來以身許國之志不能遠竄於草間求活也我計決矣卿勿復言於是開賞募投身赴義者一同登京城之上科發居民治石頭城建牙誠嚴帝率劉毅諸葛長民北出拒之七月庚申群賊自蔡州南走還屯尋陽遣輔國將軍王仲德廣川太守劉鍾河間太守蒯恩追之帝還東府大治水軍皆大艦重樓高者十餘丈十月率兖州刺史劉藩寧朔將軍檀韶等舟師南伐以後將軍劉毅監

太尉畱守府後事皆委焉是月徐道覆率衆三萬寇江陵荊州刺史道規又大破之斬首萬餘級道覆走還淦口初帝之遣素邈也邈在道爲賊所斷道覆敗後方達自循東下江陵斷絕京邑之間傳者皆云已沒及邈至方知循走循初自蔡州南走畱其親黨范崇民五千人高艦百餘戍南陵王仲德等聞大軍且至乃進攻之十一月大破崇民軍焚其舟艦收其散卒循廣州守兵不以海道爲防是月建威將軍孫季高乘海奄至而城池峻整兵猶數千季高焚賊舟艦悉力而上四面攻之卽日屠其城循又以輕舟奔始興季高撫其舊民戮其親黨勒兵謹守初帝之遣季高也衆咸以海道艱遠必至爲難且分撤見力二二非要帝不從勅季高曰大軍十二月之交必破妖虜卿今時當至廣州傾其巢窟令賊奔走之曰無所歸投季高受命而行如期尅捷循方治兵艦設諸攻備帝欲御以長筭乃屯軍雷池賊揚聲不攻雷池當乘流逕下帝知其欲戰且慮賊敗或於京口入海遣王仲德以水艦三百於吉陽下斷之十二月循道覆率衆數萬方艦而下前後相抗莫見舳艫之際帝悉出輕利鬪艦躬提幡鼓命衆軍齊力擊之又上步騎埋

伏西岸右軍參軍唐樂生乘艦不進斬而徇之於是衆軍並踴騰爭先軍中多萬鈞神弩所至莫不摧陷帝中流蹙之因風水勢賊艦悉泊西岸上軍先備火具乃投火焚之煙焰張天賊衆大敗追奔至夜乃歸循等還尋陽初分遣步軍莫不疑怪及燒賊艦衆乃悅服召王仲德請還爲前驅留輔國將軍孟懷玉守雷池循聞大軍上欲走向豫章乃悉立柵斷左里帝攻柵而進循兵雖殊死戰弗能禁諸軍乘勝奔之循單舸走所殺及投水死凡萬餘人循收散卒尚有數千人逕還廣州帝旋自左里天子遣侍中黃門勞師於行所七年正月振旅於京師改授大將軍楊州牧二月盧循於番禺爲孫季高所破收餘衆南走劉藩孟懷玉斬徐道覆於始興交州刺史杜慧度斬盧循傳首京師八年四月以後將軍劉毅爲荊州刺史毅與帝俱舉大義興復晉室既有雄才大志厚自矜許與尚書僕射謝琨相結帝知毅不能居下終爲異端密圖之毅表求從弟交州刺史藩以爲副貳九月藩入朝帝收藩及琨並於獄賜死自表討毅壬午發自京師遣參軍王鎮惡襲江陵十月尅之毅及黨與皆伏誅十一月帝以西陽太守朱齡石爲益州刺史

衆伐蜀進帝大傳揚州牧九年二月乙丑至自江陵
初諸葛長民貪淫驕橫爲士民所患劉毅旣誅將謀
作亂帝密命左右壯士丁旡等自幔後出於坐拉殺
之死於牀側輿尸付廷尉并誅其弟黎民七月朱齡
石平蜀斬僞主譙縱傳首京師十年荊州刺史司馬
修之宗室之重又得江漢人心帝疑其有異志而修
之子樵王文思在京師招集輕俠帝執文思送還修
之令自爲其所修之表廢文思十一年正月帝收修
之子文寶次子文祖并於獄賜死率衆軍西討三月
軍次江陵修之奔襄陽四月帝復率衆進討至襄陽
修之奔姚興八月甲子至自江陵十二年三月加中
外大都督初帝平齊乃有定闕雒之意值盧循侵逼
故其事不諧荆雍旣平方謀外畧會姚興死子泓立
兄弟相殺關中擾亂帝乃戒嚴北討加領征西將軍
司豫二州刺史又加北雍州刺史九月次于彭城加
領徐州刺史先是遣冠軍將軍檀道濟龍驤將軍王
鎮惡步向許維羗緣道屯守皆望風降服僞兖州刺
史韋華先據倉垣亦率衆歸順帝又遣北兖州刺史
王仲德先以水軍入河仲德破索虜於東郡涼城進
平滑臺十月衆軍至雒陽圍金墉泓弟僞平南將軍

沈請降送于京師修復晉五陵置守衛天子以帝爲相國封宋公加九錫十三年正月帝以舟師進討二月檀道濟等次潼關三月庚辰大軍入河後魏步騎十萬營於河津帝命諸軍濟河擊破之帝至雒陽七月至陝城龍驤將軍王鎮惡伐木爲舟自河浮渭八月扶風太守沈田子大破姚泓於藍田王鎮惡尅長安生禽泓九月帝至長安長安豐稔帑藏盈積帝先收其燹器渾儀土圭之屬獻於京師其餘珍寶珠玉以班賜將帥執送姚泓斬於建康市十月進爵爲王十四年正月還京固讓進爵六月受相國宋公九錫之命十二月晉大司馬琅邪王卽位元熙元年徵公入輔又申前命進爵爲王七月乃受命二年四月徵王入輔六月至京師晉帝禪位於宋遂卽帝位孝武帝文帝第三子元嘉十二年立爲武陵王十六年爲湘州刺史十七年遷南豫州刺史並領石頭戍至二十八年爲江州刺史四郡諸軍事時綠江蠻爲寇文帝遣太子步兵校尉沈慶之等伐之使帝總統衆軍三十年正月帝出次西陽之五州會元句劭逆以帝爲征南將軍帝率衆入討荊州刺史南譙王義宣雍州刺史臧質並舉義兵四月辛酉次溧陽

勳業二
亥冠軍將軍柳元景前鋒至新亭脩建營壘甲子賊
劭親率衆攻元景大敗退走丙寅帝次江寧丁卯大
將軍江夏王義恭來奔表上尊號戊辰至於新亭己
巳卽皇帝位五月甲戌輔國將軍申坦克京城乙亥
輔國將軍朱脩之克東府丙申克定京邑劭及始興
王濬諸同逆並伏誅庚辰解嚴

南齊太祖高皇帝宋右軍將軍南泰山太守承之之
子年十三治禮及左氏春秋宋元嘉十七年大將軍
彭城王義康出鎮豫章承之領兵防守帝捨業南行
十九年竟陵蠻動文帝遣帝領偏軍討沔北蠻二十

一年伐魏至兵檻山並破走二十三年雍州刺史蕭
思話鎮襄陽啓帝自隨戍沔北討樊鄧諸山蠻破其
聚落初爲右軍中兵參軍二十七年魏軍圍汝南戍
主陳憲臺遣寧朔將軍臧質安蠻司馬劉康祖救之
文帝使帝宣旨授節度聞魏太武向彭城質等廻軍
救援至盱眙帝與質別軍主胡宗之等五軍步騎數
千人前驅魏主已潛過淮卒相遇於莞山下合戰賊
績緣淮奔退宗之等皆陷沒帝還就質固守爲虜所
攻圍甚危急事寧還京師二十九年領偏軍征仇池
梁州西界舊有武興戍晉隆安中沒屬氐武興西

有蘭臯戍去仇池二百里帝擊二壘皆破之遂從谷口入關未至長安八十里梁州刺史劉秀之遣司馬馬注助帝攻談堤城拔之虜僞河間公奔走虜救兵至帝軍力疲少乃燒城還南鄭襲爵晉興縣五等男孝建初除江夏王大司馬叅軍隨府轉太宰遷員外直閣中書舍人西陵王撫軍叅軍建康令新安王子鸞有盛寵簡選僚佐爲北軍中郎中兵叅軍母陳氏憂起爲武烈將軍復爲建康令中兵如故景和中除後軍將軍值明帝立爲右軍時四方反叛會稽太守尋陽王子房及東諸郡皆起兵加輔國將軍率衆東討至晉陽與賊前鋒將程捍孫曇瓘等戰一日破賊十二壘分軍定諸縣晉陵太守袁標棄城走東境諸城相繼奔散徐州刺史薛安都反彭城遣從子索兒寇淮陰山陽太守程天祚舉城叛徐州刺史申令孫又降徵帝討之時帝平東賊還又將南討出次新亭前軍已發而索兒自睢陵渡淮馬步萬餘人擊殺臺軍主孫耿縱兵逼前軍張永營告急明帝聞賊渡淮追帝往救之屯破釜索兒向鍾離永遣寧朔將軍王寬據盱眙遏其歸路索兒擊破臺軍王高走之於石鰲將西歸王寬與軍主任農夫先據白鶴澗張永遣

帝馳督寬索兒東要擊帝使不得前帝鼓行結陣直入寬壘索兒望見不敢發經數日索兒引軍頓石梁帝追之至葛冢候騎還云賊至帝乃頓軍引管分兩馬軍夾營外以待之俄頃馬步奄至又推火車數道攻戰相持移日乃出輕兵攻賊西使馬軍合擊其後賊衆大敗追奔獲其器仗進屯石梁澗北索兒夜遣千人來斫營營中驚帝臥不起宜令左右案部不得動須臾賊散帝議欲於石梁西南高地築壘通南道斷賊走路索兒果來爭之帝率軍擊破之賊馬自相踐藉死索兒走向鍾離帝追至黯黯而還除驍騎將

軍封西陽縣侯邑六百戶遷巴陵王衛軍司馬鎮會稽江州刺史晉安王子勛遣臨川內史張淹自都陽嶠道入三吳臺軍主沈思仁與僞龍驤將軍任皇德西參軍劉越緒各據險相守明帝遣帝領三千人討之夜舉火進軍賊望見恐懼未戰而走還除桂陽王征北司馬東海太守行南徐州事初明帝遣張永沈攸之以衆喻降薛安都安都引魏軍敗沈攸之於彭城淮南孤弱以帝爲假冠軍將軍持節都督北討前鋒諸軍事鎮淮陰泰始三年沈攸之吳喜北敗於睢口諸城戍大小悉奔歸虜遂退至淮北圍角城戍主

賈法度力弱不敵諸將勸帝渡岸救之帝不許遣軍
至高道慶將數百張弩浮艦淮中遙射城外虜弩一
發數百箭俱去虜騎相引避之乃命進戰城圍卽解
遷督南兖徐二州諸軍事南兖州刺史五年進督兖
青冀三州刺史六年除黃門侍郎領越騎較尉不拜
復授冠軍將軍留本任明帝嘗嫌帝非人臣相而民
間流言云蕭道成當爲天子明帝愈以爲疑遣冠軍
將軍吳喜以三千人北使令喜留軍破釜自持銀壺
酒封賜帝帝戎服出門迎卽酌飲之喜還明帝意乃
悅七年徵還京師部下勸勿就徵帝曰諸卿聞於見
事主上自誅諸弟爲太子稚弱作萬歲後計何圖他
族唯應速發事緩必見疑今骨肉相害非靈長之運
禍難將興方與卿等戮力耳拜散騎常侍太子左衛
率時帝世子以功當別封賴縣帝以一門二封固辭
不受詔許之加邑三百戶明帝遣詔爲右衛將軍領
衛尉加兵五百人與尚書令袁粲護軍褚淵領軍劉
劭共掌機事又別領東北選事尋解衛尉加侍中領
石頭戍軍事初明帝誅戮藩戚江州刺史桂陽王休
範以人馬獲全及蒼梧王立更有窺窬之望密與左
右閹人於後堂習馳馬招聚亡命元徽二年五月與

兵於尋陽收畧官民數日便辦衆二萬人騎五百匹發益口悉乘商旅船舫大雷戍主杜道欣鵠頭戍主劉讐期告變朝廷遣駭帝與護軍褚淵征北張永領軍劉劭僕射劉秉游擊將軍戴明寶騎將軍阮佃夫右軍將軍王道隆中書舍人孫千齡員外郎楊運長集中書省計議莫有言者帝曰昔上流謀逆皆因淹緩至於覆敗休範必懲前失急下乘我無備今應變之術不宜念遠若偏師失律則大阻衆心宜頓新亭白下堅守宮掖東府石頭以待賊千里孤軍後無委積求戰不得自然瓦解我請頓新亭以當其鋒征北可以見甲守白下中堂舊是置兵地領軍宜頓宣陽門爲諸軍節度諸貴安坐殿中左將軍諸人不須競出我自前驅破賊必矣因索筆下議並注同孫千齡與休範有密契獨曰宜依舊遣軍據梁山魯顯間右衛若不出白下則應進頓南州帝正色曰賊今已近梁山豈可得至新亭卽是兵衝所以欲死報國耳嘗乃可屈曲相從今不得也坐起帝顧謂劉劭曰領軍已同鄙議不可改易乃單車白服出新亭加帝使持節都督征討諸軍平南將軍加鼓吹一部治新亭城壘未畢賊前軍已至帝方解衣高臥以安衆心乃索

白虎幡登西垣使寧朔將軍高道慶羽林監陳顯達
員外郎王敬則浮舸與賊水戰自新林至赤岸大破
之燒其船艦死傷甚衆賊步上新林帝馳使報劉劭
悉開大小桁撥淮中船舫悉渡北岸休範乘肩輿率
衆至壘上遣寧朔將軍黃回馬軍主周盤龍將步騎
出壘對陣休範分兵攻壘東短兵接戰自己至午衆
皆失色帝曰賊雖多而亂尋破也楊運長領三齊射
手七百人引強命中故賊不得逼城未時張敬兒斬
休範首帝遣隊主陳靈寶送首還臺靈寶路中遇賊
軍埋首道側臺軍不見休範首愈疑賊衆亦不知休
範已死別率杜墨蠡急攻壘東司空主簿蕭惠郎數
百人突入東門叫噪至堂下城上守門兵披退帝挺
身上馬率數百人出戰賊皆推楯而前相去數丈分
兵橫射帝引蒲將發左右將戴仲緒舉楯杆之箭應
手飲羽傷百餘人賊死不能當乃却衆軍復得保城
與蠡拒戰自晡達明旦矢石不息其夜大雨鼓叫不
復相聞將士積日不得寢食軍馬夜驚城內亂走帝
秉燭正坐厲聲呵止之如是者數四賊帥丁文豪設
伏破臺軍於皂莢橋直至朱雀桁劉劭欲開桁王道
隆不從劭及道隆並戰沒賊進至杜姥宅車騎典籤

第恬開東府納賊冠軍將軍沈懷明於石頭奔散張
永於白下宮內傳新亭亦陷太后執蒼梧王手泣曰
天下敗矣帝遣軍主陳顯達任農夫張敬兒周盤龍
等從石頭濟淮間道從承明門入衛宮闕休範旣死
典籤許公輿詐稱休範在新亭士庶惶惑詣壘投名
者千數帝隨得輒燒之乃列兵登城北謂曰劉休範
父子先昨皆已卽戮屍在南岡下身是蕭平南諸軍
善見官軍等名皆已焚除勿有懼也臺分遣衆軍擊
杜姥宅宣陽門諸賊皆破平之帝振旅凱入百姓緣
道聚觀曰全國者此公也帝與袁粲褚淵劉秉引各
解職不許遷散騎嘗侍中領軍都督南兖徐青冀五
州諸軍事鎮軍將軍南兖州刺史持節如故進爵公
增邑二千戶帝固讓又與褚淵袁粲書述讓意淵粲
答書固勸乃受命帝欲分其功請益粲等戶四年加
尚書左僕射本官如故休範平後蒼梧王漸行凶暴
南徐州刺史建平王景素少有令譽朝野歸心景素
亦潛爲自全之計布欵誠於帝帝拒而不納七月羽
林監袁祗奔景素使舉兵帝出屯玄武湖遣衆軍北
討事平乃還帝威名旣重蒼梧深相猜忌幾加大禍
陳太妃罵之曰蕭道成有功於國今若害之後雖復

為汝著力者乃止帝密謀廢立五年七月戊子楊玉
 夫陳奉伯等二十五人殺蒼梧王持首送帝帝夜開
 承明門乘嘗所騎馬走入殿中殿中驚怖既知蒼梧
 王死咸稱萬歲己丑帝戎服出殿召袁粲褚淵劉秉
 等議迎立順帝甲午帝移鎮東府與粲等各甲仗五
 十人入殿丙申進位侍中司空錄尚書事驃騎大將
 軍封竟陵郡公邑五千戶給油幢輅車班劍三十人
 帝固辭上台即驃騎大將軍開府儀同三司庚戌進
 督南徐州刺史封楊玉夫等二十五人爵邑各有差
 十月戊辰又進督豫司二州初荊州刺史沈攸之與
 帝同直殿省申以歡好帝以長女妻攸之第三子文和帝既廢立攸
 之舉兵東下京師恐懼是歲十二月乙卯帝入居朝
 堂命諸將西討前湘州刺史王蘊太后兄子遭母喪
 罷任還至巴陵停舟一月與攸之密相交構還至東
 府期帝出弔帝既不出外謀愈固司徒袁粲尚書令
 劉秉見帝威權稍盛慮不自安與蘊相結舉事帝遣
 諸將攻石頭並禽斬之帝屯閱武堂馳結軍旅閏月
 辛丑詔假黃鉞率大衆出屯新亭中興堂治嚴築壘
 二年正月攸之攻郢城不克衆潰自經死傳首京邑
 丙子帝旋鎮東府二月癸未加太尉增封三千戶都

督南徐南兗徐兗青冀司豫荆雍湘郢梁益廣越十
 六州諸軍事帝解驃騎辭都督不許乃表送黃金三
 月已酉增班劍為四十人甲伏百八入殿丙子加羽
 葆鼓吹辛卯封帝為齊公備九錫之禮加璽綬遠遊
 冠位在諸王公上加相國綠綬授其驃騎大將軍楊
 州牧南徐州刺史如故三讓公卿敦勸固請乃受甲
 寅策相國齊公曰天地變通莫大乎炎涼懸象著明
 莫崇乎日月嚴冬播氣貞松之操自高光景時昏若
 華之暎彌顯是故英睿當亂而不回忠賢臨危而盡
 節自景和昏虐王綱弛紊太宗受命紹開中興運屬
 屯難四郊多壘肅將軍威寔資義烈康國濟民於是
 乎在朕以不造夙罹憫凶嗣君失德書契未絕威侮
 五行虔劉九縣神靈歇繹海水群飛彘器已塵宗禋
 誰主綴旒之殆未足為譬豈直小宛與刺黍離作歌
 而已哉天贊皇宋實啓明宰爰登寡昧纂茲大業鴻
 緒再維宏基重造高勳至德振古絕倫昔保衡翼殷
 博陸佐漢方斯茂如也今將授公典禮其敬朕命乃
 者袁鄧構禍臣欽若等曰袁顛鄧琬舉兵向闕實繁有徒子房不臣
臣欽若等曰尋陽王子房稱兵協亂跨蹈五湖憑陵
舉兵反齊公東討平之吳越浮侵虧辰沉氣晦景桴鼓振於王畿鋒鏑交乎

天邑顧瞻宮掖將成茂草言念邦國剪為仇讐當此

之時人無固志公投袂殉難超然奮發執金板而先

馳登寅車而戒路軍政端嚴卒乘輯睦麾鉞一臨凶

黨冰泮此則霸業之基勤王之始也安都背叛臣欽若等

日薛安都為徐州刺史引魏軍侵叛竊據徐方敢率犬羊陵虐淮滸索

兒愚悖臣欽若等曰索兒安都從子也攻淮陰齊公破走之同惡相濟天祚無

勇背順歸逆北鄙黔黎奄墜塗炭均人廢職邊師告

警公授命宗祊精貫朝日擁節私門氣踰霄漢破釜

之捷斬馘蔽野石梁之戰禽其渠師保境全民江陽

卽序此又公之功也張淹迷昧臣欽若等曰晉安王子節遣臨川內史張

吳齊公討之弗顧本朝爰自南區志圖東夏潛軍

間入竊覬不虞於時江服未夷皇塗荐阻而忠誠慷慨

在險彌亮深識九變妙察五色以寡制衆所向風

偃朝廷無東顧之憂閩越有來蘇之慶此又公之功

也匈奴野心侵掠疆場前師失律王旅摧撓灑血成

川伏尸千里醜羯併張勢振彭泗臣欽若等曰乘勝

長驅窺覲京甸冠帶之軌將湮被髮之容行及公奉

辭伐罪戒旦晨征兵車始交氛稜蕩滌弔死撫傷弘

宣皇澤俾我淮淝沾此盛化此又公之功也自茲厥

後儉稅孔熾封豕長蛇重窺上國而世故相仍師出

日老戰士無臨陣之心戎卒有懷歸之思是以下邳

精甲望風振恐甬城高壘指日淪陷公眷言王事發

憤忘食躬擐甲胄視險若夷短兵纒接巨猾鳥散分

疆畫界開創青交此又公之功也泰始之末入參禁

旅任兼軍國事同顧命桂陽負衆

臣欽若等曰桂陽王休範為江州刺

史舉兵向闕

輕問九鼎裂冠毀冕拔本塞原揮戈萬乘之

國頓戰象魏之下烈火焚於王城飛矢集於君幄機

變儵忽終古莫二群后憂惶元戎無主公按劍凝神

則奇謀貫世秉旄指麾則懦夫成勇曾不崇朝新亭

獻捷信宿之間宣陽底定雲霧廓清區宇康乂此又

公之功也皇室多難釁起戚藩刊晉應韓翻為警敵

建平失圖

臣欽若等曰建平王景素為南徐州刺史舉兵為自全之計

興兵內侮

公又指授六師義形乎色役未踰旬朱方寧晏此又

公之功也蒼梧肆虐

臣欽若等曰蒼梧王即後廢帝也

諸夏糜沸淫

刑以逞誰則無罪火炎崑崗玉石俱焚黔首相悲朝

不謀夕高祖之業已淪文明之軌誰嗣公遠稽殷漢

之儀近遵魏晉之典猥以耿躬入奉宗祏七廟濤謚

九區反正此又公之功也袁粲無質劉秉攜貳

臣欽若等

日司徒袁粲尚書令劉秉為黃回內應

韞述相扇成此亂階

臣欽若等日領軍劉

韞秉弟也

醜圖潛構危機竊發據有石頭志犯應路

升府元龜

閏位部

卷之百八十四

公神謨內運霜鋒外舉妖沴載澄國塗悅穆此又公

之功也沈攸之包藏禍釁臣欽若等曰攸之為荆歲州刺史舉兵攻郢城

月茲彰蜂目豺聲阻兵安忍哀彼荆漢獨為匪民乃

眷西顧緬同異域而經綸維始九伐未申長惡不悛

遂逞凶逆驅合奸回勢過虓虎朝野憂疑三軍沮氣

公秉鉞出關凝威江甸正情與皦日同亮明畧與秋

雲競爽至義所感人百其心轟鼓一麾黔首寧謐雲

梯未舉魯山尅定積年逋誅一朝顯戮沮浦安流童

臺從軌此又公之功也公有濟天下之勲重之以明

哲道庇生民志扶宇宙戮力一心劬勞王室自東阻

西靡有寧宴險阻難艱備嘗之矣若乃締構宗社之

勤造物資始之澤雲布霧散光被六幽弼予一人永

清四海是以秬草騰芳於郊園景星垂暉於清漢遐

方款關而慕義荒服重譯而來庭遐哉邈乎無得而

名焉朕聞疇庸表德前王盛典崇樹侯伯有國攸同

所以文命成功玄珪顯錫姬旦秉哲曲阜啓藩或改

玉以弘風或祚土以宣化禮絕甞班寵冠群辟爰逮

桓文車服異數惟公勲業超於先烈而褒賞闕於舊

章古今之道何其爽歟靜言欽歎良有缺然今進授

相國以青州之齊郡徐州之梁郡南徐州之蘭陵魯

郡琅邪東海晉陵義興揚州之吳郡會稽凡十郡封
 公為齊公錫茲玄土苴以白茅定爾邦家用建冢社
 斯實尚父故藩世作盟主紀綱侯甸率繇舊則社者
 周召建國師保兼任毛畢執珪入作卿士內外之寄
 同規在昔可命使持節兼太尉侍中中書監司空衛
 將軍雩都縣開國侯淵卽禘淵也授相國印綬齊公璽綬
 持節兼司空副守尚書令僧虔王僧虔也授齊公茅土金
 虎符第一至第五左竹使符第一至第十相國位總
 百辟秩踰三鉉職以禮移號隨革其以相國總百
 辟去錄尚書之稱送所假節侍中貂蟬中外都督太

傅太尉印綬竟陵公印策其驃騎大將軍揚州牧南
 徐州刺史如故又加公九錫其敬聽後命以公秉禮
 弘律儀刑區宇遐邇一體民無異業是用錫公大輅
 各一玄牡二駟公崇脩南畝所寶唯穀王府克實百
 姓繁阜是時錫公衮冕之服赤舄副焉公造物以義
 鎔鈞庶品罔不和悅是用錫公軒縣之樂六佾之舞
 公翼贊王猷聲教遠洽蠻夷竭款回首內附是用錫
 公朱戶以居公明鑒人倫澄辨涇渭官方與能英乂
 克舉是用錫公納陛以登公保佑皇朝厲身化下杜
 漸防萌含生寅式是用錫公虎賁之士三百人公禦

究以刑禦奸以德君親無將將而必誅是用錫公鉞
鉞各一公鳳舉四維龍騫八表威靈所振異域同文
是用錫公彤弓一彤矢百旅弓十旅矢千公明發載
懷肅恭禋祀孝敬之重義感靈祇是用錫公秬鬯一
卣珪瓚副焉齊國置丞相以下一遵舊式徃欽哉其
祇聽朕命經緯乾坤宏亮洪業安昭爾大德闡揚我
高祖之休命又詔齊公十郡之外隨宜除用齊國初
建給錢五百萬布五千疋絹千疋四月癸酉詔進齊
公爵爲王九月丙午進位假黃鉞都督中外諸軍事
太傅領揚州牧劔履上殿入朝不趨贊拜不名置左

右長史司馬從事中郎椽屬各四人使持節太尉驃
騎大將軍錄尚書南徐州刺史如故固辭詔遣敦勸
乃受黃鉞辭殊禮甲寅給三望車三年正月丁巳命
太傅府依舊辟召丁卯給甲仗五百人出入殿省甲
午重申前命劔履上殿入朝不趨贊拜不名三月甲
辰增封陳郡潁川陳畱南兗州之盱眙山陽秦郡廣
陵南沛十郡改立王社丙戌命齊王冕十有二旒建
天子旌旗出警入蹕乘金根車駕六馬備五時副車
置旄頭雲竿樂舞八佾設鍾簋宮縣王世子爲太子
王女孫爵命一如舊儀辛卯宋帝禪位甲午遂卽皇

帝位

世祖武皇帝高帝長子初仕宋爲尋陽國侍郎辟州西曹書佐出爲贛令江州刺史晉安王子勛反帝不從命南康相沈肅之繫帝於郡獄族人蕭欣祖門客桓康等破獄迎出帝肅之率將吏數百人追擊帝與左右拒戰生獲肅之斬首百餘級遂率部曲百餘人舉義兵始與相殷孚將萬兵赴子勛於尋陽或勸帝擊之帝以衆寡不敵避屯揭陽山中聚衆至三千人子勛遣其將戴凱之爲南陽相及軍主張宗之千餘人助之帝引兵向郡擊凱之別軍主程超數百人於南康口又進擊宗之破斬之遂圍郡城凱之以數千人固守帝親率將士盡日攻之城陷凱之奔走殺僞贛令陶冲之帝卽據郡城遣軍主張應期鄧惠貞三千人襲豫章子勛遣軍主談秀之等七千人與應期相拒於西昌築營壘交戰不能決聞帝將自下秀之等退散事平徵爲尚書庫部郎征北中兵參軍元徽四年累遷晉熙王鎮西長史江夏內史行郢州事順帝立徵晉熙王燮爲撫軍揚州刺史以帝爲左衛將軍輔燮俱下沈攸之事起未得朝廷處分帝以中流可以待敵卽據益口城爲戰守之備高帝聞之喜曰

此真我子也帝表求西討不許乃遣偏軍援郢平西將軍黃回等皆受帝節度加冠軍將軍持節昇明二年事平轉散騎常侍都督江州豫州之新蔡晉熙二郡軍事任虜將軍江州刺史封聞喜縣侯二千戶其年徵侍中領軍將軍尋加督京畿諸軍事三年加尚書僕射中軍大將軍開府儀同三司進爵為公給班劍二十人齊國建為世子高帝即位為皇太子建元四年三月即皇帝位

府元龜

册府元龜

巡按福建監察御史臣李嗣京訂正

新建縣舉人 臣戴國士參閱

知建陽縣事 臣黃國琦較釋

閩位部 四

勳業第三

梁高祖武皇帝南齊丹陽尹順之子博學多通好著畧有文武才幹時流名輩咸推許之起家巴陵王中郎法曹行叅軍遷衛軍王儉東閣祭酒竟陵王良開西邸招文學帝與沈約筆號為八友累遷隨

鎮西諮議參軍時順之征魚復侯子響於射堂繼殺
之後齊武既憶子響順之慙懼感病遂以憂卒及
林王失德齊明帝作輔將爲廢立計帝欲助齊明
齊武之嗣以雪先恥齊明亦知之每與帝謀時齊
將追隨王恐不從又以王敬則在會稽恐爲變以問
帝帝曰隨王雖有美名其實庸劣既無智謀之士爪
牙唯仗司馬垣歷生武陵太守下白龍耳此輩唯利
是與若啗以顯職無不載馳隨王止須折簡耳敬則
志安江東窮其富貴宜選美女以娛其心齊明日亦
吾意也卽徵歷生爲太子左衛率白龍游擊將軍並
至續召隨王至都賜自盡豫州刺史崔慧景卽齊
舊臣不自安齊明憂之乃起帝爲寧朔將軍鎮壽陽
外聲備魏實防慧景師次長瀨慧景待罪白服來迎
帝撫而宥之將軍房伯玉徐玄慶竝曰慧景反跡既
彰實是見賊我曹武將譬如韝上鷹將軍一言見命
便卽制之帝笑曰其如掌內嬰兒殺之不武於是曲
意和釋之慧景遂安隆昌元年歷太子庶子中書黃
門侍郎入直殿省建武二年後魏遣劉昶王肅率衆
寇司州以帝爲冠軍將軍軍主隸江州刺史王廣之
爲援距義陽百餘里衆以魏軍盛莫敢前帝欲大

威畧謂諸將曰今屯下梁州城塞鑿峴之險守雉廓
 之路據賢首之山以通西關以臨賊壘三方犄角出
 其不備破賊必矣廣之等不從後遣徐玄慶進據賢
 首山魏絕其糧道衆懼莫敢援唯帝獨奮請先進於
 是廣之益帝精甲啣枚夜前失道望見如持兩炬者
 隨之果得道徑上賢首山廣之軍因得前魏軍來騰
 帝堅壁不進時王肅自攻城二鼓而退劉昶有疑心
 帝因與書間成其隙一旦有風從西北起陣雲隨之
 來當肅營尋而風迴雲轉向西北帝曰此所謂歸氣
 魏師遁矣令軍中曰望麾而進聽鼓而動肅乃傾壁
 十萬陣水北帝揚麾鼓譟響振山谷效死之士執旗
 兵先登長戟翼之城 中見援至因出軍攻魏柵軍表
 裏受敵因大敗肅昶單馬走斬獲千計流血絳野得
 肅昶巾箱中魏帝勅曰聞肅昶善用兵勿與爭鋒待
 吾至若能擒此人則江東吾有也軍罷以帝為右軍
 晉安王司馬淮海大守遷太子中庶子領羽林監屬
 之出鎮石頭四年魏帝自率大衆寇雍州明帝令帝
 赴援十一月至襄陽詔又遣左民尚書崔慧景總督
 諸軍帝及雍州刺史曹武等並受節度五年三月慧
 景與帝進行鄧城魏主率十萬餘騎奄至慧景失色

欲引退帝固止之不從乃狼狽自拔魏騎乘之於是大敗帝獨率衆距戰殺數千百人魏騎稍却因得結陣斷後至夕得下船慧景軍死傷畧盡唯帝全師歸俄以帝行雍州事十月授持節都督雍梁南北徐泗州郢州之竟陵司州之隨郡諸軍事輔國將軍雍州刺史其年東昏卽位揚州刺史始安王遙光尚書令徐孝嗣尚書右僕射江祐侍中江杲衛尉劉暄更直內省分日帖勅帝聞之謂從舅張弘策曰政出多門亂其階矣詩云一國三公吾誰適從况今有六而可得乎嫌隙若成方相誅滅當今避禍唯有此地勤行仁義可坐作西伯諸弟在都恐罹世患須與益州圖之耳時帝長兄懿罷益州還仍行郢州事乃使張弘策詣郢陳計於懿曰昔晉惠庸主諸王爭權遂內難九興外寇三入今六貴爭權人握王憲制主畫勅各欲專威睚眦成憾屢相屠滅且嗣主在東宮本無令譽媒近左右蜂目忍人一總萬機恣其所欲豈肯虛坐主緒委政朝臣積相嫌貳必大誅戮始安欲爲趙倫形迹已見蹇人上天信無此理且性甚猜狹徒取亂基所可當輔唯有江劉而已祐怯而無斷暄弱而不才折鼎覆餗超足可待蕭坦胸懷猜忌動言相傷徐

今得守外藩幸圖身計智者見機不俟終日及今精防未生宜召諸弟以時聚集後相防疑投足無路鄂州控帶荆湘西注漢沔雍州士馬呼吸數萬獸視其間以觀天下世治則竭誠本朝世亂則爲國剪暴可得與時進退此蓋萬全之策如不早圖悔無及矣懿聞之變色心未之許弘策還帝乃啓迎弟偉及儋是歲至襄陽於是潛造器械多伐竹木沈於檀溪密爲舟裝之備永元二年冬懿被害信至帝密召長史王茂中兵呂僧珍別駕柳慶遠功曹史吉士瞻等謀之既定以十一月乙巳僚佐集於廳事謂曰昔武王會孟津皆曰紂可伐今昏主惡稔窮虐極暴誅戮朝野罕有遺育生民塗炭天命殛之卿等同心疾惡共興義舉公侯將相良在今日各盡勳効我不食言是日建牙於是收得甲士萬人馬千匹船三千艘出檀溪竹木裝艦先是東昏以劉山陽爲巴陵太守配精兵三千使過荊州就行州事蕭穎胄以襲襄陽帝知其謀乃遣叅軍王天獸龐慶國詣江陵徧與州府人書及山陽西上帝謂諸將曰荊州本畏襄陽人如唇亡齒寒自有傷弦之急寧不聞同邪我若總荆雍之兵

掃定江夏韓白重出不能為計况以無筭之昏主役御應勅之徒哉我能使山陽至荆便即授首諸君試觀何如及山陽至巴陵帝復令天獸齋書與穎胃兄弟去後帝謂張弘策曰夫用兵之道攻心為上攻城次之心戰為上兵戰次之今日是也前遣天獸征州府人皆有書今改乘驛甚急只有二封與行事兄弟云天獸口具及問天獸而口無所說行事不得相聞不容妄有所道天獸是行事心膂彼聞必謂行事與天獸共隱其事必人人疑山陽惑於眾口判相嫌貳則行事進退無以明必漏吾謀是馳兩空函定一

州矣山陽至江安聞果疑不上穎胃大懼乃斬天獸送首山陽信之將數十人馳入穎胃伏甲斬之送首於帝仍以南康王尊號之識來告且曰時月未利當須來年二月據便進兵恐非廟筭帝答曰今坐甲十萬糧用自竭况所籍義心一時驍銳事事相接猶恐疑怠頓兵十旬必生悔吝兒童立異便大事不成今太白出西方伏羲而動天時人謀有何不利處分已定安可中息昔武王伐紂行逆太歲復須待年月乎竟陵太守曹景宗遣杜思冲勸帝迎南康都襄陽時正尊號然後進軍帝不從王懋又私於張弘策曰我

奉事節下義無進退今者以南康置人手中彼便放
天子以令諸侯而節下前去為人所使此豈歲寒之
計弘策言之帝曰若使前途大事不捷故自爾艾同
焚若功業克建威讐四方號令天下誰敢不從豈是
碌碌受人處分至石城當面曉王茂曹景宗也於沔
南立新野郡以集新附二年二月南康王為相國以
帝為征東將軍給鼓吹一部戊申帝發襄陽留弟偉
守襄陽城總州府事愔守壘城府司馬莊丘黑守樊
城功曹吏吉士詢兼長史白馬戍主黃嗣祖兼司馬
郡令杜永兼別駕少府錄事郭儼知轉漕移檄京邑

曰夫道不嘗夷世無永治險泰相沿晦明非一皆因
屯困而復亨資多難以啓聖故昌邑悖德孝宣聿興
海西亂政簡文舛歷並拓緒開基紹隆保命理驗前
經事昭往策獨夫擾亂天嘗毀棄君德姦回淫縱歲
月滋甚挺虐於鬢剪之年植險於髻卹之日猜忌何
毒觸途而著暴戾昏荒與事而發自大行告漸喜容
見前梓宮在殯醜無哀色懽娛遊宴有過平嘗奇服
異衣更極夸麗至於選採妃嬪姊妹無別招侍巾櫛
姑姪莫辨掖庭有裨敗之名姬姜被于及之服至乃
形體宣露褻衣顛倒斬斫其間以為懽笑聘肆淫靡

驅屏郊邑老弱波流士女途炭行產盈路輿尸竟道
母不及抱子不遑哭劫掠剽虜以日繼夜晝伏宵遊
曾無休息沉浮酌營縱歌墟邸寵恣愚豎亂惑妖孽
梅虫兒茹法珍滅獲斯小專制威柄誅剪忠良屠滅
卿宰劉鎮軍舅氏之尊盡忠報國江僕射外戚之重
竭誠事上蕭領軍葭苾之宗志存柱石徐司空沈僕
射縉紳冠冕民望攸歸或涓陽餘感或勲庸允穆或
誠著艱難或勤勞王室竝受遺託同參顧命送往事
居俱竭心力宜其慶溢當年祚隆後裔而一朝蓬粉
孩稚無遣人神怨結行路嗟憤蕭令公幹世之才識

貫幽顯往年寇賊遊魂南鄭危逼拔办飛泉孤城獨
振及中流逆命憑陵京邑謀猷禁省指授羣帥尅剪
鯨鯢清我王度崔慧景奇鋒迅駭兵交象魏武士喪
魂義夫奪膽投名送款比屋交馳負粮景從愚智競
赴復誓旅江甸奮不顧身獎勵義徒電掩強敵克殲
大憝以固皇基功出桓文道過伊呂而勞謙自己事
昭心迹功遂身退不祈榮滿敦賞未聞禍酷遙及預
稟精靈孰不寃痛而羣孽放命蜂蠆懷毒乃遣劉山
陽驅扇逋逃招逼亡命潛圖密構規見掩襲蕭右軍
夏侯征虜忠斷夙舉義形於色奇謀宏振應手梟懸

天道禍淫罪不容戮悖禮違教傷化虐民射天彈路
比之猶善剝胎斫腦方之非酷盡寓縣之竹未足紀
其過窮山澤之兔不能書其罪自草昧以來圖牒所
紀昏君暴后未有若斯之甚者也既人神乏主宗社
阡危海內沸騰士庶波蕩百姓懍懍如摧厥角蒼生
喁喁投足無地幕府荷眷前朝義均休戚上懷委付
之重下惟在原之痛豈可臥薪引火坐觀傾覆至尊
體自高宗特鍾慈寵明並日月粹照神靈祥啓元龜
符驗當壁作鎮侯潘化流西夏謳歌攸奉萬有樂推
右將軍穎胄征虜將軍夏侯祥並同心翼戴卽宮舊
楚三靈再卽九縣更新升平之運此焉復始康哉之
盛在乎茲日然帝德雖彰區宇大定元惡未黜天邑
猶梗仰稟宸規率前啓路卽日遣冠軍將軍竟陵內
史曹景宗等率二十軍主長梁五萬驥騾爲群鴉視
爭先龍驤並驅步出橫江直指朱雀長史冠軍將軍
襄陽太守王茂等率三十軍主戈船七萬乘流電激
摧鋒拒險斜趣白城南中郎諮議參軍蕭偉等三十
九軍主巨艦迅楫衝波噎水旗鼓八萬焱集石頭南
中郎諮議參軍軍主蕭憺等四十二軍主熊羆之士
甲楯十萬沿波馳艦掩據新亭益州刺史劉李連梁

太守韋叡新城太守崔僧季肅奉明詔恭行天討屬
漢果鏡汭流而下淮汝勁勇望波遙驚幕府總率貔
貅驍勇百萬繕甲燕弧屯兵冀馬縱金拂地鳴鞞聒
天霜鋒曜日朱旗絳寓方舟千里絡繹繼進蕭右軍
許謨上才兼資文武英略峻遠執鈞輔世擁荆南之
衆董四方之師宣讚中權奉衛輿輦旌旄所指威稜
無外龍驤獸步並集建業黜放愚狡均扎海昏廓清
神甸掃定京宇警猶雀太山而注燦燼豈有不殄滅
者哉今資斧所加止虫兒法珍而已諸君或世胄羽
儀書勲王府皆俛眉姦黨受制旬威若能因變立功
轉禍爲福並誓河岳永紓霄紫若執迷不悞無迎王
師大衆一臨刑茲罔赦所謂火烈高原芝蘭同根勉
求多福無貽後悔賞罰之科有如白水帝至竟陵命
長史王茂與太守曹景宗爲前軍中兵參軍張法安
守景陵城茂等至漢口輕兵濟江逼郢城其刺史張
冲置陣據石橋浦義師與戰不利軍主朱僧起走之
諸將議欲併軍圍郢分兵襲西陽武昌帝曰漢不關
一里箭道交至房僧寄以重兵固守爲郢城犄角若
悉衆前進賊必絕軍後一朝爲阻則悔無及今欲遣

王曹諸軍濟江與荊州軍相併以逼賊壘吾自後
魯山以通沔漢應城竟陵間乘方舟而下江陵湘中
之兵連旗接办資糧旣廣士衆稍多圍守兩城不攻
自拔天下之事臥取之耳諸將皆曰善乃命王茂曹
景宗帥衆濟岸進頓九里其日張冲出軍迎戰茂等
邀擊大破之皆棄甲奔走荊州遣冠軍將軍鄧元起
軍主王世興田安等數千人會大軍於夏首帝築漢
口城以守魯山令水軍主張惠紹朱思遠等遊遏中
江絕郢魯二城三月乃命元起進軍南堂西渚田安
之頓城北王世興頓曲水故城是月南康王卽帝位
於江陵改元爲中興元年遷廢東昏爲涪陵王以帝
爲尚書左僕射加征東將軍都督征討諸軍事假黃
鉞西臺又遣冠軍將軍蕭穎達領兵會於軍四月帝
出沔命王茂蕭穎達等進軍逼郢城元嗣屢戰頻北
因不敢出諸將議欲攻之帝不許五月東昏遣寧朔
將軍吳子陽軍主光子衿等三十軍救郢州進據巴
口六月西臺遣衛尉席闡文勞軍齋蕭穎胄等議請
帝曰今頓兵兩岸不併軍圍郢定西陽武昌取江州
此機已失莫若請救於魏與連和猶爲上策帝謂
文曰漢口路通荆雍控引秦梁糧運資儲聽此氣

所以兵壓漢口連給數州今日併軍圍城又分兵前進曾山必阻沔路所謂搯喉若糧運不通自然離散何謂持久鄧元起近欲以三千兵往定尋陽彼若憚然悟機一酈生亦足脫拒王師故非三千能下進退無據未見其可西陽武昌取便得耳取得便應鎮守守兩城不減萬人糧儲稱是卒無所出脫賊軍有上者萬人攻一城兩城勢不能相救若我分軍應援則首尾俱弱如其不遣孤城必陷一城既沒諸城相次土分天下大事於是去矣若郢州既被席卷沿江西陽武昌自然風靡何遽分兵散衆自貽其憂且丈夫

舉動言靜天步况擁數州之兵以誅群豎懸河注火奚有不滅豈容北面請救以自示弱彼未必能信從貽我醜聲此之下計何謂上策卿爲我白鎮軍前途攻取但以見付事在目中無患不捷借鎮軍靖鎮之耳吳子陽等進軍武昌帝乃命軍主梁天惠蔡道據漁湖城唐循期劉道晏屯陽壘夾兩岸而待之子陽又進據加湖去郢城三十里傍山帶水築壘柵自固曾山城主房僧寄死其衆復推助防張樂祖代之七月帝命王茂帥軍主曹冲宗康綸武會超等濟師襲加湖將逼子陽水涸不通艦其夜暴長衆軍乘

流齊進鼓噪之賊俄而大潰子陽等竄走衆盡溺於江王茂虜其餘而旋於是郢魯二城相視奪氣先是東昏遣冠軍將軍陳伯之鎮江州爲子陽等聲援帝乃謂諸將曰夫征討未必須實力所聽威聲耳今加湖之敗誰不弭服陳虎牙乃伯之子狼狽奔歸彼門人情理當恟懼我謂九江傳檄可定也因命搜所獲俘囚得伯之軍主蘇隆之厚加賞賜使致命焉魯山城主張樂祖郢城主程若薛元嗣相繼請降初郢城之間將佐文武男女口十餘萬人疾疫流腫死者十七八及城開帝並加隱恤其死者命棺槨先是汝南人胡文超起義於尋陽求討義陽安陸等郡以自衛帝又遣軍主唐循期攻隨郡並克之司州刺史王僧景遣子貞孫入質司部悉平陳伯之遣蘇隆反命求便進軍帝曰伯之此言意懷首鼠及其猶豫急往逼之計無所出勢不得異乃命鄧元起帥衆即日浚流討之八月天子遣兼黃門郎蘇因勞軍帝至鄧州命諸軍以次進路留上庸太守韋獻守郢城行州事鄧元起至尋陽陳伯之猶猜懼乃收兵退保湖口留其子虎牙守湓城及帝至乃束甲請罪九月天子詔齊平定東夏並以便宜從事是月留府長史鄭紹叔守

江州前軍次蕪湖南豫州刺史甲冑棄姑熟走大軍
追據之仍遣曹景宗蕭穎達領馬步進頓江寧東晉
遣征虜將軍李居士帥步軍迎戰景宗擊走之於是
王茂鄧元起呂僧珍進據赤鼻邏曹景宗陳伯之
遊兵是日新亭城主江道林率兵出戰衆軍擒之於
陣大軍次新林命王茂據越城景宗據皂莢橋鄧元
起據道士墩陳伯之據籬門道林餘衆退屯航南
軍迫之因復散走退保朱雀憑淮以自固時李居士
猶據新亭壘請東昏燒南岸邑屋以開戰場自大江
以西新亭以北蕩矣十月東昏石頭軍主朱僧勇率
水軍二千人歸降東昏又遣征虜將軍王珍國帥軍
主胡虎牙等列陣於航南大路悉配精手利器尚十
餘萬人閩人王張子持白虎幡督帥諸軍又開航背
水以絕歸路王茂曹景宗等犄角奔之將士皆殊死
戰無不一當百鼓噪震天地珍國之衆一時土分
淮死者積尸與航等後至者乘之以濟於是朱雀諸
軍望之皆潰散義軍追至宣陽門李居士以新亭
徐元瑜以東府城降石頭白下諸軍並宵潰壬午帝
鑄石頭命衆軍圍六門東昏悉焚燒門內驅逼營
官府竝入城有衆二十萬青州刺史相和詒東昏

戰因以其衆來降帝命諸軍築長圍初義師之逼東昏遣軍主左僧慶鎮京口甞僧景鎮廣陵李叔獻屯瓜步及申胄自姑熟奔歸又使屯破墩以爲東北聲援至是帝遣使曉喻並率衆降乃遣弟輔國將軍秀鎮京口輔國將軍恢屯破墩從弟寧朔將軍景鎮廣陵吳郡太守蔡寘棄郡赴義十二月丙寅旦兼衛尉張稷北徐州刺史王珍國斬東昏送義師帝命呂僧珍勒兵封府庫及圖籍收嬖妾潘妃及洵黨王暉之以下四十八人屬吏誅之宣德皇后全追廢涪陵王爲東昏侯依漢海昏侯故事授帝中書監都督揚南

徐二州諸軍事大司馬錄尚書驍騎大將軍揚州刺史封建安郡開國公邑萬戶給班劍四十人依晉武陵王遵承制故事百僚致敬二年正月壬寅詔進大司馬都督中外諸軍事劔履上殿入朝不趨贊拜不名加前後部羽葆鼓吹置左右長史司馬從事中郎掾屬各四人并依舊辟土餘並如故甲寅詔大司馬進位相國總百揆揚州牧封十郡爲梁公詔曰夫日月麗天高明所以表德山岳紀地柔博所以成功故能庶物出而資始河海振而不洩二象貞觀代之者人是以七輔四叔致無爲於軒昊韋彭齊晉靖表

於殷周大司馬有縱自天體茲齊聖文治九功武包
 七德欽惟厥始徽猷早樹誠著艱難功參帷幕錫賦
 開壤式表厥庸建武升曆邊隙屢啓公釋書輟講經
 營四方司豫懸切樊漢危殆覆強冠於馮濱僵胡馬
 於鄧汭永元肇號難結群醜專威擅虐被毒含靈溥
 天惴惴命懸晷刻否終有期神謨載挺首建大策惟
 新鼎祚投袂勤王汭流電舉魯城雲撒夏首霧披加
 湖羣豎一鼓殄板姑熟連旌條焉冰泮取新壘其如
 拾撲朱雀其猶掃霆雷外駭省闈內傾餘醜織蠹妖
 蝻必盡援彼已溺解此倒懸塗歡里忭自近及遠業

甸夷穆方外肅寧解茲虐紐被以寬政積弊窮昏一
 朝載廓聲教遐漸無思不被雖伊尹之執茲一德輝
 旦之光於四海方斯茂如也昔呂望翼佐聖君猶享
 四履之命文侯立功平后尚荷二弓之錫况於盛德
 元勳超邁自古黔首懔懔待以為命救其已焚極其
 方溺式問表墓未或能比而大輅渠門輟而莫授奉
 言前訓無忘終始便宜敬升大典式允羣望其遷位
 相國總首揆揚州牧封十郡為梁公備九錫之禮加
 璽綬遠遊冠位在諸王上加相國緣整綬其驥駟大
 將軍如故依舊置梁百司策曰二儀寂寞由寒暑而

化行三才並用資立人以為實故能流行品物代
天工允茲元輔應期挺秀裁成天地之功幽協神
之德撥亂反正濟世寧民盛烈光於有區茂勳振於
無外雖伊陟之保又王家姬公之有此丕訓方之
如也今將授公典策其敬聽朕命上天不造難錄皇
室世祖以休明卑世世宗以仁德不嗣高宗襲統寔
居弗維夙夜勤勞而隆平不洽嗣君昏暴書契弗
朝權國柄委之群孽勦戮忠賢誅殘台輔含冤抱
噍類靡餘實繁非一並專國命頻笑致災睚眦及
嚴科毒賦載離比屋溥天熬熬寘身無所冤頸引

道樹相望無近無遠號天靡告公籍昏明之期因
民之願援帥聖后翊成中興宗社之危已固天人之
望允塞此實公紐我絕綱大造皇家者也永明季年
邊隙大啓荆河連牽招引戎荒江淮擾逼勢同屢屢
公受言本朝輕兵赴襲靡以長筭制之環中排危冒
險疆柔遁用坦然一方還成藩服此又公之功也在
昔隆昌洪基已謝高宗慮深社稷將行權道公定策
帷帳激揚大節廢帝立王謀猷深著此又公之功也
建武開業厥猷雖遠戎狄內侵憑凌闕塞司部危
淪陷指期公治兵遠討卷甲長驚拒於交綏電激

掃摧堅覆銳咽水塗原執俘象魏獻賊海渚焚虜
帳號哭言歸此又公之功也樊漢貼切羽書續至公
星言鞠旅稟命徂征而軍機戎統事非已出善策嘉
謀抑而莫允鄧城之役胡馬卒至元帥潛及不相
告棄甲捐師餌之虎口公南收散卒北禦雕騎令衆
方執案路徐歸拯我邊危重獲安堵此又公之功也
漢南翹弱咫尺勁寇兵糧蓋闕棄甲靡遺公作藩
始因資靡託治兵訓卒蒐狩有序俾我危城翻爲
鎮此又公之功也永元紀號瞻烏已及雖廢昏有典
而伊霍稱難公首建大策爰立明聖義踰邑綸勳高
代入易亂以治俾昏作明此又公之功也文王之功
雖被江漢京邑蠢蠢漂爲洪流句吳於越巢幕匪喻
公投袂萬里事惟極溺義聲所覃無思不躋此又公
之功也魯城夏汭梗據中流乘山置壘榮川自固公
御此烏集凌茲地險頓兵坐甲寒徃暑移我行永久
士志歸願經以遠圖御以長策費無遺矢戰未窮兵
踐華之固相望俱拔此又公之功也惟此羣公同志
相濟緣江負險蟻聚加湖水陸盤據規援夏首桴會
一臨應時禱瀆此又公之功也姦孽震惶復懷舉斧
蓄兵九派用擬勤王公稜威直指勢喻風電旌號未

臨全州稽服此又公之功也姑熟衝要密邇京畿何
徒熾聚斷塞津路公偏師啓塗排方繼及兵威所震
望旗自駭焚舟委壁卷甲宵遁此又公之功也羣豎
猖狂志在借一

左傳云背城借一借以一戰也

豕突淮浹武騎如雲

公爰命英勇圖機騁銳氣冠陂泉勢踰洹水追奔逐
北奄有通津熊耳比峻未足云擬睢水不流曷其能
匹此又公之功也琅琊石首襟帶岨固親壘東庸全
湯是埒憑險作守兵食兼資風激電駭莫不震疊城
復于隍於是乎在此又公之功也獨夫昏狠憑城虜
懼鼓鍾鏜鞳傲若有餘狎是邪孽忌斯冠冕旬徒因
之將逞孥戮公竒謀密運盛畧潛廻忠勇之徒得申
厥效白旗宣室未之或比此又公之功也公有拯危
兆之勲重之以明德爰初勵志服道儒門濯纓來仕
清猷映世時運艱難宗稷危殆崑崗已燎玉石同焚
驅率貔貅柳揚霆電義等南巢功齊牧野若夫禹功
寂寞微管誰嗣拯其將魚驅其被髮解茲亂網理此
棼絲復禮衽席返樂河海永平故事聞之者難息司
執舊章見之者隕涕請我民命還之斗極惻惻縉紳
重荷戴天之慶哀哀黔首復蒙履地之恩德踰崑崙
功隣造物超哉邈矣無得而言焉朕又聞之嘻庸命

德建侯作屏咸用克固四維永隆萬業是以二南流
化九伯斯征王道淳洽刑措罔用霸政弗興歷之永
久如燬既及晉鄭靡依惟公經綸天地寧濟區夏道
冠乎伊稷賞薄於桓文豈所以憲章齊魯長燮宇宙
敬惟前列朕甚懼焉今進授相國改揚州刺史爲牧
以豫州之梁郡歷陽南徐州之義興揚州之淮南宣
城吳興會稽新安東陽十郡封公爲梁公錫茲白土
苴以白茅爰定爾邦建茲冢社在昔日與入居保佐
逮於畢毛亦作卿士任兼內外禮實宜之今命使持
節兼太尉王亮授相國揚州牧印綬梁公璽綬使持
節兼司空王志授梁公茅土金虎符等第一至第五
左竹使符第一至第十左相國位冠羣后任總百司
賞典彝數宜與事革其以相國總百揆去錄尚書之
號上所假節侍中貂蟬中書監印中外都督大司馬
印綬建安公印策驃騎大將軍如故又加公九錫其
敬聽後命以公禮律兼脩刑德備舉哀矜折獄罔不
用情是用錫公大輅各一玄牡二駟公勞心稼穡念
在民天丕崇務本惟穀是寶是用錫公兗冕之服赤
舄副焉公鎔均所被變風以雅易俗陶民載和邦國
是用錫公軒懸之樂六佾之舞公文德廣覃義聲遠

洽堆髻髮首夷歌請吏是用錫公朱戶以居公揚清
抑濁官方有序多士聿興棫樸流詠是用錫公納陛
以登公正色御下以身範物式遏不虞折衝惟遠是
用錫公虎賁之士三百人公威同夏日志清姦宄方
命圮族刑茲罔赦是用錫公鈇鉞各一公跨躡嵩溟
凌厲區宇辟諸日月容光必至是用錫公彤弓一彤
矢百茲弓十茲矢千公永言惟孝至誠通神恭嚴祀
典祭有餘敬是用錫公秬鬯一卣圭瓚副焉梁國置
丞相以下一遵舊式欽哉其敬循往策祇服大禮對
揚天眷用膺多福以弘我太祖之休命梁公固辭府

僚勸請乃受二月丙戌詔曰嵩高惟嶽配天所以流
稱大啓南陽霸德所以光闡忠誠簡帝裔君膺上壽
之尊勤勞王室姬公增附庸之地前王令典布諸方
策長世宇氓罔不繇此相國梁公體茲上哲齊聖廣
淵文教內洽武功外暢推轂作藩則威懷被於殊俗
治兵教戰則雷霆赫於萬里道喪時昏邪說孔熾豈
徒宗社如綴神器莫主而已哉至於兆庶殲亡衣冠
殄滅餘類殘喘指命崇朝舍生業業投足無所遂乃
山川反覆草木塗地與夫仁被行葦之時信及豚魚
之日何其遼邈相去之遠歟公命師鞠旅指景長

而本朝危切樊鄧遐遠凶徒盤據水陸相望爰自掃
熟屆於夏首嚴城勁卒憑川為固泐漢浮江電激風
掃舟徒水覆地險雲傾藉茲義勇前無強陣拯危京
邑清我帝畿撲既燎於原火免將誅於比屋悠悠兆
庶命不在天茫茫六合咸受其賜易俗正本民不失
職仁信並行禮樂同暢伊周末足方軌桓文遠有勲
德而爵後藩牧地約秦楚非所以式酬茂烈允答元
勲實繇公履謙為本形於造次加數未申晦朔增位
便宜崇斯禮秩允副遐邇之望可進梁公爵為主以
豫州之南譙廬江江州之尋陽郢州之武昌西陽南
徐州之南琅瑯南東海晉陵揚州之臨海永嘉十郡
益梁國并前為二十郡其相國揚州牧驃騎大將軍
如故公固辭有詔斷表相國左長史王營等率百僚
敦請三月丙午命王冕十有二旒建天子旌旗出警
入蹕乘金根車篤六馬備五時副車置旄頭雲罕樂
舞八佾設鍾簋宮懸王妃子王女爵命之號一依舊
儀四月丙寅遂受齊禪即皇帝位

世祖元皇帝武帝第七子天監十三年封湘東王邑
二千戶初為會稽太守入為侍中宣威將軍丹陽尹
普通七年出為使持節都督荆湘郢益寧南梁六州

諸軍事西中郎將荊州刺史大通四年進號平西將軍大同元年進號安西將軍三年進號鎮西將軍五年入為護軍將軍領石頭戍軍事六年出為使持節都督江州諸軍事鎮南將軍江州刺史大清元年徙為使持節都督荆雍湘司郢寧梁南北秦九州諸軍事鎮西將軍荊州刺史三年三月侯景寇沒京師四月太子舍人蕭願至江陵軍密詔以帝為侍中假黃鉞大都督中外諸軍事司徒承制是月帝徵兵於湘州刺史河東王譽憚所遣七月丙午遣世子方等帥眾討譽方等戰敗死又遣鎮兵將軍鮑泉代之九月

乙卯雍州刺史岳陽王譽舉兵反來寇江陵帝嬰城拒守乙丑譽將杜巖與其兄弟及楊混各率其眾來降丙寅譽遁走鮑泉攻湘州不克又遣左衛將軍王

僧辯代將四年

臣欽若等曰是歲簡文即位改元大寶而元帝猶稱大禱

五月辛

未僧辯克湘州斬河東王譽湘州平六月江夏王大

欵山陽王大威宜都王大封自信安間道來奔九月

辛酉以前郢州刺史南平王恪為中衛將軍王僧辯

為領軍是月侯景將任約寇西陽武昌遣左衛將軍

徐文盛右衛將軍陰子春太子右衛率蕭慧正衛

刺史席文獻等下武昌拒約以南平王恪為荊州

史鎮武陵十一月甲子恪及大欵大成等府州國一
千人奉牋上帝相國總百揆帝下令不許十二月壬
辰以定州刺史蕭勃爲鎮南將軍廣州刺史遣護軍
將軍尹悅巴州刺史王恂定州刺史杜多安帥衆下
武昌助徐文盛五年三月侯景悉兵西上會任約
閏四月丙午約與宋子仙襲郢州執方諸戊申徐文
盛陰子春等奔歸王恂尹悅杜多安並降賊庚戌領
軍將軍王僧辯帥衆屯巴陵甲子景進寇巴陵五月
癸未帝遣遊擊將軍胡僧祐信州刺史陸法和帥衆
下秣陵任約敗景遂遁走拜王僧辯爲征東將軍開
府儀同三司尚書令胡僧祐爲領軍陸法和爲護軍
將軍仍令僧辯率衆追景所至皆捷八月僧辯下大
湓城九月以僧辯爲荊州刺史是月僧辯等奉表請
請不許賊司空東南道大行臺劉神茂率儀同劉
義劉龔赴義奉表請降六年二月僧辯衆軍發自尋
陽帝馳檄告四方曰夫剝極生災乃及龍戰師貞終
吉方制獷豕豈不以侵陵蕩薄源之者亂階龕定難
難成之者忠義故羿澆滅於前莽卓誅於後是故
桓文之勳復興於周代溫陶之績彌盛於金行粵若
梁興五十餘載平一寓內德惠悠長仁育蒼生義

不服左伊右纏咸皆仰化濁涇清渭靡不向風建翠
鳳之旗則六龍驤首擊靈鼉之鼓則百辟警肅風牧
方邵之賢衛霍辛趙之將羽林黃頭之士獸賁緹騎
之夫叱咤則風雲興起鼓動則嵩華倒拔自桐栢以
北孤竹以南碣石之前流沙之後延頸奉踵交臂屈
膝胡人不敢牧馬秦士不敢彎弓叶和萬邦平章百
姓十堯九舜曷足云也賊臣侯景匈奴叛臣鳴鏑餘
噍懸瓠空城本非國寶壽春幾要賞不踰月開海陵
之倉賑甯平之米撒九府之費錫三官之錢冒子儀
賄不知紀極敢興逆亂梗我王畿賊臣正德阻兵安
忍日者結怨江芊遠適單于簡牘屢彰彭生之魂未
弭聚斂無度景卿之請已及爲獸傳翼遠相招致處
劉我生民離散我弟兄我是以董率臯魏躬擐甲
霜戈炤日則震離奪暉龍騎蔽野則平原掩色信與
江水同流氣與寒風俱憤凶醜畏威委命下吏乞活
淮汜苟存徐交渙汗旣行絲綸爰被我是以班師
歸休牛息馬賊猶不悛遂復矢流王屋兵纏象魏
章之觀非復聽訟之堂甘泉之宮永乖避暑之地坐
召憲司臥制朝宰矯託天命僞作符書重增賦歛
意措尅生者逃竄死者暴尸道路以日度條鏡口

戮失秉爵賞繇心老弱波流士女塗炭藏獲之人
宗及賞縉紳之士三族見誅穀粟騰踏自相吞噬
喋黔首路有啣索之哀蠢蠢黎民家隕箝山之泣
師南望無復儲胥露寒河陽北臨或有穹虛龜帳
山之竹未足言其愆西山之兎不足書其罪外監陳
瑩之伏承先帝登遐宮車晏駕奉諱驚號五內摧裂
煩冤荼毒無地容身景阻饑旣甚民且狼顧遂侵軼
我彭蠡憑陵我郢邑竊據我江夏掩襲我巴丘是以
義勇爭先忠貞盡力斬馘兇渠不可稱筭沙同赤岸
水似鋒河任約泥首於安南化仁面縛於漢口子先
乞活於鄢郢希勞敗績於柴桑侯景爭竄十竄爭穴
郭默清夷晉熙附義計窮力屈反殺生人畢原鄢郢
並離禍患凡蔣邢茅皆伏鈇鑕是可忍也孰不可容
幕府據有上流實惟分陝投袂荷戈志在畢命昔周
依晉鄭漢有虛牟彼惟未屬猶能如此况聯華日月
天下不能爲臣爲子兼國兼家哉咸以義旗旣建宜
須總一共推幕府實用主盟粵以不佞謬董運率遠
惟國艱不遑寧處中權後勁龔行天罰提戈蒙險隕
越以之天馬千羣長戟百萬驅賁獲之士資智勇之
力大楚踰荆山淺源度彭蠡觸鱸汎水以持其南轡

駢委輸以衝其北華夷百濮羸糧景從雷震風駭直
指建鄴按劍而叱江水為之逆流抽戈而揮皎日為
之還舍方駕長驅百道俱入夷水殆谷克原蔽野林
輶曳牛之侶拔距磔石之夫騎則逐日追風弓則吟
猿落鴈捧崑崙而壓卵傾渤海而灌熒如駟馬之兼
鴻毛若奔牛之觸魯縞以此衆戰誰能禁之晚復蜂
蠆有毒獸窮則鬪謂山蓋高則四郊多壘謂地蓋遠
則三千弗逮如彼怒蛙譬諸鼯鼠豈費萬鈞無勞百
鎰加以日臨黃道兵起絳宮三門既啓五將咸發齊
正正之旗掃亭亭之氣故以臨機密運非賊所解奉

義而誅何罪不服今遣使持節大都督征東將軍開
府儀同三司江州刺史尚書令長寧縣開國侯王僧
辨率衆十萬直掃金陵鳴鼓聒天縱金震地朱旗夕
建如赤城之霞起戈船夜動若滄海之奔流計其同
惡不盈一旅君子在野小人在位朋黨比周何較滅
耳匪朝伊夕春長狄之喉繫郵吏之頸今司寇明罰
鉄鑕所誅止侯景而已黎元何辜一無所問諸君或
世樹忠貞身荷寵爵羽儀鼎族書勲王府俛眉猶豎
無繇自効豈不下慙泉壤上愧皇天失忠與義難以
自立想誠南風迺瞻西顧因變立功轉禍為福有能

縛侯景及送首者封萬戶開國公絹布五萬疋有能
率勤義衆以應官軍保全城邑不爲賊用上賞方伯
下賞部符並裂山河以紆青紫昔繇余入秦禮同卿
佐日暉降漢且珥金貂必有具才何恤無位若執迷
不反拒逆王師大軍一臨刑茲罔赦孟諸焚燎芝艾
俱盡宣房河決玉石同沈信賞之科有如皎日黜
之制事均白水檄布遠近咸使知聞三月王僧辯等
平侯景傳其首於江陵戊子以賊平告明堂大社己
丑僧辯等又奉表勸進不許五月庚午司空平南王
恪及宗室王侯大都督王僧辯等復拜表上尊號帝
固讓不受庚辰以恪爲鎮東將軍揚州刺史僧辯爲
司徒鎮東將軍乙酉斬賊左僕射王偉尚書呂季羣
少卿周右珍舍人嚴亶於江陵市十月四方征鎮王
公卿士復勸帝卽尊號表三上從之十一月丙子卽
皇帝位

冊府元龜

冊府元龜

冊府元龜

冊府元龜

册府元龜

巡按福建監察御史臣李嗣京 訂正

分守建南道左布政使臣胡維霖 叅閱

知建陽縣事 臣黃國琦較釋

閩位部 五

勲業第四

陳高祖武帝少傲儻有大志不治生產既長讀兵書多武藝明達果斷為當時所推服梁大同初新喻侯蕭映為廣州刺史以帝為中直兵叅軍隨府之鎮映令帝招集士馬眾至千人仍命帝監宋隆郡安化二

縣不賓帝討平之尋監西江督護高要郡守先是武林侯蕭諮爲州刺史以培克失衆心土人李賁連結數州豪傑同時反臺遣高州刺史孫罔新州刺史盧子雄將兵擊之罔等不時進皆於廣州伏誅子雄弟子畧與罔子姓及其主帥杜天合杜僧明共舉兵執南江督護沈覲進寇廣州晝夜苦攻州中震恐帝率精兵三千捲甲兼行以救之頻戰屢捷天合中流矢死賊衆大潰僧明降梁武帝深歎異焉授直閣將軍封新安食邑三百戶仍遣畫工圖帝容貌而觀之其年冬蕭映率帝送喪還都至大庾嶺會有詔以帝爲交州司馬領武平太守與刺史楊暉南討帝益招勇敢器械精利暉喜曰能克賊者必陳司武也委以經畧帝與衆軍發自番禺是時蕭勃爲定州刺史於西江相會勃知軍士憚役陰購誘之因詭說暉暉集諸將問計於帝對曰交阯叛渙罪繇宗室遂使僭亂數州彌歷年稔定州復欲昧利目前不顧大計節下奉辭伐罪故當生死以之豈可畏憚宗室輕於國憲今若奪人沮衆何必交州討賊問罪之師卽廻有所指矣於是勒兵鼓行而進十一年六月軍至交州賁衆數萬於蘇歷江口立城柵以拒官軍暉推帝爲前鋒

所向摧陷賁於屈獠界立砦大造船艦充塞湖中衆軍憚之頓湖口不敢進帝謂諸將曰我師已老將士疲勞歷歲相持恐非良計且孤軍無援入人心腹若一戰不捷豈望生全今藉其屢奔人情未固夷獠烏合易爲摧殄正當共出百死決力取之無故停留時事去矣諸將皆默然莫有應者是夜江水暴起七丈注湖中奔流迅激帝勒所部兵乘流先進衆軍鼓噪俱前賊衆大潰賁竄入屈獠洞中屈獠斬賁傳首京師是歲太清元年也賁兄天寶遁入九輿劫帥李紹隆收餘兵二萬殺德州刺史陳文武進圍愛州帝率衆討平之除扼遠將軍西江督護高要太守督七郡諸軍事二年冬侯景寇京師帝將帥兵赴援廣州刺史元景仲陰有異志將圖帝帝知其計與成州刺史王懷明行臺選郎殷外臣等密議戒嚴三年七月集兵於南海馳檄以討景仲景仲窮蹙縊于閣下帝巡蕭勃鎮廣州是時臨賀內史歐陽頤監衡州蘭裕蘭京禮扇誘始興十郡共舉兵攻頤頤請援於勃勃令帝率衆救之悉擒裕等仍監始興郡十一月帝遣杜僧明胡穎將二千人頓于嶺山并厚結始興豪傑同謀義舉侯安都張德偲等率千餘人來附蕭勃聞之

遣鍾休悅說帝曰侯景驍雄天下無敵前者援軍十萬士馬精強然而莫敢當鋒遂令羯賊得志君以區區之衆欲何所之如聞嶺北王侯又皆鼎沸河東桂陽相次屠戮邵陵開建親尋干戈李遷仕託身當陽便奪馬仗以君疎外何自暗投若且任始興遙張聲勢保此泰山自求多福帝泣謂休悅曰僕本庸虛蒙國成造往聞侯景渡江卽欲赴援遭值元蘭梗我中道今京都覆沒主上蒙塵君辱臣死誰敢愛命君侯體則皇枝任董方嶽不能摧鋒萬里雪此冤痛見遣一軍猶賢乎已若降後旨使人慨然僕行計決矣憑爲披述乃遣間道往江陵稟承軍期節度時蔡路養起兵據南康勃遣腹心潭世爲曲江令與路養相結同遏義軍大寶元年正月帝發自始興次大庾路養出軍頓南野依山水立四城以拒帝帝與戰大破之路養脫身竄走帝進頓南康湘東王承制授帝員外散騎嘗侍持節明威將軍交州刺史改封南野縣伯六月帝修嶂頭古城徙居焉高州刺史李遷仕據大臯遣主帥平虜率千人入瀨石魚梁命周文育將兵擊走遷仕奔寧都承制授帝通直散騎嘗侍使持節信威將軍豫州刺史豫章內史改封長城縣侯尋授

散騎嘗侍持節都督六郡諸軍事軍師將軍南江州刺史餘如故時寧都人劉藹等資遷仕舟艦兵仗將襲南康帝遣杜僧明等率二萬人據白口築城以禦之遷仕亦立城以相對二年三月僧明等攻拔其城生擒遷仕送南康帝斬之承制命帝進兵定江州仍授江州刺史餘如故六月帝發自南康是時承制遣東將軍王僧辯督衆軍討侯景八月僧辯軍次湓城帝率杜僧明等衆軍及南川豪帥合三萬人將會焉時西軍乏食帝先貯軍糧五十萬石至是分三十萬以資之仍頓巴丘會侯景廢簡文帝立豫章嗣王棟帝遣兼長史沈充奉表于江陵勸進十一月承制授帝使持節都督會稽東陽新安臨海永嘉五郡諸軍事平東將軍揚州刺史領會稽太守豫章內史餘如故三年正月帝率甲士三萬人強弩五千張舟艦三千乘發自豫章二月次桑落州遣中記室叅軍江元禮以事表江陵承制加帝鼓吹一部是時僧辯已發湓城會帝于白茅灣乃登岸結壇刑牲約盟進軍次蕪湖侯景城主張黑棄城走帝與諸軍進克姑熟仍次蔡州侯景以舟舫貯石沉塞淮口緣淮作城自石頭迄青溪十餘里中樓雉相接諸將未有所決僧辯

遣杜勣問計于帝帝曰前柳仲禮數十萬兵隔水而坐帝繫之在青溪竟不渡岸賊乃登高望之表裏俱盡肆其兇虐覆我王師今圍石頭須渡北岸諸將若不能當鋒請先往立柵帝卽於石頭橫隴築柵衆軍次連八城直出東北賊恐西州路斷亦於東北果林作五城以遏大路景率衆萬人鈇騎八百餘匹結陣而進帝曰軍志有之善用兵者如嘗山之蛇首尾相應今我師旣衆賊徒甚寡應分賊兵勢以弱制強何故聚其鋒銳令必死於我乃命諸將分處置兵賊直衝王僧志僧志小縮帝遣徐度領弩手二千橫截其後賊乃去帝與王琳杜龕等以鐵騎悉力乘之賊退據其柵景儀同盧輝畧開石頭北門來降盪主戴晃曹宣等攻拔果林一城衆軍又克其四城賊復還殊死戰又盡奪所得城柵帝大怒親率攻之士卒騰柵而入賊復散走景與百餘騎棄稍執刀左右衝陣不動景衆大潰逐北至西明門景至闕下不敢入臺遣腹心取其二子而遁帝率衆出廣陵應接景將郭元建會元建奔齊帝納其部曲三千人而僧辯啓帝鎮京口五月北齊遣將辛術圍嚴起達於秦都帝命徐度領兵助其固守齊衆七萬填塹起土山穿道地攻

之甚急帝乃自率萬人解其圍縱兵四面擊齊軍弓弩亂發齊平秦王中流矢死斬首數百級齊人收兵而退帝振旅南歸遣記室叅軍劉本獻捷于江陵承制授帝使持節散騎嘗侍都督南徐州諸軍事征北大將軍開府儀同三司南徐州刺史及王僧辯率衆征陸納於湘州承制命帝代鎮揚州梁元帝承聖二年旋鎮京口三年三月進位司空十一月西魏攻陷江陵帝與僧辯等進啓江州請晉安王以太宰承制又遣長史謝哲奉牒勸進十二月晉安王至自尋陽入居朝堂給帝班劍二十人四年五月北齊送貞陽侯蕭淵明還主社稷僧辯納之卽位改元天成以晉安王爲皇太子九月壬寅帝召徐度侯安都周文育等討僧辯甲辰帝步軍至石頭前進遣勇士自城北踰入擒僧辯及子顥縊殺之丙午貞陽侯遜位百僚奉晉安王上表勸進十月己酉卽位改元紹泰元年以帝爲侍中大都督中外諸軍事車騎將軍陽南徐州刺史甲仗百人出入殿省宸州刺史杜龕僧辯之壻也據吳興與義興太守常戴同舉兵反帝命周文育率衆攻戰于義興龕遣其從弟杜北叟將兵拒戰敗歸義興辛未帝表自東討留高州刺史侯安都石

州刺史杜稜宿衛臺省甲戌軍至自義興丙子拔其
水柵秦州刺史徐嗣徽據其城以入齊又要南豫州
刺史任約共舉兵應龕戴齊人資其食嗣徽等以京
師空虛率精兵五千奄至闕下侯安都領驍勇五百
人出戰嗣徽等退據石頭丁丑戴及北叟來降帝撫
而釋之以嗣徽寇逼捲甲還都命周文育進討杜龕
十一月己卯北齊遣兵五千濟渡據姑熟帝命台州
刺史徐度於冶城等立柵南抵淮渚齊又遣安州刺
史翟子崇楚州刺史劉仕榮淮州刺史柳達摩領兵
萬人於胡野渡米粟三萬石馬千匹入于石頭癸未
帝遣侯安都領水軍夜襲胡野燒齊船千餘艘周鈇
武率舟師斷齊運輸擒其北徐州刺史張領州獲運
舫米數千石仍遣韋戴於野航築城使杜稜據守齊
人又於金門水南立二柵以拒官軍甲辰嗣徽等攻
冶城柵帝領鐵騎精甲出自西明門襲擊之賊衆大
潰嗣徽留柳達摩等守城自率親屬腹心往南州采
石以迎齊援十二月癸丑帝遣侯安都領舟師襲嗣
徽家口于秦州俘獲數百人官運連艦塞淮口斷賊
水路丙辰帝盡命衆軍分部甲卒對冶航渡兵攻其
水南二柵柳達摩等渡淮置陣帝督兵疾戰縱火燒

柵烟塵漲天賊潰爭舟排擠溺死者以千數時百姓夾淮觀戰呼聲震天地軍士乘勢無不一當百盡取其船艦賊軍懾氣是日嗣徽約等領齊兵水步萬餘人還石頭帝遣兵往江寧據要險以斷賊水步不敢進頓江寧浦口帝遣侯安都領水軍襲破之嗣徽等乘單舸脫走丁巳拔石頭南岸柵移度北岸起柵以絕其汲路又堙塞東門故城中諸井齊所據城中無水水一斗買米一升米一升買絹一疋或炒米食之達摩謂衆曰聞在此童謠云石頭擣兩襠擣青復擣黃侯景服青身倒於此今吾徒衣黃豈謠言驗耶庚申達摩遣使侯子欽劉仁榮等潛來請和帝許之乃於城門外刑牲盟約其將士部曲一無所問從其南北辛酉帝出石頭南門陳兵數萬送齊人歸北者壬戌和州長史烏九遠自南州奔還歷陽江寧令陳嗣黃門侍郎曹郎據姑熟反帝命侯安都徐度等討平之斬首數千級聚爲京觀石頭採石南州悉收其馬仗船米不可勝計是月杜龕以城降三年正月癸未誅杜龕于吳興龕從弟北叟司馬沈孝敦竝賜死二月庚申帝遣侯安都周鐵虎率舸艦備江州仍頓梁山起柵甲子勅司空有軍旅之事可騎馬出入城內

三月戊戌北齊遣水軍儀同蕭軌等率衆十萬出柵口向梁山帝遣侯安都及定州刺史沈泰吳郡太守吳就共據梁山以禦之五月乙亥帝率宗室王侯及朝臣將帥於大司馬門外白獸闕下刑牲告天以齊人背約發言慷慨涕泗交流同盟皆莫能仰視士卒觀者益奮丙申齊兵至秣陵故治六月丙子至玄武湖己卯帝率帳內麾下衆軍首尾齊舉臨水大戰破之帝表解南徐州以授安都七月丙子詔授帝中書監司徒揚州刺史進爵爲公增邑并前五千戶食安吉武康二縣侍中使持節都督諸軍事乘給碧幢阜輪車是月侯瑱以江州入附遣侯安都鎮上流定南中諸郡九月壬寅改年曰太平元年進帝位丞相錄尚書事鎮衛大將軍改刺史爲牧進封義興郡公二年二月庚午蕭勃舉兵自廣州度嶺頓南康遣將歐陽頴傳泰及其子孜爲前軍至于豫章分屯要險南江州刺史余孝頊起兵應勃帝命周文育侯安都率衆討平之八月甲午進位太傅加黃鉞

王欽若等曰自此以後褒

寵竝具闕位錫命門

是月湘州刺史王琳擁兵不應命帝遣周

文育侯安都率衆討之九月辛丑詔曰肇昔元台剖判太素氤氳崇建人皇必憑洪宰故賢哲之后牧伯

征于四方神武之君太監治乎萬國又有一正九合
渠門之錫以隆戮帶圍溫行宮之寵斯茂時危所以
貞固運泰所以光熙斯乃千載同風百王不刊之道
也太傅義興公允文允武廼聖廼神固天生德康濟
黔首昔在休期早隆朝寄遠踰滄海大極交越皇運
不造書契未聞中國其亡兵凶摠至哀哀噍類譬彼
窮牢悠悠上天莫云斯極否終泰始元輔應期將此
方推援茲已溺乘舟履輦架險浮深經畧中途畢殲
羣醜泊乎石頭姑熟流髓履腸一朝指撝六合清宴
是用先朝下武翼亮中都雪三后之勁讐夷三靈之

巨慝堯台禹佐未始能階殷相周師固非云擬重之
以屯剝餘象荆楚大摧天地無心乘輿委御五胡薦
食競謀諸夏八方甚時莫有神救疆臣放命黜我冲
人顧影於蔡孺之魂甘心於甯卿之辱却按下髻求
哀之路莫從竊伏逃債容身之地無所公神兵奄至
不日清澄惟是孱蒙再膺天祿斯又巍巍蕩蕩無得
所稱焉加以仗茲忠義屠彼祇逆震部夷氛稽山罷
禮番禺蠹澤北鄙西郊殲厥凶徒罄無遺種斯則兆
民之命脩短所懸率土之基興亡是賴於是刑禮兼
訓公革有章中外咸平遐邇寧一用能使陽光合魄

曜象呈暉棲閣游庭抱仁含信宏勲該於厚地大道
格於玄天羲農炎昊以來卷領垂衣之世聖人濟物
未有如斯者也夫備物典策桓文是膺助理陰陽蕭
曹不讓未有功高於寓縣而賞薄於伊周凡厥人祇
固懷延佇實繇公謙撝自牧降損爲懷嘉數遲回永
言增歎豈可申茲雅尚久廢朝猷宜戒司勲敬昇鴻
典且重華大聖媯汭惟賢盛德之祀無忘公侯之門
必復是以殷嘉亶父繼后稷之官堯命羲和纂重黎
之位况其本枝攸建宜誓山河者乎其進公位相國
摠百揆封十郡爲陳公備九錫之禮加璽垂綬遠遊
冠綬綬位在諸侯王上其鎮衛大將軍揚州收如故
策曰大哉乾元資日月以貞觀至哉坤元憑山川以
載物故惟天爲大陟配者欽明惟王建國翼輔者齊
聖是以文武之佐礚礚蘊其玉璜堯舜之臣滎河鑿
其金版况乎體得一之鴻姿寧陽九之危厄極橫流
于碣石撲燎火於崑岑驅馭於韋彭跨蹶於齊晉神
功行而靡用聖道運而無名者乎今將授公典策其
敬聽朕命日者昊天不吊鍾亂於我國家網漏吞舟
疆胡內曩茫茫宇宙爍爍黎元方足圓顛萬不遺一
大清否亢橋山之痛已深大寶屯如平陽之禍相繼

上宰膺運康救兆民鞠旅於潢池之南揚旌於桂嶺
之北懸三光於既墜謚四海於羣飛屠契窳於中原
斲鯨鯢於濛汜蕩寧上國光啓中興此則公之大造
於皇家者也既而天未悔禍夷醜薦臻南夏沸騰西
京蕩覆羣胡孔熾藉亂乘間推納藩枝盜假神器冢
司昏曉旁引寇讎既見貶於桐宮方謀危於漢閣皇
運已殆何殊贅旒中國搖然非徒如綫公赫然投袂
將救本朝復若齊都平我王室朕所以還膺寶曆重
履宸居挹建武之風猷歌宣王之雅頌此又公之再
造於皇家者也公應務之初登庸惟始二州五嶺莫
不窺臨銀洞珠宮所在寧謚孫盧肇覺越貊爲羣番
郡帖危勢將淪殄公赤旗所指祇壘洞開白羽纒搗
兇徒粉潰非其神武久喪南藩此又公之功也大同
之末邊政不脩李賁狂迷竊我交愛敢稱大號驕蹇
甚於尉陀據有連州雄豪熾於梁碩公英礪雄等電
掃風行馳禦樓船直跨滄海新昌盡徹備履艱難經
歷嘉寧盡爲京觀三山獠洞八角蠻陬逃矣水寓之
鄉悠哉火山之國馬援之所不屆陶璜之所未聞莫
不懼我王靈爭朝邊候歸琛天府獻狀鴻臚此又公
之功也自寇虜陵江宮闈幽辱公枕戈嘗膽提劔拊

心氣湧清霄神飛紫閣而番禺連率本自諸夷言得其朋是懷同惡公仗此忠誠乘機勦定執沛公而覺鼓平新野而據鞍此又公之功也世道初艱方隅多難勳門桀黠作亂衡疑兵切池隍衆兼夷獠公以圍盜邊境知無不爲恤是同盟誅其醜類莫不魚驚鳥散百縛頭懸南士黔黎重保蘇息此又公之功也長驅嶺嶠夢想京畿綠道曾豪遍爲榛梗路養渠率全據大都畜聚逋逃方謀阻亂百樓不戰雲梯之所未窺萬弩齊張高翰之所非敵公龍驤虎岷嘯叱風雲山靡堅城野無疆陣清祆氛於瀨石滅沴氣於零都

此又公之功也遷仕凶慝屯據大臯

王欽若等曰遷仕姓李爲高州

刺史據大臯

乞活類馬騰之軍流民多杜弢之衆摧

鋒轉鬪自北徂南頻歲稽誅實惟勅虜公坐揮三畧遙制六竒義勇同心魏貅騁方風驅電擊谷靜山空列郡無犬吠之驚叢祠罷狐鳴之盜此又公之功也王師討虜次屈淪波兵乏兼儲士有饑色公迴麾蠶澤積谷巴丘億度之詠斯豐壺漿之迎是衆軍民轉漕曾無砥柱之難艫舳相望如運敖倉之粟犀渠貝冑顧茂雷霆高艦層樓仰捫霄漢故三軍勇銳百戰無前承此兵糧遂誅兇逆此又公之功也若夫英圖

邁俗義旅如雲溢壘猜携用淹戎畧公志唯同漿師
克在和鵠塞北虞鴻門是會若晉侯之誓白水如蕭
王之推赤心屈禮交盟人祇感咽故能使舟師竝路
遠邇同心此又公之功也姑熟襟要峭函憑凌寇擄
據其關梁大盜負其肩鏞公一較載馮三雄竝奮左
賢右谷音祿沙潰土分木甲殪於中原氈裘赴於江水
佗佗藉藉萬計千羣鄂坂之隘斯開夷庾之進無塞
此又公之功也義軍大衆俱奮帝京逆豎兇徒猶屯
皇邑若夫表裏山河金湯嶮固疏龍首以抗殿剪華
嶽以爲城雜虜憑焉強兵自若公廻茲地軸抗此天

羅曾不崇朝俾無遺樵軍容甚穰國政方脩物重觀
於衣冠民還瞻於禮樂楚人滿道爭覩於葉公漢老
啣悲俱歡於司隸此又公之功也內難初靜諸侯出
關外郡傳烽鮮卑犯塞莫非且渠當戶中貴名王冀
馬列於淮南胡笳動於徐北公舟師步甲亘野橫江
殲厥羣羝遂殫封豕莫不絺木而止戎車靡遺遇淳
而旋歸駮盡殪此又公之功也公克平禍難劬勞皇
室而孫寤之黨翻啓狄心伊維之間咸爲虜境雖金
陵佳氣石壘天嚴荆門戎塵夜喧胡鼓公三籌旣畫
八陣斯張載舉靈鉦未抽金撲咸俘醜類悉反高塘

異李廣之皆誅同龐元之盡赦此又公之功也任約
叛渙梟聲不悛戎羯貪婪秋心無改公左甄右落箕
張翼舒掃是攬搶驅其儉狃德狄之長埋於國門推
髻之酋烹於軍市投秦坑而盡沸噎睢水而不流此
又公之功也一相居中自安彝鼎五湖小守妄懷同
惡公夙駕兼道衣甲仗戈王斧將揮金鉞且戒祇儉
震懼遽請灰釘契觀以表其含弘焚書以安其反側

此又公之功也賊龕兇橫凌虐具區王欽若等曰賊

杜龕舉兵據吳興叛也阻兵安忍憑災怙亂自古蟲言鳥迹渾

沌洪荒人或虔劉未此殘酷公雖宗居汝潁世寓東

南育聖誕賢之鄉含章挺生之地眷言桑梓公私憤

切卓爾英猷承規奉算戮此大憝如烹小鮮此又公

之功也亂離永久羣盜孔多浙左羣渠連兵構遠豈

止千兵五較自淮以來而已哉公以中軍無帥選是

親賢姦寇途窮漼然冰泮刑澹之所文命動其大威

雷門之間勾踐行其嚴戮英規聖迹異代同風此又

公之功也同姓有扈頑兇不賓憑藉宗盟圖危社稷

觀其匪澤勢震京師驅率南蠻已為東帝公論兵於

廟堂之上決勝於樽俎之間寇賈樊滕浮江下瀨一

朝翦撲無待旬師萬里澄清非勞新息此又公之功

也豫章祆寇依憑山澤繕甲完聚多歷歲時結縱連橫爰洎交廣呂嘉旣獲吳淠已縱命我還師征其不恪連營盡拔僞黨斯擒曜聖武於廬山廻神姓於蠡泝此又公之功也自八紘九野瓜割豆分竊帝偷王連州比縣公武靈已暢大德又宣折簡馳書風猷斯遠至於蒼蒼浴日杳杳無雷北洎幽都南踰丹徼莫不屈膝膜拜來吏款關此又公之功也京師禍亂孔亟積暄雙闕低昂九門寥豁寧秦宮之可顧豈魯殿之猶存五郡簪弁百僚卿士胡服縵纓咸爲戎俗高冠厚履非復華風宋徵子麥穉之刺周大夫黍離之歎方之於斯未足爲悲矣公求衣昧旦反席高春興構宮闈具瞻遐邇郊庠宗稷之典六符十算之章還聞太始之高風重觀永平之遺事此又公之功也公有濟世之勲重之以凝神體道合德符天用百姓以爲心隨萬機以自務恥一物非唐虞之民歸含靈於仁壽之域上德不德無爲以爲夏長春生顯仁藏用忠信爲寶風雨弗愆仁惠爲基馬牛勿踐功成治定樂奏咸雲安上治民禮兼文質物色丘園衣裾里巷朝多君子野無遺賢菽粟同水火之饒工商富倚頓之旅是以天無蘊寶地有呈祥滴露卿雲朝團曉暎

山車澤馬服馭登閑旣炳煥於圖書方葳蕤於史牒
高勲踰於象緯積德冠於高華固無得而稱者矣朕
又聞之前王宰世茂賞尊賢式樹藩長總征群伯二
南崇絕四履遐曠泱泱表海胙土維齊巖巖泰山俾
侯于魯邠又勤王及鄭夾輔遷周呂伯之命斯隆河
陽之禮咸備况復經營宇宙豈唯斷鰲足之功弘濟
蒼生非直鑿龍門之險而疇庸報德寂爾無聞朕所
以垂拱當中載懷慙悸者也今授公相國以南豫州
之陳留南丹陽宣城揚州之吳興東陽新安寧國南
徐州之義興江州之鄱陽臨川十郡封公爲陳公錫
之青土首以白茅爰定爾邦用建冢社昔旦奭分陝
俱爲保師晉鄭諸侯咸作卿士兼其內外禮實攸宜
今命持節兼太尉王通授相國印綬陳公璽綬使持
節兼司空王瑒授陳公茅土金虎符第一至第五左
竹使符第一至第十相國秩踰三鉉任總百司位絕
朝班禮繇事革其以相國摠百揆除錄尚書之號上
所假節侍中貂蟬中書監印章中外都督太傅印綬
義興公印策其鎮衛大將軍揚州牧如故又加公九
錫其敬聽後命以公體爲楨幹律等銜策四維皆舉
八柄有章是用錫公大輅戎車各一玄牡二駟以公

賤寶崇穀疏爵待農室富京坻民知榮辱是用錫公
衮冕之服赤舄副焉以公調理陰陽燮諧風雅三靈
尤降萬國同和是用錫公軒懸之樂六佾之舞以公
宣導英猷弘開風教光景所昭鞮象必通是用錫公
朱戶以居以公抑揚清濁褒德進賢髦士盈朝幽人
虛谷是用錫公納陛以登以公巋然廊廟為世鎔範
持衡四表臨御八荒是用錫公虎賁之士三百人以
公執茲明罰期在刑措象恭無赦于紀必誅是用錫
公斧鉞各一以公英猷遠量跨厲嵩溟包一車書括
囊寰宇是用錫公彤弓一彤矢百盧弓十盧矢千以

公天經地義貫徹幽明春露秋霜尤恭染盛是用錫
公秬鬯一卣圭瓚副焉陳國置丞相已下一遵舊式
往欽哉其恭循朕命克相皇天弘建邦家佐興洪業
以光我高祖之休命十月戊辰進陳公爵為王以揚
州之會稽臨清永嘉建安南徐州之晉陵信義江州
之尋陽豫州安成廬陵并前二十郡益封陳國其相
國揚州牧鎮衛大將軍竝如故又命陳王冕十有二
旒建天子旌旗出警入蹕乘金根車駕六馬備五時
副車置旄頭雲罕樂舞八佾設鐘篴宮懸王妃王子
王女爵命之號陳臺百官一依舊典是月辛未遂受

梁禪

世祖文帝始興昭烈王之子少沈敏有識量留意經史舉動方雅造次必遵禮法高祖甚愛之侯景之亂鄉人多依山湖寇抄帝獨保家無所犯時亂日甚乃避地臨安及高祖舉義兵侯景使收帝及衡陽王獻王帝乃密裹小刀與囚入見而害景至便屬吏故其事不行高祖大軍圍石頭景欲加害者數矣會景敗乃得出起家吳興太守時宜城劫帥紀磯郝仲等各聚眾千餘人侵掠郡境帝討平之梁承聖二年授信武將軍監南徐州三年高祖北往廣陵使帝為前軍

每戰克捷高祖之討王僧辯也先召帝與謀時僧辯

女婿杜龕據吳興兵衆甚盛高祖令帝還長城立柵以備龕帝收兵纜數百人戰備又少龕遣其將杜泰領精兵五千乘虛奄至將士相視失色而帝言笑自如若部分益明於是衆心乃定泰知柵內人少日夜苦攻帝激勵將士身當矢石相持數旬泰乃退走高祖遣周文育率兵討龕，兵尚衆漸據要衝水步連陣相結帝命將軍劉澄蔣元舉率衆攻龕，軍大敗害急因請降東揚州刺史張彪起兵圍臨海太守懷振遣使求救帝與周文育輕兵往會稽以掩彪將

沈泰開門納帝，盡收其部曲家累，處至。又破走若耶村民，斬處傳其首，以功授持節都督會稽等十郡諸軍事、宣毅將軍、會稽太守。山越深險，皆不賓附，帝分命討擊，悉平之。威惠大振。高祖即位，封為臨川郡王，邑二千戶，拜侍中、安東將軍。及周文育侯安都敗於沌口，詔帝入衛軍，儲戎備，皆以委焉。尋命率兵城南院，永定三年六月即帝位。

北齊高祖神武皇帝渤海蓆人高樹之子，素家貧，自隊主轉輪為丞，使與懷朔省事雲中司馬子如及秀容人劉貴、中山人賈顯智為奔走之友。懷朔戶曹史

孫騰外兵使侯景亦相友，結柔玄鎮人杜維、周反於上谷。帝與同志從之，醜其行事，私與尉景、段榮、蔡雋圖之不果，而逃奔葛榮。又亡歸爾朱榮，以帝為信都都督。時後魏孝明遇鄭儼、徐紇逼靈太后，未敢制私使榮舉兵，內向榮，以帝為前鋒。至維會，孝莊立，以定策勲，封為銅鍬伯。及爾朱榮擊葛榮，令帝諭下賊，別稱王者七人。後與行臺于暉破羊侃于太山，又與元天穆破邢果于濟南，累遷帝三鎮人酋長、晉州刺史。於是大聚斂，因劉貴貨榮，下要人，盡得其意。及孝莊誅榮，其從子兆自晉陽舉兵，入維執孝莊，立長廣王。

曄改元建明封帝為平陽郡公及貴也頭紇豆陵步
藩入秀容逼晉陽兆徵帝帝將往賀拔允過見請緩
行以備之帝乃往逗遛辭以河無橋不得渡步藩軍
盛兆敗走初孝莊之誅爾朱榮知其黨必有逆謀乃
密勅步藩令襲其後步藩既敗兆等以兵勢日盛兆
又請救於帝帝內圖兆復慮步藩後之難除乃與兆
悉力破之藩死兆深德於帝誓為兄弟時爾朱榮從
弟度律從父弟世隆及彥伯共執朝政從祖兄子仲
遠授東郡
天光據關右兆據并州各擁兵為暴天下苦之葛榮
眾流入并肆者二十餘萬為契胡陵暴皆不聊生大

小二十六反誅夷者半猶草竊不止兆患之問計於
帝帝曰六鎮反賊不可盡殺宜選王素腹心者私使
統焉若有反者直罪其帥則所罪者寡兆曰善誰可
行也賀拔允時在坐帝拳毆之折其一齒曰生平天
枉時王欽若等曰爾朱
榮為天柱大將軍奴輩伏處分如鷹犬今日天

下安置在王而阿鞠泥敢誣下罔上請殺之兆以帝
為誠遂以委焉帝以兆醉恐醒後或致疑貳遂出宣
言受委統州鎮兵可集汾東受令乃建牙陽曲川陳
部分有款軍門者絳巾袍自稱梗陽驛子願厠左右
訪之則以力聞嘗於并州市格殺人者乃署為親信

兵士素惡兆而樂神武於是莫不皆至居無何又使劉貴請兆以弁肆頓歲霜早降戶掘黃鼠而食之皆面無穀色徒汚人國土請令就食山東待温飽而處分之兆從其議其長史慕容紹宗諫曰不可今四方擾擾人懷異望况高公雄畧又握大兵將不可為兆曰香火誓重何所慮也紹宗曰親兄弟尚難可信何論香火時兆左右已受帝金即譖紹宗與帝舊有隙兆乃禁紹宗而催帝帝乃自晉陽出滏口路逢爾朱榮妻鄉郡長公主自雒陽來馬三百匹盡奪易之兆聞乃釋紹宗而問焉紹宗曰猶掌握中物也於是自

追帝至襄沔會漳水暴長橋壞帝隔水拜曰所以借公主馬非有他故備山東盜耳王受讒言自來賜追今渡河而死不辭此眾更叛兆乃陳無此意因輕馬渡與帝坐幕下陳謝遂授刀引頭使帝斫已帝大哭曰自天柱薨背賀六渾

王欽若等曰賀六渾神武字也

更何所仰願

大家千萬歲以申力用今傍人構間至此大家何忍復出此言兆投刀於地遂刑白馬而盟誓為兄弟留宿夜飲尉景伏壯士欲執兆帝齧臂止之曰今殺之其黨必奔歸聚結兵饑馬瘦不可相支若英雄崛起則為害滋甚不如且置之兆雖勁捷而兇狡無謀不

足圖也旦日兆歸營又召帝將上馬詣之孫騰牽衣
乃止隔水肆罵馳還晉陽兆心腹念賢領帝戶家累
別爲營帝僞與之善觀其佩刀因取之以殺其從者
盡散於是士衆咸悅倍願附從旣出滏口倍加約束
纖毫之物不聽侵犯將過麥地帝輒步牽馬遠近聞
之皆稱高儀同將兵整肅益歸心焉遂前行屯鄴求
糧於相州刺史劉誕誕不供有車營租米帝自取之
魏普泰元年二月神武自軍次信都高乾封隆之開
門以待遂據冀州是月爾朱度律廢長廣王而立節
閔封帝爲渤海王四月又加東道大行臺第一鎮人
酋長龐蒼鷹自太原來奔帝以爲行臺郎尋以爲安
州刺史神武自向山東養士繕甲禁侵掠百姓歸心
乃詐爲書爾朱兆將以六鎮人配契胡爲部曲衆皆
愁又爲并州符徵兵討步落稽發萬人將遣之孫騰
尉景爲請留如此者再帝親送之郊雪涕執別人皆
號慟哭聲動地帝乃喻之曰與爾俱殊鄉客義同一
家不意在上乃爾徵召直向西已當死後軍期又當
死配國人又當死奈何衆曰唯有反耳帝曰反是急
計須推一人爲王衆曰願奉帝曰爾鄉里難制不見葛
榮乎雖百萬衆無刑法終自灰滅今以吾爲王當與

前異不得欺漢兒不得犯軍令生死任吾則可不爾不能爲取笑天下衆皆頓顙死生唯命帝曰若不得已明日椎牛饗士諭以討爾朱之意封隆之進曰千載一時普天幸甚帝曰討賊大順也極時大業也吾雖不武以死繼之何敢讓爲六月庚子建義於信都尚未顯背爾朱氏及李元忠與高乾平殷州斬爾朱羽生首來謁帝撫膺曰今者反決矣乃以元忠爲殷州刺史是時兵威旣振乃抗表罪狀爾朱世隆等表不通八月爾朱兆攻陷殷州李元忠來奔孫騰以爲朝廷隔絕不權立天子則衆望無所係十月壬寅奉章武王融子渤海太守王郎爲皇帝年號中興是爲廢帝時爾朱度律仲遠軍次雒陽爾朱兆會之帝用竇泰策縱反間度律仲遠不戰而還帝乃敗兆於廣阿十一月攻鄴相州刺史劉誕嬰城固守帝起土山爲地道往往建大柱一時焚之城陷入地麻祥時爲塲陽令帝呼之曰麻都祥慚而死永熙元年正月壬午拔鄴城據之廢帝進帝大丞相柱國大將軍太師是時青州建義大都督崔靈珍大都督耿翔皆遣使歸附行汾州事劉貴棄城來降閏三月爾朱天光自長安兆自并州度律自雒陽仲遠自東郡同會鄴

衆號二十萬挾洹水而軍節閔以長孫承業爲大行
臺摠督焉帝令封隆之守鄴自出頓紫陌時馬不滿
二千步兵不至三萬衆寡不敵乃於胡陵爲圓陣連
牛驢以塞歸道於是將士皆爲死志四面赴擊之爾
朱兆責帝以背已帝曰本戮力者共輔王室今帝何
在兆曰永安枉害天柱我報讐耳帝曰我昔日親聞
天柱訃汝在戶前立豈得言不反耶且以君殺臣何
報之有今日義絕矣乃合戰大敗之爾朱兆對慕容
紹宗叩心曰不用公言以至於此將輕走紹宗反旌
鳴角收聚散卒成軍容而西上高李式以七騎追奔
度野馬崗與兆遇高昂望之不見哭曰喪吾弟矣夜
久李式還禦血滿袖斛斯椿倍道先據河橋四月斛
斯椿執天光度律以送雒陽長孫承業遣都督賈顯
智張歡入雒陽執世隆彥伯斬之兆奔并州仲遠奔
梁州遂死焉時凶蠱旣除朝廷慶悅帝至雒陽廢節
閔及中興王而立孝武孝武卽位以帝爲天柱大將
軍太師世襲定州刺史增封并五十萬戶帝自滏口
入爾朱兆大掠晉陽北保秀容并州平帝以晉陽四
塞乃建大丞相府而定居焉兆旣至秀容分兵守險
出入寇抄帝揚聲討之師出止者數四兆意息帝揣

其歲首當宴會遣竇泰以精騎馳之一日一夜行三百里帝以大軍繼之二年正月竇泰奄至爾朱兆庭軍人因宴休惰忽見泰驚走追破之於赤洪嶺兆自縊帝親臨厚葬之初帝之入雒也爾朱仲遠部下都督喬寧張子期自滑臺歸命帝以其助亂且數反覆皆斬之斛斯椿繇是內不自安乃與南陵王寶炬及武衛將軍元毗魏光王思政構帝於孝武舍人元士弼又奏帝受勅大不敬故孝武心貳於賀拔岳時司空高乾密啓帝言孝武之貳帝封呈孝武殺之天光元年二月封隆之與孫騰私言隆之喪妻孝武欲妻以姝騰亦未之信隆之泄其言於斛斯椿以白孝武又孫騰帶仗入省擅殺御史竝亡來奔稱孝武搃舍人梁續於前光祿少卿元子翰攘臂擊之騰曰爾高王元家兒拳正如此領軍婁昭辭疾歸晉陽魏帝於是以前斛斯椿兼領軍分置督將及河間關西諸刺史華山王縶在徐州帝使邸珍奪其管籥建州刺史賢濟州刺史蔡雋皆帝同義魏帝忌之故省建州以去賢使御史中尉蔡雋罪以開府賈顯智爲濟州拒之魏帝愈怒五月下詔云將征句吳發河南諸州兵增宿衛守河橋六月丁巳密詔帝曰宇文黑獺自

平破秦隴多求非分脫有變非事資經畧但表啓未
全背戾進討事涉忿忿遂召羣臣議其可否僉言假
稱南伐內外戒嚴一則防豫不虞二則以威吳楚時
魏帝將伐帝部恐帝部將帥慮疑故有此詔帝乃表
曰荊州縮接蠻左密通畿服關隴恃遠將有逆圖臣
今潛勒兵馬三萬擬從河東而渡又遣鎮州刺史庾
狄千瀛州刺史郭瓊汾州刺史斛律金前武衛將軍
彭樂擬兵四萬從其來遠津渡遣領軍將軍婁昭相
州刺史竇泰前燕州刺史堯雄并州刺史高隆之擬
兵五萬以討荊州遣冀州刺史尉景前冀州刺史高
敖曹濟州刺史蔡雋前侍中封隆之擬山東兵七萬
突騎五萬以征江左皆約勒所部伏聽處分魏帝知
覺其變乃出帝表命羣伯議之欲止帝諸軍帝乃集
在并州僚佐令其博議還以表聞仍以信誓自明忠
款日爲嬖佞所間陛下一旦賜疑令猖狂之罪爾朱
時計臣若不盡誠竭節敢負陛下則使身受天殃子
孫殄絕陛下若垂信赤心使干戈不動佞臣一二人
願斟量廢黜辛未魏帝復錄在京文武議意以答帝
使舍人溫子昇草勅子昇逡巡未敢作魏帝據胡床
拔劔作色子昇乃爲勅曰前持心血遠以示王深冀

彼此共相體悉而不良之徒坐生間貳近孫騰倉卒
向彼致使聞者疑有異謀故遣御史中尉綦雋具申
朕懷今得王啓言誓懇惻反覆思之猶所未解以朕
恥身遇王武畧不勞尺刃坐爲天子所謂生我者父
母貴我者高王今若無事背王親相攻討則使身及
子孫還如王誓皇天后土實聞此言近慮宇文爲亂
賀拔勝應之故纂嚴欲與王俱爲聲援宇文今日使
者相望觀其所爲更無異迹賀拔在南開擴邊境爲
國立功念無可責君若欲分討何以爲詞東南不賓
爲日已久先朝已來置之度外今天下戶口減半未
宜窮兵極武朕旣闇昧不知佞人是誰可列其姓名
令朕知也如聞庫狄千語王云本欲取懦弱者爲主
王無事立此長君使其不可駕御今但作十五日自
可廢之更立餘者如此議論自是王間勲人豈出佞
臣之口去歲封隆之背叛今年孫騰逃走不送誰不
惟王騰旣爲禍胎曾無愧懼若事君盡誠何不斬送
二首王雖啓圖西去而四道俱進或欲南度維陽或
欲東臨江左言之者猶怪聞之者寧能不疑王若守
誠不貳晏然居北在此雖有百萬之衆終無圖彼之
心王脫信邪忘義舉旗南指縱無匹馬隻輪猶欲奮

空拳而爭歿朕本寡德王立之百姓無知或謂實可
若爲他所圖則彰朕之惡假令還爲王殺幽辱壘粉
了無遺恨向者王旣以德見推以義見舉一朝背德
舍義便是過有所歸本望君臣一體若合符契不圖
今日分疎到此古語云越人射我笑而道之吾兄射
我泣而道之朕旣親王情如兄弟所以投筆拊膺不
覺歔歔初帝自京師將北以爲雒陽久經喪亂王室
衰盡雖有山河之固土地褊狹不如鄴請遷都魏帝
曰高祖定鼎河雒爲永永之基經營制度至世宗乃
畢王旣功在社稷宜遵太和舊事帝奉詔至是復謀
焉遣三千騎鎮建興益河東及濟州兵於白溝虜船
不敢向雒諸州和糴粟運入鄴城魏帝又勅帝曰王
若厭伏人情杜絕物議唯有歸河東之兵罷建興之
戍送相州之粟追濟州之軍令蔡雋受代使邸珍出
徐止戈散馬各事家業脫須糧廩別遣轉輸則讒人
結舌疑悔不生王高枕太原朕垂拱京雒終不舉足
渡河以干戈相指王若馬首南向問鼎輕重朕雖無
武欲止不能必爲社稷宗廟出萬死之策決在於王
非朕能定爲山止簣相爲惜之魏帝時以任祥爲兼
尚書左僕射加開府祥棄官走至河北據郡待帝魏

帝乃勅文武官北來者在去留下詔罪狀帝爲北伐經營帝亦勒馬宣告曰孤遇爾朱擅權舉大義四海奉戴主元武怒幽明橫爲斛斯椿讒構以誠節爲逆首昔趙鞅與晉陽之甲誅君側惡人今者南邁誅椿而已以高昂爲前鋒曰若用司空言豈有今日之舉司馬子如答帝曰本欲立小者正爲此耳魏帝徵兵關右召賀拔勝赴行在所遣大行臺長孫承業大都督潁川王斌之斛斯椿共鎮武牢汝陽王暹鎮石濟行臺長孫子彥帥前弘農太守元洪畧鎮陝賈顯智豫州刺史斛斯元壽伐蔡雋帝使竇泰與左相大都督莫多婁貸文逆顯智韓賢逆享元素軍降泰貸文與顯智遇於長壽津顯智陰約降引軍退軍司元玄覺之馳還請益師魏帝遣大都督侯幾紹赴之戰於滑臺東顯智以軍降紹死之七月魏帝躬率大衆屯河橋帝至河北十餘里再遣口申誠款魏帝不報乃引軍渡河魏帝問計於羣臣或云南依賀拔勝或云西就關中或云守雒口死戰未決而元斌之與斛斯椿爭權不睦斌之棄椿逕還給魏帝云帝兵至卽日魏帝遜於長安己酉帝入雒陽停永寧寺八月甲寅召集百官謂曰爲臣奉主拯救危亂若處不諫諍出

不陪隨緩則耽寵爭榮急便逃竄臣節安在遂收關
府儀同三司叱列延慶兼尚書左僕射辛雄兼吏部
尚書崔孝芬都官尚書劉厥兼度支尚書楊機散騎
嘗侍侍中元士弼並殺之誅其貳也士弼籍沒家口
帝以萬幾不可曠廢乃與百僚議以清河王亶爲大
司馬居尚書下舍而承制決事焉王稱警蹕帝尋至
弘農遂西克潼關執毛洪賓進軍長城龍門都督薛
崇禮降帝退舍河東命行臺尚書長史薛瑜守潼關
大都督庫狄溫守封陵於蒲津西岸築城守華州以
薛紹宗爲刺史高昂行豫州事帝自發晉陽至此凡
四十啓魏帝皆不答九月庚寅帝還至雒陽乃遣僧
道榮奉表關中又不答乃集百僚沙門耆老議所推
立以爲自孝昌衰亂國統中絕神主靡依昭穆失序
永安以孝文爲伯考永熙遷孝明於夾室業喪祚短
職此之繇議立清河王世子善見是爲孝靜帝魏於
是始分爲二帝以孝武旣西恐逼崤陝雒陽復在河
外接近梁境如向晉陽形勢不能相接依議遷鄴護
軍祖瑩贊焉詔下三日車駕便發戶四十萬狼狽就
道帝留雒陽部分事畢還晉陽自是軍國政務皆歸
相府二年正月西魏渭州刺史爾朱渾道元擁衆內

屬帝迎納之壬戌帝襲擊山胡劉蠡升大破之是月
孝靜褒詔以帝爲相國假黃鉞劔履上殿入朝不趨
帝固辭三月帝欲以女妻蠡升太子候其不設備辛
酉潛師襲之其北部王斬蠡升首以送其衆復立其
子南海王帝進擊之又護南海王及其弟西海王北
海王皇后公卿以下四百餘人胡魏五萬戶三年正
月甲子帝帥庫狄千等萬騎圍西魏夏州身不火食
四日而至縛稍爲梯夜入其城於是生擒費也頭斛
板俄彌罕因而用之留都督張瓊以鎮守遷其部落
五千戶以歸西魏靈州刺史曹泥與其婿涼州刺史
劉豐遣使請內屬周太祖圍泥水灌其城不沒者四
尺帝命阿羅至發騎三萬徑度靈州統山西後獲馬
五十匹西師乃退帝率騎迎泥豐生拔其遺戶五千
以歸復泥官爵孝靜詔加帝九錫固讓乃止二月帝
令阿羅至逼西魏秦州刺史建忠王萬侯普撥帝以
衆應之三月普撥與其子太宰壽會于幽蒲津以水
薄不得赴救乃班師是月高昂克上雒十一月壬辰
帝西討自蒲津濟衆二十萬周太祖軍於沙苑帝以
地阨少却西人鼓噪而進軍大亂棄器甲十有八萬
帝跨橐駝候船以歸元象元年三月辛酉帝固請解

丞相孝靜許之七月壬午行臺侯景司徒高昂圍西魏將獨孤信於金墉西魏帝及周太祖並來赴救大都督庫狄千帥諸將前驅帝摠衆繼進八月辛卯戰於河陰大破西魏軍俘獲數萬司徒高昂大都督李猛宗顯死之西帥之敗獨孤信先入關周太祖留其都督長孫子彥守金墉遂燒營以遁帝遣兵追奔至峭不及而還初帝知西師來侵自晉陽率衆馳赴至孟津未濟而軍有勝負旣而帝渡河子彥亦棄城走帝遂毀金墉而還十一月庚午朝京師十二月壬辰還晉陽興和元年七月丁丑孝靜進帝爲相國錄尚書事固讓乃止十二月乙丑帝以新宮成朝於鄴辭渤海王及都督中外諸軍事詔不許四年五月辛巳朝鄴六月甲辰還晉陽九月帝西征十月己亥圍西魏儀同三司王思政於玉壁城欲以挑敵西師不敢出武定元年二月壬申北豫州刺史高慎據虎牢西叛三月壬辰周太祖率衆援高慎圍河橋南城戊申帝大敗之於芒山擒西魏督將已下四百餘人俘斬六萬計是時軍士有盜殺驢者軍令應死帝弗殺將至并州決之明日復戰奔西軍告帝所在西師盡銳來攻衆潰帝失馬赫連陽順下馬以授帝與蒼頭馮

文雒扶上俱走西魏大帥賀拔勝以十三騎逐帝河
州刺史劉洪徽射中其二勝稍將中帝段先橫射勝
馬殪遂免豫雒二州平帝使劉豐追奔至弘農還八
月孝靜詔帝爲相國錄尚書事固辭乃止十二月己
卯朝京師庚辰還晉陽二年三月癸巳帝巡行冀定
二州因朝京師四月丙辰還晉陽十一月帝討山胡
破平之俘獲一萬餘戶口分配諸州三年正月甲午
開府儀同三司爾朱文暢開府司馬任胃都督鄭仲
禮中府主簿李世林前開府參軍房子遠等謀弑帝
因十五夜打簇懷刃而入其黨薛季孝以告並伏誅
三月乙未帝朝鄴丙午還晉陽四年八月帝將西伐
自鄴會兵於晉陽九月圍玉壁以挑西師不敢應西
魏晉州刺史韋孝寬守玉壁城中出鐵面帝使元澄
射之每中其目北天險也乃起土山鑿十道又於東
面鑿二十道以攻之城中無水汲於汾帝使移汾
夜而畢孝寬奪據土山頓軍五旬城不拔死者七萬
人聚爲一家是月帝有疾十一月庚子輿疾班師以
無功表解都督中外諸軍事五年正月丙午終於晉
陽天保初文宣卽位追崇爲獻武帝廟號太祖
世祖文襄皇帝神武長子魏中興元年爲渤海王世

子二年加侍中開府儀同三司尚孝靜帝妹馮翊長
公主天平元年加使持節尚書令大行臺并州刺史
三年入朝輔政加領左右京畿大都督興和二年加
大將軍領中書監武定四年十一月神武西討不豫
班師帝馳赴軍所侍衛還晉陽五年正月神武晏駕
七月魏帝詔以帝爲使持節大丞相都督中外諸軍
錄尚書事大行臺渤海王八月戊辰文襄啓申神武
遺令請減國邑分封將督各有差辛未朝鄴固辭丞
相魏帝詔曰旣朝野攸憑安危所繫不得令遂本懷
須有權奪可復前大將軍餘如故七年七月辛卯遇
盜而終文宣受禪追謚爲文襄皇帝廟號太宗

顯宗文宣皇帝神武第三子時太平二年授散騎常
侍驃騎大將軍儀同三司左光祿大夫太原郡開國
公武定元年加侍中二年轉尚書左僕射領軍將軍
五年授尚書令中書監京畿大都督武定七年七月
文襄遇害帝乃走晉陽親摠庶政十一月梁齊州刺
史茅靈斌德州刺史劉領隊南豫州刺史皇甫賚等
竝以州內屬八年正月魏帝詔進帝位使持節丞相
都督中外諸軍錄尚書事大行臺齊郡王食邑一萬
戶三月進封齊王五月進相國摠百揆封冀州之渤

海長樂安德武邑瀛州之河間高陽之章武定州之
中山甯山博陵十郡邑二十萬戶加九錫殊禮齊王
如故遣兼太尉彭城王韶司空潘相樂冊命曰於戲
敬聽朕命夫唯天爲大列星宿而垂象謂地蓋厚疏
川嶽以阜物所以四時代序萬類駢羅庶品得性群
形不彫然則皇王統曆深視高居拱默垂衣寄成師
相此則夏伯殷尹竭其股肱周成漢昭無爲而治也
往者天下多難國命如流則我太廟之業將墜於地
齊獻武王奮迅風雲大濟區域援翼朕躬國爲再造
經營庶土以至憂勤及文襄承構愈廣前業康邦夷
難道格穹蒼王縱德應期千齡一出唯幾唯深乃神
乃睿大崇霸德實廣相猷雖冥功妙實藐絕言象標
聲示迹典禮宜宣令申後命其敬虔受王搏風初舉
建旗上地庇民立政時雨滂流下識廉恥仁加水陸
移風易俗自齊變魯此王之功也仍攝天臺摠叅戎
律策出若神威行朔土引弓竄跡松塞無烟此又王
之功也逮先統前緒持衡久合華戎混一風海調夷
日月光華天地清晏聲接響隨無思不偃此又王之
功也逖矣炎方逋違正朔懷文曜武授畧申規淮楚
連城灌然桑落此又王之功也關峴襟帶跨躡蕭蔭

腸胃之地嶽主鴟時偏師纔指渙同氷散此又王之
功也晉熙之所險薄江雷迥隔聲教迷方未改命將
鞠旅覆其巢穴威畧風騰傾懾南海此又王之功也
羣蠻跋扈世絕南疆搖蕩邊陲亟爲塵梗懷德畏威
向風請順傾陬盡落其至如雲此又王之功也胡人
別種延蔓山谷酋渠萬族廣袤千里憑險不恭恣其
桀黠有樂淳風相携叩款粟帛之調王府充積此又
王之功也茫茫涉海世敵諸華風行鳥逝倏來忽往
旣飲醇醪附同膠漆氈裘委物竒獸銜尾此又王之
功也秦川尚阻作我仇讎爰挹椒蘭飛書請好天動
其衷辭卑禮厚區宇又寧遐邇畢至此又王之功也
江陰告禍民無適歸蕭宗子弟尚想投庇如鳥還山
猶川赴海荆江十部俄而獻割乘此會也將混朱方
此又王之功也天平地成率土咸茂禎符顯見史不
停筆旣連百木兼呈九尾素過秦雀蒼比周烏此又
王之功也搜揚管庫衣冠獲序禮云樂云銷沉俱振
輕徑撤賦矜獄寬刑大信外彰深仁遠洽此又王之
功也王有安天下之大勲加以表光明之盛德宣贊
洪猷以左右朕言昔旦奭外分毛畢入佐出內之任
王宜摠之人謀鬼謀兩儀協契錫命之行義申公道

以王踐律蹈禮軌物蒼生圓首安志率心歸道是以
 錫王大輅戎輅各一玄牡二駟王深重民天唯本是
 務衣食之用榮辱所繇是用錫王袞冕之服赤舄副
 焉王深廣惠和易調風化神祇且格功德可象是用
 錫王軒懸之樂六佾之舞王風聲振赫九域咸綏遠
 人率俾奔走委盡是用錫王朱戶以居王求賢選衆
 草萊以盡陳力就列罔非其人是用錫王納陛以登
 王英圖猛繫抑揚千品毅然之節肅是非違是用錫
 王虎賁之士三百人王興亡所繫制極幽顯糾行天
 討罪人斯得是用錫王鈇鉞各一王鷹揚豹變實扶
 下土狼顧鳴張罔不彈射是用錫王彤弓一彤矢百
 盧弓十盧矢千王孝弟之至通於神明率民興行咸
 達區宇是用錫王秬鬯一卣珪瓚副焉往欽哉其祇
 順往冊保弼皇家用終爾休德對揚我太祖之顯命
 又詔以齊國大妃為王太后戊子遂授魏帝禪

冊府元龜

冊府元龜

巡按福建監察御史臣李嗣京 訂正

知長樂縣事 臣夏允彝參閱

知建陽縣事 臣黃國琦較釋

閩位部 六

勲業第五

梁太祖神武元聖孝皇帝宋州碭山縣人也未冠而孤母王氏携養寄於蕭縣人劉崇之家帝既壯以雄勇自負唐僖宗乾符中關東薦饑羣賊嘯聚黃巢因之起於曹濮饑民願附者凡數萬帝乃辭崇家與仲

兄存俱入巢軍以力戰屢捷得補爲隊長唐廣明元年十二月甲申黃巢陷長安遣帝領兵屯於東渭橋是時夏州節度使諸葛爽率所部屯于櫟陽巢命帝招諭爽爽遂降於巢中和二年二月巢以帝爲東南面行營先鋒使令攻南陽下之六月帝歸長安巢親勞於灞上七月巢遣帝西拒邠岐鄜夏之師於興平所至皆立功二年二月巢以帝爲同州防禦使使自攻取帝乃自丹州南行以擊左馮振之遂據其郡時河中節度使王重榮屯兵數萬糾合諸侯以圖興復帝時與之鄰封屢爲重榮所敗遂請濟師於巢表章十上爲僞軍使孟楷所蔽不達又聞巢軍勢賊諸較離心帝知其必敗九月帝遂與左右定計斬僞監軍使嚴貴舉郡降於重榮重榮卽日飛章上奏時僖宗在蜀覽表而喜曰是天賜予也乃詔授帝左金吾衛大將軍充河中行營副招討使仍賜名全忠自是帥所部與河中兵士偕行所向無不克捷三年三月僖宗制授帝宣武軍節度使依前克河中行營副招討使仍令候收復京闕卽得赴鎮四月巢軍自藍關南走帝與諸侯之帥俱收長安乃率部下二旅之衆仗節東下七月丁卯入於梁苑是時帝年三十有二時

蔡州刺史秦宗權與黃巢餘孽合從肆虐共圍陳州
久之僖宗乃命帝爲東北面都招討使時汴宋連年
阻饑公私俱困帑廩皆虛外爲大敵所攻內則驕軍
難制交鋒接戰日甚一日人皆危之惟帝銳氣益振
是歲十二月帝領兵於鹿邑與巢衆相遇縱兵擊之
斬首二千餘級乃引兵入亳州因是兼有譙郡之地
四年春帝與許州田從異下諸軍同收瓦子寨殺賊
數萬衆是時陳州四面賊寨相望驅虜編氓殺以充
食號爲春磨寨帝分兵翦撲大小凡四十戰四月丁
巳收西華寨賊將黃鄴單騎奔陳帝乘勝追之鼓噪
而進會黃巢遁去遂入陳州刺史趙犖迎於馬前俄
聞巢黨尚在陳北故陽壘帝遂逕歸大梁是時河東
節度使李克用奉僖宗詔統騎軍數千同謀破賊與
帝合勢於中牟北邀擊之賊衆大敗於王蒲渡多東
手來降時賊將霍存葛從周張歸厚張歸霸皆匍匐
於馬前悉宥而納之遂逐殘寇東至於宛句五月甲
戌帝與晉軍振旅歸汴館克用於上源驛旣而備犒
宴之禮克用乘醉任氣帝不平之是夜命甲士圍而
攻之會大雨雷電克用因得於電光中踰垣遁去惟
殺其部下數百人而已六月陳人感解圍之惠爲帝

建生祠堂於其郡是歲黃巢雖沒而蔡州秦宗權繼
爲巨孽有衆數萬攻陷鄰郡殺掠吏民屠害之酷更
甚巢賊帝患之七月遂與陳人共攻蔡賊於激水殺
數千人九月己未僖宗就加帝檢校司徒同平章事
封沛郡侯食邑千戶光啓元年春蔡賊掠亳潁二郡
帝帥師以救之遂東至於焦夷敗賊衆數千生擒賊
將殷鐵林梟首以徇于軍而還三月僖宗自蜀還長
安改元光啓四月戊辰就加帝檢校太保增食邑千
五百戶十二月河中太原之師逼長安觀軍容使田
令孜奉僖宗出幸鳳翔二年春蔡賊益熾時唐室微
弱諸道州兵不爲王室所用故宗權得以縱毒連陷
汝洛懷孟唐鄧許鄭圍幅數千里殆絕人煙惟宋毫
滑潁僅能閉壘而已帝累出兵與之交戰然或勝或
負人甚危之三月庚辰僖宗降制就封帝爲沛郡王
是月僖宗移幸興元五年嗣襄王溫僭卽帝位於長
安改元爲建貞遣使齎僞詔至汴帝命焚之于庭未
幾襄王果敗七月蔡人逼司州節度使鹿宴弘使來
求救帝遣葛從周等率師赴援師未至而城陷宴弘
爲蔡賊所害十一月滑州節度使安師儒以怠於軍
政爲部下所殺帝聞之乃遣朱珍李唐實襲而取之

由是遂有滑臺之地十二月僖宗降制就加帝檢校太傅改封吳興郡王食邑三千戶是歲鄭州爲蔡賊所陷刺史李璠單騎來奔帝宥而納之以爲行軍司馬宗權旣得鄭益驕帝遣裨將邏於金隄驛與賊相遇因擊之賊衆大敗追至武陽橋斬首千餘級帝每與蔡人戰於四郊旣以少擊衆常出奇以制之但患師少未快其旨宗權又以已衆十倍於帝恥於頻敗乃誓衆堅決以攻夷門旣而獲蔡之謀者備知其事遂謀濟師焉三年春二月乙巳承制以朱珍爲淄州刺史俾募兵於東道且慮蔡人暴其麥苗期以夏首回歸珍旣至淄掾旬日之內應募者萬餘人又潛襲青州獲馬千匹鎧甲稱是乃鼓行而歸四月辛亥達於夷門帝喜曰吾事濟矣是時賊將張晁屯於北郊秦賢屯於版橋各有衆數萬樹柵相連二十餘里其勢甚盛帝謂諸將曰此賊方今息師蓄銳俟其時必來攻我况宗權度吾兵少又未知珍來謂吾畏懼止於堅守而已今出不意不如先擊之乃親引兵攻秦賢寨將士踊躍爭先賊果不備連拔四寨斬首萬餘級時賊衆以爲神助庚午賊將盧塘領萬餘人於田北萬勝戍夾汴水爲營跨河爲梁以扼運路帝擇

精銳以襲之是日昏霧四合兵及賊壘方覺遂突入掩殺赴水死者甚衆盧塘自投于河河南諸賊連敗不敢復駐皆併在張旺寨自是蔡寇皆懷震讟往往軍中自相驚亂帝旋師休息大行犒賞繇是軍士各懷憤激每遇敵無不奮勇五月丙子出酸棗門自邠至未短兵相接賊衆大敗追斬二十餘里僵仆相枕宗權恥敗益縱其虐乃自鄭州親領突將數人徑入張旺寨其日晚大星殞於賊壘有聲如雷辛巳兗滑軍士皆來赴援乃陳兵於汴水之上旌旗器甲甚盛蔡人望之不敢出寨翼日分布諸軍齊攻賊寨自寅至申斬首二萬餘級會夜收軍獲牛馬輜重生口器甲不可勝計是夜宗權旺遁去遲明追之至陽武橋而還宗權至鄭州乃盡焚其廬舍屠其郡人而去始蔡人分兵寇陝雒孟懷許汝皆先據之因是敗也賊衆恐懼咸棄之而遁帝乃慎選將佐俾完緝壁爲戰守之備於是遠近流亡復歸者衆矣是時揚州節度使高駢爲裨將畢師鐸所害復有孫儒楊行密互相攻伐朝廷不能制乃就加帝簡較大尉兼領淮南節度使九月亳州裨將謝殷逐刺史宋衮自據其郡帝親領軍屯於太清宮遣霍存討平之帝之禦蔡

寇也鄆州朱瑄兗州朱瑾皆領兵來援及宗權旣敗
帝以瑄瑾宗人也又有力於已皆厚禮以歸之瑄瑾
以帝軍士勇悍私心愛之乃密於曹濮界上縣金帛
以誘之帝軍利其貨而赴者甚衆帝乃移檄以讓之
自朱瑄來詞不遜乃命朱珍侵曹伐濮以懲其姦未
幾珍伐曹州執刺史丘禮以獻遂移兵圍濮兗鄆之
蠻自茲而始矣十月僖宗命水部郎中王贊撰紀功
碑以賜帝是月帝親騎數千巡師於濮上因破朱瑄
援軍於范縣丁未攻陷濮州刺史朱裕單騎奔鄆尋
爲鄆人所敗踰月乃還十二月僖宗遣使賜帝鐵券
又命翰林承旨劉崇望撰德政碑以賜帝閏月甲寅
帝請行軍司馬李璠權知淮南留後乃遣大將郭言
領兵援送以赴揚州文德元年正月帝率師東赴淮
海行次宋州聞揚行密已拔揚州遂還是時李璠郭
言行至淮上爲徐戎所扼不克進而還帝怒遂謀伐
徐二月丙戌僖宗制以帝爲蔡州四面行營都統錄
是諸鎮之師皆受帝之制度三月庚子昭宗卽位是
月蔡人石璠領萬衆以剽陳亳帝遣朱珍率精騎數
千擒璠以獻四月戊辰魏博樂彥禎失律其子從訓
出奔相州使來乞師帝遣朱珍領上軍濟河連收黎

陽臨河二邑既而魏軍推小較羅弘信爲帥弘信既立遣使送款於汴帝優而納之遂命班師是月河南尹張全義襲李罕之於河陽克之罕之單騎出奔因乞師於太原李克用爲發萬騎以援之罕之遂收其餘衆與晉軍合勢急攻河陽全義危急遣使求救於汴帝遣丁會牛存節葛從周領兵赴之大戰於溫縣晉人與罕之俱敗於是河橋解圍全義歸於河陽因以丁會爲河陽留後五月己亥昭宗制以帝簡較侍中增食邑三千戶戊辰詔改帝鄉曰衣錦鄉里曰沛王里是月帝以兼有洛孟之地無西顧之患將大整師徒畢力誅蔡會蔡人趙德誣舉漢南之地以歸於朝廷且遣使送款於帝仍誓戮力同討宗權帝表其事朝廷因以德誣爲蔡州四面副都統又以河陽保義義昌三節度爲帝行軍司馬兼糧科應接使至是帝領諸侯之師會德誣以伐蔡敗蔡賊於汝水之上遂傳其城五日之內樹二十八寨以環之蓋象列宿之數也時帝親臨矢石一日飛矢中其左腋血漬單衣顧謂左右曰勿洩九月以糧運不繼遂班師是時帝知宗權殘孽不足爲患遂移兵以伐徐十月先遣朱珍領兵與時溥戰於吳康鎮徐人大敗連收豐蕭二

邑溥携散騎馳入彭門帝命分兵以攻宿州刺史張
 友携符印以降既而徐人閉壁堅守遂命龐師古屯
 兵守之而還是月蔡賊孫儒攻陷揚州自稱淮南節
 度使龍紀元年正月龐師古攻下宿遷縣進軍於呂
 梁時溥領軍二萬晨壓師古之軍而陣師古促戰敗
 之斬首二千餘級溥復入於彭門二月蔡將申叢遣
 使來告縛秦宗權於帳下折其足而囚之矣帝即日
 承制以叢為淮西留後未幾叢復為都將郭璠所殺
 是月璠執宗權來獻帝遣行軍司馬李璠牙較朱克
 讓監進於長安既至昭宗御延喜樓受俘即斬宗權
 於獨柳樹下蔡州平昭宗詔加帝食實封一百戶賜

莊宅各一區三月又加帝簡較大尉兼中書令進封
 東平王賞平蔡之功也大順元年四月丙辰宿州小
 將張筠逐刺史張紹光擁眾以朋時溥帝率親軍討
 之殺千餘人筠遂堅守乙卯時溥出兵暴殲山縣帝
 遣朱友裕以兵襲之敗徐軍三千餘眾獲沙陁援軍
 石君和等三十人斬於宿州城下六月辛酉淮南孫
 儒遣使脩好於帝帝表其事請以淮南節度授于儒
 焉辛未昭宗命帝為宣義軍節度使充河東東面行營
 討使時朝廷宰臣張濬將兵討太原故也八月甲寅

昭義都將馮霸殺沙陁所署節度使李克恭來降請河陽節度使朱崇節爲潞州留後戊辰李克用自率蕃漢出騎數萬以圍潞州帝遣葛從周率驍勇之士夜中啣枚犯圍而入於潞九月壬寅帝至河陽遣都將李讜引軍趨渾潞行至馬牢川爲晉人所敗帝又遣朱友裕張全義率精兵至渾州北以爲應援而崇節從周棄潞來歸戊申帝廷責諸將敗軍之罪斬李讜李重裔以徇遂班師焉十月乙酉帝自河陽赴滑臺時奉詔將討太原先遣使假道于魏魏人不從先是帝遣行人雷鄴告羅于魏旣而爲牙軍所殺

羅弘信懼故不敢從命遂通好於太原十二月辛丑帝遣丁會葛從周率衆渡河取黎陽臨河又令龐師古霍存下淇門衛縣帝徐以大軍繼其後二年春正月魏軍屯於內黃丙辰帝與之接戰自內黃至永定橋魏軍五敗斬首萬餘級羅弘信懼遣使持厚幣請和帝命止其焚掠而歸其俘弘信繇是感悅而聽命焉乃收軍屯於河上八月己丑帝遣丁會急攻宿州刺史張筠堅守其壁會乃率衆於州東築堰壅汴水以浸其城十月壬午筠遂降宿州平十一月丁未曹州裨將郭紹賓殺刺史郭饒舉郡來降是月徐將劉

知俊率衆二千來降自是徐軍不振十二月兗州朱瑾領軍三萬寇單父帝遣丁會領大軍襲之敗於金鄉界殺二萬餘衆瑾單馬遁去景福元年正月遣丁會於兗州界徙其民數千戶於許州二月戊寅帝親征鄆先遣朱友裕屯軍於斗門甲申次衛南有飛鳥止於峻堞之上鳴噪甚厲副使李璠曰將有不如意之事是夜鄆州朱瑄率步騎萬人襲朱友裕於斗門友裕拔軍南去乙酉帝晨救斗門不知友裕之退前至斗門者皆爲鄆人所殺帝追襲鄆至瓠河不及遂領兵於村落間時朱瑄尚在濮州丁亥遇朱瑄率兵將歸於鄆遂來衝擊帝策馬南馳爲賊所追甚急前有浚溝躍馬而過張歸厚援稍力戰於其後乃免時李璠與都將數人皆爲鄆軍所殺五月丙午遣朱克讓率衆暴兗鄆之麥十一月遣朱友裕率兵攻濮州下之擒刺史邵儒以獻濮州平遂命移軍伐徐州二年八月帝遣龐師古移兵攻兗駐於曲阜與朱瑾屢戰皆敗之十二月師古遣先鋒葛從周引軍以攻齊州刺史朱威告急于兗鄆旣而朱瑄以援兵至遂圍其壘乾寧元年二月帝親領大軍繇鄆州東路北次於魚山朱瑄覘知卽以兵徑至且圖速戰帝整軍出

寨時瑄瑾已陣於前須臾東南風大起帝軍旌旗失次甚懼失色帝卽令騎士揚鞭呼嘯俄而西北風驟發時兩軍皆在草莽中帝因令縱火而煙燄亘天乘勢以攻賊陣瑄瑾大敗殺萬餘人餘衆擁入清河因築京觀於魚山之下駐軍數日而還二年正月癸亥遣朱友恭帥師復伐兗遂塹而圍之未幾朱瑄自鄆率步騎援糧欲入于兗友恭設伏以敗之盡奪其餉於高吳因擒蕃將安福順安福慶二月己酉帝領親軍屯於單父以爲友恭之援四月濠壽二州復爲楊行密所陷是時太原遣將朱嚴兒李承嗣以萬騎入於鄆朱友恭遂歸於汴八月帝領親軍伐鄆至大仇遣前軍挑戰設伏於梁山以待之旣而獲蕃將史完府奪馬數百匹朱瑄脫身遁去復入於鄆十月帝駐軍於鄆齊州刺史朱瓊遣使請降瓊卽瑾之從父兄也帝因移軍至兗瓊果來降未幾瓊爲朱瑾所殺掠而殺之帝卽以其弟玘爲齊州防禦使十一月朱瑄復遣將賀環柳存及蕃將何懷寶等萬餘人以襲曹州庶解兗州之圍也帝知之自兗領軍策馬先路至鉅野南追而敗之殺戮將盡生擒賀環柳存何懷寶及賊黨三千餘人是日申時狂風暴起塵沙滿海

帝曰此乃殺人未足耳遂下令盡殺所獲囚俘風亦止焉翼日繫賀環等以示于兗帝素知環名乃釋之惟斬何懷寶於兗城之下乃班師十二月葛從周領兵復伐兗既至與朱瑾戰於壘下殺千餘衆擒其將孫漢筠已下二十人遂旋師三年正月河東李克用既破邠州欲謀爭霸乃遣蕃將張污落以萬騎寨於河北之莘縣聲言欲救兗鄆魏博節度使羅弘信慮之使來求援四月辛酉河東泛漲將壞滑城帝令決隄岸以分其勢爲二河夾滑城而東爲害滋甚是月帝遣許州刺史朱友恭領兵萬人渡淮以便宜從事時洪鄂二州累遣使求援故有是行五月命葛從周統軍屯于洹水以備蕃軍六月李克用帥蕃漢諸軍營于斥丘遣其男落落將鐵林小兒三千騎薄於洹水從周與戰大敗之生擒落落以獻克用悲駭請修舊好以贖其子帝不許遂執落落送于羅弘信斬之越七日我軍還屯湯畱以伐鄆八月復壁於洹水是時昭宗幸華州遣使就加帝簡較太師守中書令四年正月帝以洹水之師大舉伐鄆辛卯營于濟水之次麗師古令諸將撤木爲橋乙未夜師古以中軍先濟聲振于鄆朱瑄聞之棄壁夜走葛從周逐之至中

都北擒瑄并其妻男以獻尋斬汴橋下鄆州平乙亥
帝入於鄆以朱友裕爲鄆州兵馬留後時帝聞朱瑾
與朱儼兒在豐沛間搜索糧饋惟留康懷英以守兗
州帝因乘勝遣葛從周以大軍襲兗懷英聞鄆失守
俄又我軍大至乃出降朱瑾朱儼兒遂奔淮南兗海
沂密等州并平乃以葛從周爲兗州留後八月陝州
節度使王珙遣使來乞師是時珙弟琦實爲蒲帥迭
相憤怒日尋干戈而珙兵寡故來求援帝遣張存敬
揚師厚等領兵赴陝旣而與蒲人戰于猗氏大敗之
九月帝以兗鄆旣平將士雄勇遂大舉南征命龍師
古以徐宿宋滑之師直趨清口葛從周以兗鄆曹濮
之衆徑赴安豐淮人遣朱瑾領兵以拒師古因決水
以浸軍遂爲淮人所敗師古歿焉葛從周行及濠梁
聞師古之敗亦命班師光化元年正月帝遣葛從周
統諸將畧地於山東遂次于邢洺三月昭宗以帝兼
領天平軍節度使餘如故四月滄州節度使盧廷彥
爲燕軍所攻棄城奔于魏魏人送于汴是月帝以大
軍至鉅鹿屯於城下敗晉軍萬餘衆於青山口俘馬
千餘匹丁卯遣從周分兵攻洺州斬刺史邢善益擒
將五十餘人五月己巳邢州刺史馬師素棄城遁去

辛未惠州刺史袁奉滔自剄而死五日之內連下三州因以葛從周兼邢州昭義軍節度留後帝遂班師是時襄州節度使趙凝聞帝軍有清口之敗密附於淮夷七月帝遣氏叔琮率師伐之未幾其泌州刺史趙璠越墉來降隨州刺史趙琳臨陣就擒二年正月淮南楊行密舉全吳之衆精甲五萬以伐徐州帝領大軍禦之行密聞帝親征乃收軍而退時幽州節度使劉仁恭大舉蕃漢兵號十萬以伐魏遂攻陷貝州州民萬餘戶無少長悉屠之進攻魏州魏人來乞師帝遣朱友倫張存敬李思安等先屯于內黃帝遂親

征三月與燕軍戰于內黃北燕軍大敗殺二萬餘衆奪馬二千餘匹擒都將單無敵已下七十餘人是月葛從周自山東領其部衆馳以救魏翼日乘勝諸將張存敬已下連破八寨遂逐燕軍北至於臨清擁其殘寇於御河溺死者甚衆仁恭奔於滄州六月帝妻丁會爲潞州節度使以李罕之疾亟故也又遣葛從周繇固鎮路入于潞州以援丁會七月壬辰朔海陵漢賓擁所部三千奔于淮南戊戌晉人陷澤州帝遣召葛從周於潞留賀德倫以守之未幾德倫爲晉人所逼遂棄潞而歸繇是潞州復爲晉人所有十一月

陝州都將朱簡殺留後李璠自稱留後送款于帝三年四月遣葛從周以充鄆滑魏之師伐滄州五月庚寅攻德州拔之梟刺史傅公和於城上巳亥進攻浮陽六月燕師劉仁恭大舉來援從周與諸將逆戰于乾寧軍老鴉隄大破之殺萬餘衆俘其將佐馬慎交巳下百餘人旣而以連雨遂班師八月河東遣李進通襲沿洛州執刺史朱紹宗帝遣葛從周自鄴縣渡漳水屯于黃龍鎮親領中軍涉洛而寨晉人懼而宵遁洛州復平九月帝以仁恭進通之入寇也皆繇鎮定爲其囊橐卽以葛從周爲上將以伐鎮州遂攻下臨

城渡滹沱以環其城帝領親軍繼至鎮帥王鎔懼納質請盟仍獻文繒二十萬以犒戎士帝許之十月晉人以帝宿兵於趙遂南下大行急攻河陽留後侯言與都將閻寶力戰固守僅而獲全十一月以張存敬爲上將自甘陵發軍北侵幽薊連拔瀛莫二郡遂移軍以攻中山定帥王郜以精甲二萬戰于懷德亭盡殪之郜懼奔于太原遲明大軍集于城下郜季父處直持印鑰乞降亦以繒帛三十萬爲獻帝卽以處直代郜領其鎮焉是月燕人劉守光赴援中山寨于易水之上繼爲康懷英張存敬等所敗斬獲甚衆繇是

河朔知懼皆弭伏焉是歲唐佐軍中尉劉季述幽耶宗於東宮內立皇子德王裕爲帝仍遣其養子希度來言願以唐之神器輸於帝時帝方在河朔聞之遽還于汴大計未決會李振自長安使廻因言於帝曰夫豎刁伊戾之亂所以資霸者之事也今闕豎幽辱天子王不能討無以令諸侯帝悟因請振復使于長安與時宰潛謀反正天復元年正月乙酉朔唐宰相崔裔潛使人以帝密旨告於侍衛軍將孫德昭已下令誅左右中尉劉季述王仲先等卽時迎昭宗於東內御樓反正癸巳降制進封帝爲梁王酬反正之功

也昭宗之廢也汴之邸吏程巖牽昭宗衣下殿帝聞之召巖至汴折其足送于長安杖殺之是時河中節度使王珂結援於太原帝怒遣大將張存敬率將泚河繇含山路鼓行而進戊申攻下絳州壬子晉州刺史張漢瑜舉郡來降帝卽以大將侯言權領晉州何緡權領絳州晉絳平巳未大軍至河中存敬命繚其垣而攻之壬戌蒲人颺素幡以請降庚午帝至河中以張存敬權領河中軍府事河中平帝乃東遷是月李克用遣牙將張特來聘請尋舊好帝亦遣使報命三月癸未朔帝歸自河中是月遣大將賀德倫氏叔琮

領大軍以伐太原叔琮等自大行路入魏博都將張文恭自磁州新口入葛從周以兗鄆之衆自土門路入洛州刺史張歸厚以本軍自馬嶺入定州刺史以本軍自飛狐入晉州侯言自陰地入澤州刺史李存璋棄郡奔歸太原叔琮引軍逼潞州節度使遷乞降河東屯將李審建王周領步軍一萬騎二千詣叔琮歸命乃進軍趨太原四月乙卯大軍出石會關營於洞渦驛都將白奉國自井陘入收承天軍張歸厚引兵至遼州刺史張鄂迎降氏叔琮日與諸軍至陽城下城中雖時出精騎來戰然危蹙至甚將謀遁矣會叔琮

以芻糧不給遂班師五月癸卯昭宗以帝兼領護國軍節度使河中尹六月庚申帝發自大梁丁卯視事於河中七月甲寅帝東還梁邸十月戊戌奉密詔赴長安是時朝廷旣誅劉季述以韓全誨張弘彥爲兩軍中尉袁易簡周敬容爲樞密使是時軍國大政專委宰相崔胤每事裁抑宦官宦官側目崔一日於便殿奏欲盡去之全誨等屬垣聞之嘗於昭宗前祈哀自訴自是昭宗勅崔每有密奏令進囊封全誨等乃訪京城美婦人十數以進使求宮中陰事昭宗不悟崔謀漸泄中官視崔皆裂以重賂甘言誘藩臣以爲

城社時因讎聚則相向流涕時崔掌三司貨泉全誨等教禁兵伺崔出聚而呼譟訴以冬衣減損又於昭宗前訴之昭宗不得已罷崔知政事崔怒急召帝請以兵入輔故有是行戊申行次河中同州留後司馬鄴華之幕吏也舉郡來降辛亥駐軍於渭濱華師韓建遣使奉牋納款又以銀三萬兩助軍是日行次零口癸丑聞長安亂昭宗爲闈官韓全誨等劫遷西幸鳳翔蓋避帝之兵鋒也翼日遂命旋師夕次于赤水乙卯大軍集于華州下城韓建惶駭失措卽以城降丙辰帝表建權知忠武軍事促令赴任同華二州平是時唐

太子太師盧知猷等二百六十三人列狀請帝速請迎奉已未遂帥諸軍發自赤水壬戌次于咸陽偵者云天子昨暮至岐山旦日宋文通扈蹕入其闈矣是時岐人遣大將符道昭領兵萬人屯於武功以拒帝帝遣唐懷英敗之虜甲士六千餘衆乙丑次于岐山文帝遣使奉書自陳其失請帝入覲丙辰及岐闈文通渝約閉壁不獲通復次于岐山是時昭宗累遣使齎朱書御札賜帝遣帝收軍速還本道帝診之曰此必文通全誨之謀也皆不奉詔癸酉飛章奉辭且移軍北伐乙亥至邠州節度使李繼徽舉城降繼徽因

請去文通所賜李姓復本宗楊氏又請納其帑以爲質帝皆從之仍易其名曰崇本邠州平巳丑唐丞相崔喬京兆尹鄭元規至華州以速迎奉爲請許之二年正月帝復次於武功岐人堅壁不下乃廻軍於河中二月間晉軍大舉南下聲言來援鳳翔帝遣朱友寧帥師會晉州刺史氏叔琮以禦之帝以大軍繼其後三月友寧叔琮與晉軍戰于晉州之北大敗之生擒克用男廷鸞帝喜謂左右曰此岐人之所恃也今旣如此岐之變不久矣四月岐人遣符道昭領大軍屯于號縣康懷帥驍騎敗之丁酉唐丞相崔喬自華

來謁帝屢述艱運危急事不可緩又慮羣閹擁昭宗幸蜀且告帝爲之動容崔將辭啓宴于府署帝舉酒崔情激於哀因自持樂版聲曲以侑酒帝甚悅座中以良馬珍玩賚之旣行命諸將繕戎具五月丁巳帝復西征六月丁丑次於號縣癸未與岐軍大戰自辰至午殺萬餘衆擒其將拔數百人乘勝遂逼其壘七月丙午岐軍復出求戰帝軍不利是月遣孔勅帥師取鳳隴城三州皆下之是時岐人相率結寨於諸山以避帝軍帝分兵以討之浹旬之內竝平之九月甲戌帝以岐軍諸寨聯結稍盛因親統千騎登高診之

是時帝以岐人堅壁不戰且慮師老思欲旋旆以歸河中因密召上將數人語其事時親從指揮使高季昌獨削出抗言曰天下維傑窺此舉者一歲矣今岐人已困願少俟之帝嘉其言因曰兵法以正理以奇勝奇者詐也乘機集事必由是乎乃命季昌密募人入岐以給之尋有騎士馬景堅願應命且曰是行也必無生理願戮其孥帝悽然止其行景固請乃許之明日軍出諸寨屏匿如無人景因躍馬西走直叩岐圍詐以軍怨東遁爲告且言列寨尚留萬餘人俟夕將遁矣宜速掩之李茂貞信其言遽啓二扉悉衆來

寇時諸軍已介馬待之中軍一鼓百營俱進又分遣數騎以據其圍岐人進不能駐其趾退不能入其壘殺戮蹂踐不知其數茂貞繇是喪膽但閉壁而已十一月癸卯鄜帥李周彝統兵萬餘人屯于岐之北原與城中舉烽以相應翼日帝以周彝旣離本部鄜時必無守備因命孔勅乘虛襲下之甲寅鄜州平周彝聞之收軍而遁茂貞旣失鄜州之援愕然有瓦解之懼繇是議還警蹕誅闍寺以自贖焉三年正月甲寅岐人啓壁昭宗降使宣問慰勞兼傳密旨尋又命翰林學士韓渥趙國夫人龐顏齋詔押賜帝紫金酒器

御衣玉帶丙辰華州留後李存審遣飛騎來告青州節度使王師範遣牙將張厚輦甲冑弓槊詐言來獻欲盜據州城事覺已擒之矣是日師範又遣其將劉鄩盜據兗州丁巳昭宗遣中使押送軍容使韓全誨已下三十餘人首級以示帝甲子昭宗發離鳳翔幸左劔寨權駐蹕帝營帝素服待罪昭宗命學士傅宣免之帝卽入見稱罪拜伏者數四旣而促召升殿密通御座且曰宗廟社稷是卿再造朕與親屬是卿再生因解所御玉帶面以賜帝亦以玉鞍勒馬金器紋錦御饌酒果等躬自拜進焉及翠華東行帝匹馬前導十餘里宣令止之已巳昭宗至長安謁太廟御長樂樓禮畢謂帝曰朕生入舊京是卿之力也自古救君之危曾無有如是者况今日再及清廟得親奉觴酒奠於先皇帝室前卿之德朕知不能報矣卽召帝執手聲淚俱發者久之翼日誅宦官第五可範等五百餘人于內侍省三月庚辰制以帝爲守太尉兼中書令宣武宣義天平護國等軍節度使諸道兵馬副元帥加食邑三千戶實封四百戶仍賜回天再造竭忠守正功臣戊戌帝建旆東還昭宗御延熹樓送之旣醉遣內臣賜帝御製楊柳詞五首三月戊午至大梁

時以青州未平命軍士休澣以俟東征四月丙子帝
巡師於臨朐亟命逼其城與青州戰于城下大敗之
是夕淮將王景仁以所部援軍宵遁帝遣楊師厚追
及輔唐殺千人乘勝攻下密州八月戊辰以伐叛之
柄委于楊師厚帝乃東還九月癸卯師厚率大軍與
王師範戰于臨朐青軍大敗殺萬餘人并擒師範弟
既克卯時徙寨以逼其城辛亥偏將劉重霸擒棣州
刺史邵播來獻播師範之謀主也帝命斃之戊午師
範舉城請降青州平翼日分命將較畧地於登萊淄
棣等州皆下之繇是東漸至海皆爲梁土也帝復命

師範權知青州軍州事師範乃請以錢二十萬貫犒
軍帝許之十月辛巳護駕都指揮使朱友倫因擊鞠
墮馬卒于長安節至帝大怒以爲唐室大臣欲謀叛
已致友倫暴死十一月丁酉青將劉鄩舉兗州來降
鄩王師範之將也師範令竊據兗州久之及聞師範
降鄩乃歸命帝以鄩善事其主待之甚優尋署爲元
帥府都押牙權知鄆州留後天祐元年正月己酉帝
發自大梁西赴河中京師聞之爲之震懼是時將議
迎駕東幸洛陽慮唐室大臣異議帝乃密令護駕都
指揮使朱友諒矯昭宗命收宰相崔裔京兆尹鄭元

規等殺之時又邠岐兵士侵逼京畿帝因是上表
請昭宗幸洛昭宗不得已而從之帝乃率諸道丁匠
財力同構洛陽宮不數月而成二月乙亥昭宗駐蹕
於陝帝自河中來覲謁見行營因灑涕而言曰李茂
貞等竊謀禍亂將迫乘輿老臣無狀請陛下東遷爲
社稷大計也昭宗延命於寢室見何皇后面賜酒器
及衣物何后謂帝曰此後大家大婦委身於全忠矣
因歔歔泣下後數日帝開宴於陝之私第請駕臨幸
翼日帝辭歸洛陽昭宗開內宴時有宮人與昭宗附
耳而語韓建躡帝之足帝遽出以爲圖已因連上章
請車駕幸洛三月丁未昭宗制以帝兼判左右神策
及六軍諸衛事是時昭宗累遣中使及內夫人傳宣
謂帝曰皇后方在草蓐未任就路欲以十月幸洛帝
以陝州小藩非萬乘从留之地時以四月內東幸閩
月丁酉昭宗發自陝郡壬寅次于穀水是時昭宗左
右唯小黃門及打毬供奉內園小兒共二百餘人帝
猶忌之是日密令醫官許昭遠告變乃設饌於別幄
召而盡殺之皆坑于幕下先是選二百餘人形貌大
小一如內園人物之狀至是使一人擒二人縊於坑
所卽蒙其衣及戎具自飾昭宗初不能辨久而方察

自是昭宗左右前後皆梁人矣甲辰車駕至洛都帝與宰相百官導駕入宮乙卯昭宗以帝爲宣武宣義護國忠武四鎮節度使時帝請以鄆州授張全義故有此命五月丙寅昭宗宴羣臣曰昨來御樓前一夜亡失赦書賴梁王收得副本不然誤事宰執不得無過矣是日宴次昭宗入內召帝於內殿曲宴帝不測其事不敢奉詔又曰卿不欲來卽令敬翔入來帝密遣翔出乃止己巳奉辭東歸乙亥至大梁六月帝遣都將朱友裕率師討邠州節度使楊崇本叛故也癸丑帝西征遂朝於洛陽七月甲子昭宗宴帝於文思殿乙丑帝發東都壬申至河中八月壬寅昭宗遇弒於大內遺制以輝王祝爲嗣乙巳帝自河中引軍而西癸丑次於永壽邠軍不出九月辛未班師十月癸巳至洛陽詣西內臨於梓宮前畢祇見于嗣君辛丑制以帝至自西征十一月辛酉光州遣使來求援時光州歸款於帝尋爲淮人所攻故來乞師戊寅帝南征度淮次于霍丘大掠盧壽之境淮人乃棄光州而去二年正月庚申進攻壽州壽人堅壁不出丁亥帝自霍丘班師二月辛卯帝至自南征甲午青州節度使王師範至大梁帝待以賓禮尋表授河陽節度

七月辛酉天子賜帝迎鑿紀功碑樹于洛陽庚午遣
大將軍楊師厚率前軍討趙凝于襄州辛未帝南征
表趙凝罪狀請削奪官爵八月楊師厚進收唐鄧復
鄧隨均房等七州帝駐軍漢江北自循江干經度濟
師之所九月甲子師厚於陰谷江口造梁以濟師趙
凝率兵二萬振于江濱師厚麾兵進擊襄人大敗殺
萬餘衆乙丑趙凝焚其州率親軍載輕舸泐漢而遁
丙寅帝濟江至中流舟壞將沒者數四比及岸舟沉
是日入襄城帝因周視府署其帑藏悉空惟於西廡
下有一亭窓戶儼然扃鎖甚密遂令破鑲啓扉中有
一大匱緘鎖甚至又令破其匱內有金銀數百錠帝
因歎曰亂兵旣入公私財貨固無孑遺矣此帑當有
陰物主之不令嘗人所得俟我以有之邪遂以百餘
錠賜楊師厚襲荊州留後趙明并城上峽奔蜀荆襄
二州平帝以都將賀環權領荊州楊師厚權領襄州
卽表其事十月丙戌朔天子以帝爲諸道兵馬元帥
辛卯帝自襄州引軍由光州路趨淮南將發敬翔切
諫請班師以全軍勢帝不聽壬辰次於棗陽遇大雨
頗阻師行之勢軍至壽春壽人堅壁清野以待帝帝
乃退舍於正陽十一月丙辰大軍北濟帝至汝陰

悔淮南之行踪撓尤甚丁卯帝至自南征辛巳天子命帝爲相國總百揆以宣武宣義天子護國天雄武順佑國河陽義武昭義保義昭武定泰寧平盧章國武寧忠義荆南等二十一道爲魏國進封帝爲魏王入朝不趨劔履上殿讚拜不名兼備九錫之命癸未唐中書門下奏中書印已送相國中書公事權用中書省印甲申中書門下奏天下州縣名與相國魏王家諱同者請易之十二月乙酉朔帝讓相國魏王九錫之命丙戌京百司各差官齋本司須知孔目並印赴魏國送納甲午天子以帝堅讓九錫之命乃命宰相柳璨來使且述揖讓之意焉丁酉帝又讓九錫之命詔畧曰但以鴻名難掩懿實須彰宜且徇於奏陳未便行於典冊又改諸道兵馬元帥爲天下兵馬元帥是時帝以唐朝百官服飾多闕乃製造逐色衣服請朝廷等第賜之其所給俸錢仍請自來年正月全支三年正月幽滄稱兵將寇于魏魏人來乞師且以牙軍驕悍謀欲誅之遣親吏臧延範密告于帝帝陰許之乙丑北征先是帝之愛女適羅氏是月卒於鄴城因以兵伏數千事實於橐中遣客將馬嗣勳領長直軍千人雜以工匠丁夫肩其橐而入于魏聲言爲

帝女以設祭魏人信而不疑庚午夜嗣勳率其衆與羅紹威親軍數百人同攻牙軍遲明盡殺之死者七千餘人洎于嬰孺亦無留者是日帝次于內黃聞之馳騎至魏時魏之大軍方與帝軍同伐滄州聞牙軍之死卽時奔還帝之軍追及歷亭殺賊幾千餘衆乃擁大將史仁遇保于高唐帝遣兵圍之是月天子詔河南尹張全義部署修制相國魏王法物三月甲寅天子命帝摠判鹽鐵度支戶部等三司事帝再上章切讓之乃止四月癸未攻下高唐軍民無少長皆殺之生擒逆首史仁遇以獻命支解之未幾又攻下涇

博具衛等州皆謂魏軍殘黨所據故也是時晉人圍

邢州刺史牛存節堅壁固守帝遣符道昭帥師救之晉人乃遁去五月帝畧地于洛州旣而復入于魏七月己未自魏班師是日收復相州自是魏境悉平壬申帝歸自魏八月甲辰以滄州未平復命北征九月丁卯營于長蘆一夕帝夢白龍附于兩肩左右瞻顧可畏怵然驚悟十月辛巳邠州楊崇本以鳳翔邠寧涇廊秦隴之衆合五六萬來寇屯于美原列十五寨其勢甚盛帝命同州節度使劉知俊都將康懷英帥師禦之知俊等大破邠寇殺二萬餘衆奪馬三千餘

匹擒其列校百餘人楊崇本胡章僅以身免十一月
庚戌康懷英乘勝進軍遂收鄜州十二月乙丑帝以
文武常參官每月一五九日赴朝奏請備廊廡詔從
之閏月晉人燕人同攻潞帥丁會舉城降于太原帝
聞之遂自長蘆班師以寨內糗糧山積帝命焚之滄
帥劉守文以城中絕食因致書于帝乞留餘糧以救
饑民帝爲留十餘困以與之四年正月丁亥帝廻自
長蘆次于魏州節度使羅昭威以帝廻軍慮有不測
之患由是供億甚至因密以天人之望切陳之帝雖
拒而不納然心德之壬寅帝至自長蘆甲辰天子遣
御史大夫薛貽矩來傳禪代之意貽矩謁帝陳北面
之禮帝揖之升階貽矩曰殿下功德及人三靈所卜
已定皇帝方議裁詔行舜禹之事臣安敢違旣而拜
伏於砌下帝側躬以避之四月內出傳國寶玉冊受
禪寶及文物儀仗朝于梁國改元開平

冊府元龜

閏位部

卷之二百八十七

州府元龜 勳業五

入

册府元龜

巡按福建監察御史臣李嗣京訂正

知閩縣事 臣曹鼎臣參閱

知建陽縣事 臣黃國琦較釋

閩位部 七

紹位 年號

紹位

夫易著繼明之義傳有世及之文皆所以紹祖考而保成基也其或叔世艱虞庶邦離析或專制寓內或奄據一隅端委纂戎傳世承祀或正位儲副用禮而

册府元龜 閩位部

卷之二十一

陞或入繼大宗以恩而立或克平多難嗣守家邦或始因顧託潛圖篡奪何嘗不蹈道者逢吉長惡者終凶斯以見天無嘗親民無嘗心鬼神饗於有德億兆歸於至仁者矣

秦二世皇帝胡亥始皇帝之少子

王欽若等曰始皇事迹悉具閏位

業門蜀吳以下皆倣此

始皇三十七年十月行出遊會稽并海上北抵瑯琊丞相李斯中軍府令趙高兼行符璽令

事皆從始皇有二十餘子長子扶蘇以數直諫始皇

始皇使監兵上郡蒙恬為將胡亥愛請從始皇許

之餘子莫從

辯上隱姓名遺秦將章邯書曰李斯為

十八子也

其年七月始皇帝至沙丘病甚令趙高為

書賜公子扶蘇曰以兵屬蒙恬與喪會咸陽而葬書

已封未授使者書及璽皆在趙高所獨子胡亥丞相

李斯趙高及幸宦者五六人知餘羣臣皆莫知也李

斯以為始皇在外晏駕無真太子故秘之置始皇居

輜輶車中

一作輜車

百官奏事上食如故宦者輒從輜輶

車中可諸奏事趙高因留所賜扶蘇璽書與丞相李

斯謀詐為受始皇詔丞相立子胡亥為太子更為書

賜扶蘇死至咸陽發喪太子立為二世皇帝

子嬰二世之兄子趙高殺二世而立子嬰為秦王

蜀後主禪先主子章武元年立爲太子三年四月先
主殂於永安宮五月後主襲位於成都時年十七
吳廢帝會稽王亮大帝之子赤烏十三年立爲太子
太元二年大帝寢疾大將軍諸葛恪爲太子太傅會
稽太守滕喬爲大嘗竝受詔輔太子明年四月帝薨
太子卽尊號

景帝休太帝第六子大元二年封琅琊王居虎林後
徙會稽太平三年九月戊午休從弟大將軍緄以兵
召大臣會宮門黜亮爲會稽王使宗正孫楷與中書
郎董朝迎休十月戊寅及布寨亭武衛將軍孫恩行

丞相率百僚以乘輿法駕迎於永昌亭築宮以武帳
爲便殿止任使孫楷先見恩行楷還休乘輦進羣臣
再拜稱臣休升殿謙不卽御坐正東廂戶曹尚書前
卽階下讚丞相奉璽符休三讓羣臣三請休曰將相
諸侯咸推寡人寡人敢不承受璽符羣臣以次奉引
休就乘輿百官陪位緄以兵千人迎於半野拜於道
側休下車答拜卽日御正殿

後主皓大帝孫廢太子和之子初封烏程侯就國永
安七年七月景帝休殂是時蜀初亡而交阯攜叛國
內震懼貪得長君左典軍荀彧昔爲烏程令與皓相善

稱皓才識明斷是長沙桓王之疇也又加之好學奉
遵法度屢言之于丞相濮陽興左將軍張布說休妃
太后朱氏欲以皓爲嗣朱曰我寡婦人安知社稷之
慮苟吳國無隕宗廟有賴可矣於是遂迎立皓時年
二十三

宋少帝義符武帝長子永初元年武帝受禪立爲皇
太子三年五月癸亥武帝晏駕是日太子卽皇帝位
文帝義隆武帝第三子永初元年封宜都王景平二
年五月江州刺史檀道濟楊州刺史王弘入朝乙酉
宣太后令廢少帝爲榮陽王立義隆令曰宜都王仁

明孝弟著自幼辰德業冲粹識心明允宜纂洪統光
臨億兆主者詳依典故以時奉迎未亡人嬰此百罹
雖存若殞永悼情事撫心摧塞是日檀道濟入守朝
堂六月傅亮率行臺迎義隆於江陵八月丁酉於中
堂卽皇帝位以徐羨之爲司徒傅亮爲尚書令時有
司奏車駕依舊臨華林園聽訟詔曰政刑多所未悉
可先二公推訊元嘉二年羨之與亮上表歸政曰臣
聞元首司契運樞成務臣道代終事盡宣翼冕旋之
道理絕於上皇拱已之事不行於中古故高宗不言
以三齡爲斷冢宰聽政以再基爲節百王以降罔或

不然陛下聖德紹興負荷洪業億兆顒顒思陶盛化
而聖旨謙挹委成羣司自大禮告終鑽燧三改大明
佇災遠邇傾屬臣等雖率誠屢聞未能仰感敢藉品
物之情謹因蒼生之志伏願陛下遠存周文日昃之
道近思皇室締構之艱時覽萬機躬親朝政廣闢四
聰博詢庶業則雍熙可臻有生幸甚帝未許羨之等
重曰近陳寫下情言爲心罄奉被還詔覽許未迴豈
惟愚臣秉心有在詢之朝野人無異議何者形風四
方實繫主德一國之事本之一人雖世代不同時殊
風異至於主運臣贊古今一揆未有渾心委任而休
明可期此之非宣布自遐邇臣等荷遇二世休戚以
均情爲國至豈容順默重披丹心冒昧以請帝猶辭
羨之等又固諫曰此表披陳辭誠俱盡詔旨冲遠未
垂聽納三復屏營伏增憂歎臣聞克隆先構幹蠱之
盛業昧旦丕顯帝王之高義自皇宋創運英聖有造
殷憂未闕艱患仍纏賴天命有底聖明承業時屯國
故猶在民心太山之安未易可保昏明隆替繫在聖
躬斯誠周詩夙興之辰殷王待旦之日豈得無爲拱
已復玄古之風逡巡虛挹詢匹夫之事伏願以宗廟
爲重百姓爲心弘大業以嗣先軌隆聖道以增前烈

愚瞽所獻情盡於此乃許之

孝武皇帝駿文帝第三子元嘉十二年封武陵王累遷
都督江州荊州之江夏豫州之西陽晉熙新蔡四郡
諸軍事三十年元凶劭弒逆帝率眾入討荊州刺史
南譙王義宣雍州刺史臧質並舉義兵四月丙寅次
江寧丁卯大將軍江夏王義恭來奔奉表上尊號戊
辰至于新亭己巳即皇帝位改新亭為中興亭五月
甲戌輔國將軍申坦克京城乙亥輔國將軍朱脩之
克東府丙申克定京邑劭及始興王濬諸同逆竝伏
誅

前廢帝子業武帝長子孝建元年立為皇太子八年
閏五月庚申即皇帝位年十三以太宰江夏王義恭
錄尚書事

明帝或文帝第十一子元嘉二十五年封淮陽王二
十九年改封湘東王永光元年出為豫州刺史都督
南豫豫司江西州揚州之宣城諸軍事景和末入朝
被留時廢帝疑畏諸父將加禍害帝與腹心阮佃夫
李道兒等密謀弒廢帝於後堂升西堂登御座召見
諸大臣雖未即位凡眾事悉稱令書施行十二月丙
寅即皇帝位

後廢帝昱明帝長子泰始二年立為皇太子泰豫元年四月庚子即皇帝位

順帝準明帝第三子泰始七年封安成王為撫軍將軍前廢帝即位初為揚州刺史元徽二年加車騎將軍都督揚南豫二州諸軍事四年進號驃騎大將軍

開府儀同三司班劍三十五人是年七月戊子夜後廢帝殂奉迎入居朝堂壬辰即皇帝位

南齊武帝熙太祖長子建元元年立為皇太子四年三月壬戌即皇帝位

鬱林王昭業武帝子文惠太子長懋之長子也永明十一年正月長懋薨四月立為皇太孫居東宮七月

戊寅即皇帝位

海陵王昭文鬱林王弟也永明四年封臨汝公十一年封新安王隆昌元年七月丁酉明帝為大將軍廢

鬱林王立昭文為帝宣皇太后令曰新安王體自文皇獻哲天秀宜入嗣鴻業永寧四海即以禮奉迎是

日即皇帝位以明帝為大將軍錄尚書事

明帝鸞太祖兄始安王道生之子永明十一年七月武帝遺詔為侍中尚書令隆昌元年加鎮軍大將軍

太傅宣城王是年七月廢鬱林王立海陵王十月又

冊府元龜

閏位部

卷之百八十八

七

廢之宣皇太后令曰太傅宣城王遺體宣皇鍾慈太祖識冠生民功高造物符表夙著謳頌有在宜入承寶命式寧宗祏癸亥即皇帝位

東昏侯寶卷明帝第二子建武元年立為皇太子永泰元年七月乙酉即位

和帝寶融明帝第八子建武元年封隋郡王永元元年改封南康王持節督荆雍益寧梁南北秦七州軍

事西中郎將荊州刺史二年十一月甲寅長史蕭穎胄殺輔國將軍巴西梓潼二郡太守劉山陽奉雍州

刺史蕭衍舉義兵以衍為持節都督前鋒諸軍事左將軍穎胄為右將軍都督行臺諸軍事十二月壬辰

驍騎將軍夏侯亶自京師至江陵稱宣德太后令曰西中郎將南康王宜纂承皇祚光臨億兆方俟清宮

未即大號可且封宣城南瑯琊南東海東陽臨安新安尋陽南郡竟陵宜都十郡為宣城王相國荊州牧

加黃鉞置僚屬選百官西中郎將南康國金如故須軍次近路王者詳依舊典法駕奉迎三年正月建牙

于城南二月群僚上尊號立宗廟及南北郊三月乙巳即皇帝位十二月丙寅雍州刺史王國珍侍中張

楞廢東昏侯建康城平封東昏侯為涪陵王

梁簡文帝綱高祖第三子昭明太子統母弟天監五年封晉安王大通三年立為皇太子太清三年五月辛巳即皇帝位

元帝繹高祖第七子天監十三年封湘東王太清元年為荊州刺史都督荆雍九州諸軍事三年三月侯景寇建業高祖密詔帝為侍中假黃鉞都督中外諸軍事司徒承制徵兵討景是年簡文帝為景立明年改元太寶又明年逼禪於豫章王棟改元天正而帝在江陵只稱太清五年又明年三月王僧辨等平侯景傳其首至江陵十一月丙子即帝位

敬帝方智元帝第九子承聖二年以晉安王出為江州刺史三年十一月江陵為西魏所陷太尉楊州刺史王僧辨司空南徐州刺史陳霸先等定議以帝為太宰承制奉迎還京師四年二月入居朝堂三月北齊遣其上黨王高渙送貞陽侯蕭淵明來主梁嗣至東關吳興太守裴之橫與戰敗績僧辨率眾出屯姑熟七月辛丑僧辨納淵明自採石濟江甲辰入於京師以帝為皇太子九月甲辰霸先舉義襲殺僧辨黜淵明丙午即皇帝位

陳高祖紀云初北齊之請納貞陽也高祖以為不可遣使請僧辨若爭之反復數四僧辨竟不從高祖居嘗憤歎密謂所親曰武皇雖磐石之宗遠布四海至於克雪

恥寧濟艱難惟孝元而已功業之盛前代未聞我與王公俱受重寄語未絕音聲猶在耳豈期一旦乃有異圖嗣主高祖之孫元皇之子海內屬目天下宅心竟有何辜坐致廢黜遠求夷狄假立非次觀其此情亦可知矣乃密賜其袍數千領及錦綵金銀以為賞賜之具九月壬寅高祖詔徐度侯安都周文育等謀之仍部署將士分賞金銀綵帛水陸俱進是夜發南徐州討王僧辨甲辰高祖步軍至石頭前遣勇士自城北踰入時僧辨方視事外白有兵俄而兵自內出僧辨遽走與其第三子鎮相遇俱出閣右尚數十人苦戰高祖大兵尋至僧辨眾寡不敵走登城南門樓高祖因風縱火僧辨窮迫乃就擒是夜溢僧辨及鎮丙午貞陽遜位百寮奉晉安王上表勸進十月巳酉晉安卽位

後梁宣帝答昭明太子統第三子中大通三年封岳陽郡王大同元年出為雍州刺史太清三年高祖以答兄江東王譽為湘州刺史徙湘州刺史張讚為雍

州以代答屬侯景寇建業答不受代西魏恭帝元年後周太祖輔政令柱國子謹平江陵立答為梁主居江陵東城資以江陵一州之地其襄陽所統東歸于魏答稱皇帝於其國

孝明帝歸宣帝太子答殂太子嗣位

後王琮明帝歸之子初封東陽王尋立為太子歸殂太子嗣位後歸於隋

陳世祖文帝舊高祖兄始興昭烈王之長子永定初封臨川郡王三年率兵城南皖是年六月丙午高祖遺詔徵入纂位甲寅至自南皖入居中書省皇后令

曰昊天不弔上玄降禍大行皇帝奄捐萬國率土哀號普天如喪窮酷煩冤無所迫及諸孤藐爾反國無期須立長主以寧寓縣侍中安東將軍臨川王椿體自景皇屬惟猶子建殊功於牧野敷盛業於戡黎納麓時敘之辰負宸乘機之日竝佐時雍是同草創祧祏所繫遐邇宅心宜奉天宗嗣膺寶籙使七廟有奉兆民寧晏未亡人假延餘息嬰此百罹尋經纏綿興言感絕帝固讓至于再三羣公卿士固請其日卽皇帝位於太極前殿

廢帝伯宗文帝嫡長子永定元年立爲臨川王世子

文帝嗣位立爲皇太子天康元年四月癸酉卽皇帝位於太極前殿詔曰上天降禍大行皇帝奄捐萬國攀號靡及五內摧殞朕以涼德嗣應寶命熒熒在疚懼其綴旒方賴宰輔救其不逮其令內外文武各復其職遠方悉停奔赴

高宗皇帝瑛始興昭烈王第二子文帝嗣位封安城王廢帝光大二年累加大傅領司徒十一月甲寅慈訓太后令降廢帝爲臨海郡王以帝入纂令曰太傅安成王固天生德齊聖廣淵二后鍾心三靈佇眷自前朝不念任摠邦家威惠相宣刑禮兼設指揮嘯叱

湘郢廓清闢地開疆荆益風靡若太戊之承殷曆中
宗之奉漢嗣較以功名曾何髣髴且地彰玉璽天表
長堦 王欽若等曰是歲五月帝為
太傅獻玉璽六月堦星見 布新除舊禎祥咸

顯文皇知子之監事甚帝堯傳弟之懷又符大伯今
可還申曩志崇立賢君方固宗祧載貞辰象中外宜
依舊典奉迎輿駕未亡人不幸屬此殷憂不有崇替
容危社稷何以拜祠高寢歸附武園攬筆潸然兼懷
悲慶三年正月甲午即皇帝位於太極前殿

後主叔寶宣帝嫡長子天嘉三年封成安王大建元
年立為皇太子十四年正月丁巳即皇帝位於太極

前殿

東魏孝靜帝清河王亶世子永熙三年八月孝武帝
既入關十月大將軍高歡乃與百寮會議推帝以奉
明帝之後即皇帝位於雒城是月東北遷于鄴

北齊廢帝殷文宣帝長子天保元年立為皇太子十
年十月癸卯即帝位於晉陽宣德殿

孝昭帝演字延安文宣母弟也天保元年封嘗山王
十年十一月廢帝嗣位乃即朝班除太傅錄尚書事

朝政皆決於帝月餘乃居藩邸自是詔勅多不關帝
客或言於帝曰鷲鳥捨巢必有探卵之患今日之地

何宜屢出乾明元年從廢帝赴鄴居于領軍府時楊
愔燕子獻爾朱渾天和宋欽道鄭子默等以帝望既
重內懼權逼請以帝爲太師司牧錄尚書事長廣王
湛爲大司馬錄并省尚書事解京畿大都督帝以尊
親而見猜斥乃與長廣王期獵謀之于野三月甲戌
帝初上省旦發領軍府大風暴起壞所御車幔帝甚
惡之及至省朝士咸集坐定酒數行于坐執尚書令
楊愔右僕射燕子獻領軍爾朱渾天和侍中宋欽道
等於座帝戎服與平原王段韶平秦王高歸彥領軍
劉洪徽入自雲龍門於中書省前遇散騎嘗侍鄭子

默又執之同斬于御府之內帝至東閣門都督成休
寧抽刃呵帝帝令高歸彥喻之休寧厲聲大呼不從
歸彥旣爲領軍素爲兵士所服悉皆馳仗休寧方歎
息而罷帝入至昭陽殿主太皇太后皇太后並出
臨御坐帝奏愔等罪求伏專擅之罪時庭中及兩廊
下衛內二千餘人皆披甲待詔武衛娥永樂武力絕
倫被文宣重遇撫刃思効廢帝性吃訥兼倉卒不知所
言太皇太后又爲皇太后誓言帝無異志唯去逼而
已高歸彥宣勅勞衛士解嚴永樂乃內刀而泣帝乃
令歸彥引侍衛之士向華林園以京畿軍入守門閣

斬娥永樂于園詔以帝爲大丞相都督中外諸軍錄
尚書事帝尋入晉陽有詔軍國大政咸諮決焉帝既
當大位知無不爲乾明元年八月壬午宣太后令降
廢帝爲濟南王是日卽位於晉陽宣德殿

武成帝湛孝昭帝母弟天保元年封長廣王皇建元
年爲右丞相孝昭幸晉陽留帝守鄴二年十一月甲
辰孝昭詔曰朕嬰此暴疾奄忽無遠令嗣子冲眇未
聞政術社稷業重理歸上德右丞相長廣王研幾測
化體道居宗人雄之望海內瞻仰同胞共氣家國所
馮可遣尚書左僕射趙郡王叡喻旨徵王統茲大寶
手書云宜將吾妻子置一好處勿學前人也帝乃自
鄴至晉陽宮發喪於崇德殿皇太后令所司宣遺詔
左丞相斛律金率百僚敦勸三奏乃許之癸丑卽皇
帝位於南宮

後主緯武成帝長子大寧二年立爲皇太子河清四
年四月太史奏天文有變其占當有易主丙子乃使
太宰段韶兼太尉持節奉皇帝璽綬傳位於皇太子
於是羣公上尊號爲太上皇帝軍國大事咸以奏聞

初將傳政使內參乘子尚乘驛送詔書于鄴子尚出
晉陽城見子騎隨後忽失之子尚未至鄴而其言已
布矣

梁末帝瑱太祖第四子開平元年封均王四年出為
 東京馬出軍都指揮使乾化二年六月三日庶人友
 珪為逆遂即偽位明年改元鳳歷是年二月侍衛親
 軍使袁象先引禁兵誅友珪遣趙巖賫傳國寶至東
 京請帝即位於雒陽帝報之曰夷門太祖創業之地
 公等如堅推戴冊禮宜在東京賊平之日即謁雒陽
 陵廟是月帝即位於東京乃去鳳曆之號復稱乾化
 三年

年號

自漢武紀元立號而後代因之逮於鼎國以至江左
 亦皆建正朔備制度或標瑞應之日或取休美之稱

或宣紀德化或章明功烈紀年頒曆於是乎在今考

於舊史洎東魏北齊以及朱梁條次比敘咸可見矣

蜀先主以後漢建安二十六年四月即皇帝位於成

都是歲魏黃初三年大赦改元章武盡三年

後主以章武三年四月即位改元建興盡二

延熙元年正月大赦改元盡二

景耀元年史官言景星見於是大赦改元盡六

炎興元年夏大赦改元其年降於晉王欽若等曰自此以下不書月者皆史闕文

吳大帝初為吳王以魏黃初三年九月改元黃武盡七

年二月

黃龍元年四月夏口武昌並言黃龍鳳凰見丙申南

郊卽皇帝位大赦改元 盡三年

嘉和元年 黃龍三年十月會稽南始平言嘉禾生十二月丁卯大赦改元盡七年七月

赤鳥元年八月武昌言麒麟見有司奏言麒麟者太

平之應宜改年號詔曰間者赤鳥集於前殿朕親見

若神靈以為嘉祥者改年宜以赤鳥為元群臣奏曰

昔武王伐紂有赤鳥之祥君臣觀之遂有天下聖人

書策載述最祥者以為近事既嘉親見文明也於是

改元 盡十二年四月

太元元年五月立皇后潘氏大赦改元 盡明年正月

神鳳元年二月大赦改元 盡其年三月

廢帝亮以神鳳元年四月卽位大赦改元建興 盡二年

五鳳元年 建興二年十一月有大鳥五月見于春申明年改元盡三年十月

太平元年十一月己酉大赦改元 盡三年九月

景帝以太平三年九月卽位大赦改元永安 盡七年七月

後主以永安七年七月卽位大赦改元元興 盡其年

甘露元年四月蔣陵言甘露降於是大赦改元 盡二年七月

寶鼎元年八月所在言得大鼎於是大赦改元 盡四年九月

年號

建衡元年八月大赦改元 盡三年

鳳凰元年 建衡三年西苑言鳳凰集改元盡三年

天冊元年吳郡言掘地得銀長一尺廣三分刻上有年月字於是大赦改元 盡其年

天璽元年吳郡言臨平湖自漢末草穢壅塞今更開通長老相傳此湖塞天下亂此湖開天下平又於湖邊得石函中有小石青白色長四寸廣二寸餘刻上作皇帝字於是大赦改元 盡其年

天純元年鄱陽言歷陽山石文理成字又吳興陽羨

山有空石長十餘丈名曰石室在表為大瑞乃遣

兼司徒董朝兼太宰周處至陽羨縣封禪國山改元

大赦以協石文 盡四年三月降于晉

宋高祖以晉元熙二年六月受禪改元永初 盡三年

少帝以永初三年五月即位明年正月己亥朔大赦

改元景平 盡二年七月

文帝以景平二年七月自宜都王即位大赦改元元

嘉 盡三十年

孝武帝以元嘉三十年四月即位明年正月親祠南

郊大赦改元孝建 盡三年

冊符元龜 閏位部

卷之三百八十八

十七

大明元年正月辛亥朔大赦改元 盡八年

前廢帝以大明八年閏五月即位明年正月乙未朔大赦天下改元永光 盡其年八月

景和元年八月誅太宰江夏王義恭等改元 盡其年

明帝以景和九年十二月丙寅自湘東王即位大赦改元泰始 盡七年

泰豫元年正月甲寅朔帝有疾不朝會以疾患未痊故改元泰豫 盡其年

後廢帝以泰豫元年四月即位明年正月戊寅朔大赦改元元徽 盡五年七月

順帝以元徽五年七月即位大赦改元昇明 盡三年四月

南齊太祖以宋昇明三年四月受禪大赦改元建元 盡四年二月

世祖武皇帝以建元四年三月即位改元永明 盡十一年

鬱林王以永明十一年七月即位明年正月丁未大赦改元隆昌 盡其年七月

海陵王以隆昌元年七月即位改元延興 盡其年十月

明年以延興元年十月即位大赦改元建武 盡四年

永泰元年四月甲寅赦三署囚改元 盡其年

東昏侯以永泰元年七月即位明年正月大赦改元

永元 年號

永元 盡二年三月

和帝以永元三年三月即位于江陵大赦改元中興

盡二年四月

梁高祖天監元年以齊中興二年四月受禪改元天

監 盡十八年

普通元年正月乙亥大赦改元 盡七年

大通元年三月大赦改元 盡二年

中大通元年十月巳酉大赦改元 盡六年

大同元和正月戊申朔大赦改元 盡十一年

中大同元年四月大赦改元 盡其年

太清元年四月丁亥大赦改元 盡三年

簡文帝以太清三年五月即位明年正月辛亥朔大

赦改元大寶 盡二年七月侯景逼禪于豫章王改元天正

元帝以太清六年十一月即位改元詔曰昔虞夏商

周年無嘉號漢魏晉宋因循以久朕雖云撥亂自非

創業恩得上繫宗祧下惠億兆可改太清六年為承

聖元年 盡三年

敬宗紹泰元年以承聖三年十一月元帝都江陵陷

于長安陳霸先等定議以帝為皇太子明年九月霸

先襲殺王僧辨黜蕭淵明十月帝即皇帝位大赦改

元 盡二年八月

太平元年九月壬寅改元 盡二年十月禪于陳

後梁宣帝以後魏恭帝元后為后周太祖所立居江陵

東城稱皇帝於其國年號大定 盡八年

明帝以大定八年嗣位改元天保 盡二十三年

後主以太子嗣位改元廣運 盡二年歸于隋

陳高祖以梁太平二年十月受禪大赦改元永定 盡三年

文帝以永定三年六月即位明年正月癸丑大赦改

元天嘉 盡六年

天康元年三月大赦改元 盡其年

廢帝以天康元年四月癸酉自太子即位明年正月

大赦改元光大 盡二年

宣帝以光大二年十一月自太傅入纂位明年正月甲

午即位改元大建 盡十四年

後主以大建十四年正月即位明年正月壬寅大赦

改元至德 盡四年

禎明元年正月戊寅大赦改元 盡三年正月為隋所滅

東魏孝靜帝以後魏永熙三年十月為高歡所立即

皇帝位於鄴城東北大赦改元天平 盡四年

興和元年十月癸亥以鄴都新宮成大赦改元 盡四年

武定元年正月壬戌朔大赦改元 盡八年五月

北齊文宣以東魏武定八年五月受禪南郊禪畢大

赦改元天保 盡十年初帝改年識者曰天保之

廢帝以天保十年十月卽位明年正月癸丑朔大赦

改元乾明 盡其年八月

孝昭帝以乾明元年八月卽位於晉陽宣德殿大赦

改元皇建 盡二年十月

武成帝以皇建二年十一月癸丑卽位于南宮大赦

改元大寧 盡二年三月

河清九年四月以河濟清改元 盡三年四月

後主以河清四年四月卽位大赦改天統 盡五年

武平元年正月乙酉朔大赦改元 盡七年十月

隆化元年十二月丁巳大赦改元 盡其年

少帝以隆化二年正月乙亥卽位大赦改元

承光元年在位十八日以後俱奏青州為後周所滅

梁太祖以唐天祐四年四月受禪改元開平 盡五年

乾化元年五月甲申朔御朝元殿大赦改元 盡六年

開平元年 盡五年

末帝以乾化三年二月卽位於大梁五年十一月改

元貞明 盡七年四月先是乾化二年六月庶人友珪弑逆明年正月改元鳳曆是年二月誅友珪

帝復稱乾化至是改焉

龍德元年五月丙戌朔改元 盡三年十月為後唐所滅

冊府元龜

冊府元龜

巡按福建監察御史臣李嗣京 訂正

知甌寧縣事 臣 孫以敬 叅閱

知建陽縣事 臣 黃國琦 較釋

閏位部 一百八十九

孝德 奉先 尊親

孝德

夫孝德之本也故王者之德莫大於孝上所以寧宗廟下所以教人民導揚徽聲感勵風俗莫加於此焉若乃凌晨問安時刻靡失逾月侍疾衣帶不解躬易

脂澤至於感慟親臨祭享罔不流涕所以雲物變采
井泉湧發蓋天性之所感故明靈之攸答傳示後葉
美莫大焉

宋高祖少時家貧有大志不治廉隅事繼母以孝謹
稱及卽大位春秋已高每旦入朝太后未嘗失時刻
梁高祖生知淳孝年六歲獻皇太后終水漿不入口
三日哭泣哀苦有過成人內外親黨咸皆敬異及丁
文皇帝憂時為齊王詔議隨府在荆鎮髮髯奉問便
投劍星馳不復寢食倍道就路憤風驚浪不甞停止

高祖形容本壯及還至京都銷毀骨立親表士友不
復識焉望宅奉諱氣絕久之每哭輒嘔血數升服內
不復嘗米唯資大麥日止二溢拜掃山陵涕淚所洒
松草變色及居帝位卽於鍾山造大愛敬寺青溪邊
造智度寺又於臺內立至敬寺殿又立七廟堂月中
再過設淨饌每至展拜嘗涕泗滂沱哀動左右

大同十年三月謁建寧陵有紫雲蔭陵上食頃乃散
帝望陵流涕所需草皆變色陵傍有枯泉至是而流
水香潔辛丑哭于脩陵

簡文帝居穆貴嬪憂哀毀骨立晝夜號泣不絕聲所
坐之席霑濕盡爛

後梁宣帝性不飲酒安於儉素事其母以孝聞
明帝孝悌慈仁有人君之量四時祭享未嘗不悲慕
流涕

北齊孝昭帝性至孝太后不豫出居南宮帝行不正
履容色貶悴衣不解帶殆將四旬殿去南宮五百餘
步鷄鳴而去辰時方還來去徒行不乘輦太后所苦
小增便卽寢伏閣外食飲藥物皆躬親太后嘗心痛
不自堪忍帝立侍帷前以爪掐手心血流出袖友愛
諸弟無君臣之隔

梁太祖性孝愿奉太后未嘗小失色朝夕視膳爲士
君子之規範帝嚴察用法無纖毫假貸太后言之嘗
頗爲省刑

奉先

夫有國家者曷嘗不宗祀以本仁作廟以觀德尊禮
以致孝奉先以盡禮自秦遷周鼎頗遵古制逮於吳
蜀建號江左禪代莫不追加號謚充奉園邑增建廟
貌聿脩時祭親執卣鬯躬謁松楸載籍所記可得而
詳也東魏北齊以及朱梁雖國禩運促日不暇給而
崇薦尊稱肅祇嘗事亦未嘗闕焉

秦始皇二十六年初并天下采上古帝位號號曰皇

九拜元龜奉先

帝追尊莊襄王為太上皇

二十八年為太極廟

二世元年下詔增始皇寢廟犧牲令羣臣議尊始皇

廟羣臣皆頓首言曰古者天子七廟諸侯五大夫三

雖萬世世不軼毀今始皇為極廟四海之內皆獻貢

職增犧牲禮咸備無以加先王廟或在西雍或在咸

陽天子儀當獨奉酌祠始皇廟自襄公已下軼毀所

置凡七廟羣臣以禮進祠以尊始皇廟為帝者祖廟

蜀先主章武元年四月即皇帝位于成都立宗廟祫

祭高皇帝以下

聞松之云先王雖云出自孝景而世數攸遠昭穆難明既紹漢祚不知以

何帝為元祖以立親廟于時英賢作輔儒生在宮宗廟制度必有憲章而載紀闕畧良可恨哉

後主以章武三年五月襲位于成都是月先主梓宮

自永安宮還成都諡曰昭烈皇帝追尊母甘皇后曰

昭烈皇后

吳大帝權黃龍元年四月即皇帝位追尊父破虜將

軍烏程侯堅為武烈皇帝廟曰始祖墓曰高陵母吳

氏為武烈皇后

張紘以破虜有破走董卓扶持漢室之勲討逆平定江東建立大業宜有

記頌以昭公美既成吳大帝省讀悲感曰君貪識孤家門閹閹也

廢帝亮建興元年四月即位上大皇帝尊諡曰大皇帝

墓曰蔣陵五鳳二年十二月作太廟太平元年正月

為太帝立廟稱太祖廟

景帝即位遣使追尊母王夫人曰敬懷皇后改葬敬陵

後主皓元興元年八月即位謚休曰景皇帝葬定陵

九月追謚父和曰文皇帝

初尊和為昭獻皇帝俄又改為文皇帝

改葬

明陵置園邑二百家令承奉守

寶鼎元年十月分吳郡丹陽九縣為吳興郡治烏程

置太守四時奉祠文皇帝廟

二年有司奏言文皇帝宜立廟京邑是年七月使守

大匠薛珣營立寢堂號曰清廟十二月遣守丞相孟

仁太嘗姚信等備官寮中軍步騎二千人以靈輿法

駕東迎神於明陵皓引見仁親拜送于庭

一云此孟仁還皓手

詔日夜相繼奉問神靈起居動止巫覡言見和被服顏色如平生皓悲喜淚涕悉召公卿尚書詣闕門下

受賜靈輿當至使丞相陸凱奉三牲祭於近郊皓於金

城外露宿明日望於東門之外其翌日拜廟薦祭獻

歛悲感又追尊和母王夫人曰大懿皇后

宋高祖初為宋王立廟于彭城祭高祖以下四世

永初元年六月即位追尊皇考為孝皇帝皇妣為穆

皇后七月戊申遷神主于太廟車駕親奉

少帝以永初三年五月即位上武帝謚曰武皇帝廟

號高祖葬初寧陵

九月有司奏武皇帝配南郊武敬皇后配北郊

文帝元嘉元年八月丁酉謁初寧陵還卽位戊午拜太廟甲辰追尊所生胡婕妤爲皇太后謚曰章皇太后陵曰熙寧立廟於京師

四年二月乙卯行幸丹徒謁京陵

二十六年二月乙亥車駕陸道幸丹徒謁京陵

二十八年三月拜初寧陵

孝武帝以元嘉三十年四月卽位于新亭崇改太祖文皇帝號謚初元凶劭弑逆上謚曰景皇帝廟號中

宗至是改焉

五月甲午謁初寧陵

大明二年正月壬戌拜初寧陵

六年正月辛卯宗祀文皇帝于明堂以配上帝

八年正月辛巳宗祀文皇帝于明堂

前廢帝以大明八年閏五月卽位上孝武皇帝尊謚廟號世祖

九月祔葬文穆皇太后于景寧陵

明帝太始元年十二月卽位乙亥追尊所生沈婕妤曰宣皇太后陵號崇憲壬午車駕謁太廟

後廢帝以泰豫元年四月卽位上明皇帝尊謚廟號太宗

順帝昇明元年七月壬辰卽位癸卯車駕謁太廟

南齊太祖高皇帝建元元年四月卽位追尊皇考曰

宣帝皇妣爲孝皇后陵曰永安

六月庚辰法駕奉七廟主于太廟

十月己卯車駕殷祠太廟

武帝以建元四年三月卽位上高皇帝尊謚廟號太祖

五月庚申以高皇帝配南郊高昭皇后配北郊

永明五年四月庚午車駕殷祠太廟

九月詔太廟四時祭宣皇帝薦麥餅鴨臠孝皇后薦笄鴨卵脯醬炙白肉高皇帝薦肉膾菹羹昭皇后薦茗粽炙魚竝平生所嗜也

十年十月車駕殷祠太廟

鬱林王以永明十一年七月卽位上武皇帝尊謚廟號世祖

九月辛酉追尊父文惠太子爲世宗文皇帝

隆昌元年正月戊午車駕拜崇安陵

明帝建武元年十月卽位十一月追謚父始安貞王

道生為景皇妃江氏為懿皇后別立寢廟陵號脩安

四年八月追尊景皇所生王氏為恭太后

東昏侯以永泰元年七月即位上高宗尊諡曰明皇

帝

梁高祖武帝初封梁公立四親廟

天監元年四月即位追尊皇考為文皇帝廟號太祖

皇妣為獻皇后陵號建寧

十一月己未立小廟

十二年六月癸巳新作太廟增基九尺

十五年六月丙申改作小廟畢

大同十年三月甲午輿駕幸蘭陵謁建陵至脩陵壬

寅詔曰朕自違桑梓五十餘載乃眷東顧靡日不思

今四方款關海外有截獄訟稍簡國務小閑始獲展

敬園陵但增感慟帝嘗夢具朝服入太廟拜伏悲感且於廷務殿說所夢何敬容對曰

臣聞孝悌之至通於神明陛下性與天通故感應斯夢上極然之便有拜陵之議

簡文帝以太清三年五月辛巳即位癸未追尊所生

穆貴嬪為穆皇太后

十一月上武皇帝尊謚廟號高祖陵號脩陵

元帝以承聖元年十一月即位於江陵追尊所生妣

阮脩容為文宣太后

後梁宣帝營大定元年追尊其父統為昭明皇帝廟號高宗統妃蔡氏為昭德皇后

明帝巋以大定八年二月嗣位上宣皇帝尊諡廟號中宗改元天保

元年五月大皇太后龔氏薨諡曰元太后

九月所生母曹太妃薨諡曰孝皇太妃

二年皇太后王氏薨諡曰宣靜皇后

陳高祖武帝永定元年十月即位追尊皇考曰景皇

帝廟號太祖陵曰瑞陵皇妣董太夫人曰安皇后依

梁初園陵故事遷景皇帝神主祔於太廟

四月甲子親祠太廟

文帝以永定三年六月即位上武皇帝尊諡廟號高祖

大嘉元年六月辛巳改諡皇祖妣景安皇后曰景文

皇后甲午追策故始興昭烈王妃曰孝妃始興王文帝父也

二年十二月甲申立始興國廟於京師用王者之禮

帝自入嗣而皇考始興昭烈王廟在始興謂之東廟至是徙東廟神主祔于梁之小廟故曰國廟祭用天

子儀

廢帝以天康元年四月即位六月上文皇帝尊諡廟

號顯祖

十月庚申親祠太廟

光大元年十月甲申親祠太廟

二年七月丙午親祠太廟

九月戊午親祠太廟

宣帝大建元年正月甲午即位乙未謁太廟戊午親

祠太廟

十月壬午親祠太廟

二年春正月丙午親祠太廟

閏四月戊申謁太廟

十月乙酉親祠太廟

三年十月甲申親祠太廟

四年正月庚午親祠太廟

十月乙酉親祠太廟

五年正月甲午親祠太廟

六年正月壬午親祠太廟

四月甲午親祠太廟

八年四月乙未親祠太廟

東魏孝靜帝以天平元年十月丙寅即位壬申享太

廟

四年四月辛未遷七帝神主入新廟

北齊文襄帝初為魏相置王高祖秦州使君王曾祖

太尉武貞公王祖太師文穆公王考相國獻武王凡

四廟

文宣帝天保元年五月即位己未追尊皇祖文穆王

為文穆皇帝皇祖妣為文穆皇后皇考獻武王為獻

武皇帝亡兄文襄王為文襄皇帝甲辰遷神主於太

廟

三年正月乙丑有事于太廟

十月丁卯文襄皇帝神主入於太廟

文宣帝受禪置六廟曰皇祖司

空公廟皇祖吏部尚書廟皇祖秦州使君廟皇祖文穆皇帝廟太祖獻武皇帝廟世宗文襄皇帝廟為太

廟獻武已下不毀已上則遽毀竝同廟而別室既而遷神主于太廟文襄文宣竝太祖之子文宣初疑其

昭穆之次欲別立廟衆議不同至二年冬始祔太廟春祠夏禴秋嘗冬蒸皆以孟月并臘凡五祭禘祫始

梁之制每祭室一太牢始以皇后配祭至河清定令四時祭廟禘祭及元日廟建竝設庭燎三所

廢帝乾明元年二月上文宣皇帝尊諡廟號高祖

孝昭帝皇建二年正月壬子禘于太廟

武成帝太寧元年十一月即位上孝昭皇帝尊諡

河清元年正月壬午享太廟

五月祔葬武明皇后于義平陵

二年正月以武明皇后配祭北郊

後主天統元年十一月己丑太上皇詔改太祖獻武

皇帝爲神武皇帝廟號高祖獻明皇后爲武明皇后
其文宣謚號委有司議定

十二月庚午有司奏改高祖文宣皇帝爲威宗景烈
皇帝

二年正月癸巳祫祭於太廟

四年十二月上太上皇尊謚曰成皇帝廟號世祖

武平元年十月改威宗景烈皇帝謚號顯宗宣皇帝
梁太祖初爲梁王以唐乾寧二年二月領親軍屯於
單父會寒食帝乃親拜文穆皇帝陵於碭山縣午溝
里

開平元年四月卽位追尊四代廟號高祖媯州府君
上謚曰宣元皇帝廟號肅祖太廟第一室陵號興極
祖妣高平縣君范氏追謚宣僖皇后皇曾祖宣惠王
上謚曰光獻皇帝廟號敬祖第二室陵號永安祖妣
秦國夫人楊氏追謚光孝皇后皇祖武元王上謚曰
昭武皇帝廟號憲祖第三室陵號光天祖妣吳國夫
人劉氏追謚昭懿皇后皇考文明王上謚曰文穆皇
帝廟號烈祖第四室陵號咸寧皇妣晉國太夫人王
氏追謚文惠皇后

五月甲午詔天下管屬及州縣官名犯廟諱者各宜

改換城門郎改為門局郎

避會祖諱

茂州改為汶州

避烈考諱

桂州慕化縣改為歸化縣潘州茂名縣改為越裳縣

癸卯司天監奏曰辰內有戊字請改為武從之

六月己亥帝御崇元殿內出追尊四廟上謚號玉册

寶共八副宰臣文武百官儀仗鼓吹導引至太廟行

事

三年正月己巳奉遷太廟四室神主赴西京太嘗儀

仗鼓吹導引齊車文武百官奉辭於開明門外甲戌

帝發東都己卯至西都庚寅親享太廟

二月丙午宗正寺請脩興極永安光天咸寧陵竝合

添脩上下宮殿栽植松柏制可癸亥勅豐沛之基寢

園所在悽愴動關於情理充奉自繫於國章宜設陵

臺兼升縣望其輝州碭山縣宜升為赤縣仍以本縣

令兼四陵臺令

七月丙寅命宰臣楊涉赴西都以孟秋享太廟

乾化元年十月有司以立冬太廟薦享上言詔丞相

杜曉赴西都攝祭行事

二年正月丙戌有司以孟春太廟薦享上言命丞相

杜曉攝祭行事

末帝即位追尊母賢妃張氏為元貞皇太后祔葬宣

加府元龜 奉先

貞明三年十二月幸維揚遂幸伊闕拜宣陵

尊親

夫王者之政不可得而變革者尊尊也親親也所以宣孝熙之德崇教化之本况夫膺餘閏之數富霸王之資當創物之初暨繼明之始莫不采有司之奏稽歷代之典緣禮經之大義傳春秋之深旨尊以懿號崇以宮名昭備物之章極奉親之意誠有國者之要道也難云角立其可闕諸

蜀後主章武三年五月襲位于成都尊先主皇后曰

皇太后

吳孫皓元興元年八月卽位九月尊母何姬爲昭獻皇后稱升平宮月餘進爲皇太后

宋高祖永初元年卽位六月尊王太后蕭氏爲皇太后有司奏曰臣聞道積者慶流德洽者禮備故祇敬表于崇高嘉號彰於盛典伏惟太后母儀之德於穆不已保翼之訓光被洪業雖幽明同慶稱謂未窮稽之前代禮有嘗準宜式遵舊章允副羣望臣等請上宋王太后號曰皇太后

少帝永初三年五月卽位尊皇太后曰太皇太后

景平元年七月尊所生母張夫人爲皇太后有司奏曰臣聞嚴親敬始所因者本克孝之道繇中被外伏惟夫人德並坤元徽音光紹發祥兆慶誕啓聖明宜崇極徽號永備盛則從春秋母以子貴之義遵漢晉推愛之典謹上尊號爲皇太后宮曰永樂

孝武帝元嘉三十年四月卽位尊所生路淑媛爲皇太后有司奏曰歷集周邦徽音克嗣氣淳漢國沙麓發祥昔在上代業隆祚遠未有不敷陰教以闡洪基膺淑慶以載聖哲者也伏惟淑媛柔明內服徽儀外範含靈初迪則庶熙仰耀弘訓蕃闡則家邦被德民

應惟和神屬推祉故能誕鍾睿躬用集大命固靈根於旣殞融勳烈乎中興載厚化深聲永詠緝宜式諧舊典恭享極號謹奉尊號曰皇太后宮曰崇憲

前廢帝大明八年閏五月卽位崇皇太后曰太皇太后皇后曰皇太后宮曰永訓

明帝泰始元年十二月卽位太皇太后復號崇獻皇太后後廢帝泰豫元年四月卽位七月尊皇后曰皇太后宮曰弘訓崇拜所生陳貴妃爲皇太妃有司奏曰臣聞河龍啓聖理映明神郊電基皇慶爍天地故資敬之道粹古銘風泐貴之誼眇代疑則伏惟貴妃

含和月晷表淑星樞徽音峻古柔光昭世聲華帝掖
軌秀天嬪景發皇明祚昌睿命而備物之章未煥爰
策遠酌前王允陟鴻典臣等參議謹上尊號曰皇太
妃輿服一如晉孝武李太妃故事宮曰弘化
順帝卽位昇平元年崇拜帝所生陳昭華爲皇太后
南齊鬱林王卽位尊母文惠太子妃爲皇太后稱宣
德宮

梁敬帝紹泰元年十月卽位尊所生夏貴妃爲皇太
后

後梁宣帝答爲周太祖所立居江陵東城稱皇帝於

其國尊其所生母龔氏爲皇太后

明帝歸嗣位之元年尊其祖母龔太后曰太皇太后

嫡母王皇后曰皇太后所生母曹貴嬪曰皇太妃

陳文帝永定三年六月卽位七月尊皇后章氏爲皇

太后宮曰慈訓

廢帝天康元年四月卽位五月尊皇太后曰太皇太

后皇后沈氏曰皇太后宮曰安德

後主大建十四年卽位尊皇后柳氏爲皇太后宮曰

弘範

北齊文宣帝天保元年五月卽位尊皇太后婁氏爲

册府元龜 尊親

太皇后宮曰宣訓

廢帝天保十年十月卽位尊皇太后爲太皇太后皇
后李氏爲皇太后

孝昭帝皇建元年八月卽位詔奉太皇太后還稱皇
太后皇太后稱文宣皇后

後主天統四年十二月太上皇帝殂上太上皇后尊
號爲皇太后

册府元龜

册府元龜

巡按福建監察御史臣李嗣京計正

新建縣舉人 臣戴國士參閱

知建陽縣事 臣黃國琦較釋

閏位部 一百九十

姿表 智識 聰察 器度 才藝

姿表

洪範五事一曰貌貌曰恭是以八彩重瞳表唐堯虞
舜之異龍顏日角彰漢高光武之奇大勳既協於天
人純粹必形於體貌自繼統之外代有其君至若

册府元龜

閏位部

卷之二十一

表端莊神明爽邁方頤大口龍頰鐘聲或貴兆已形
致異人之默識或天光峻發使外國以仰觀亦有瞻
顧非嘗眉目如畫挺神仙之骨格儼鸞鳳之儀容兼
加之以才智辯明器度雄遠皆可亞真人之奇表紹
有國之基局也

秦始皇蜂準

蜂一作隆 長目鷲鷹豺聲

蜀先主身長七尺五寸耳垂垂膝顧視見其耳

吳武烈帝孫堅容貌奇絕

大帝方頤大口紫髯長上短下漢末劉琬能相人見
大帝兄弟曰孫氏兄弟雖各才智明達然祿祚不終

唯中弟孝廉形貌奇偉骨體不嘗有大貴之表年又
最壽爾試識之

宋高祖身長七尺六寸風骨奇特晉世桓玄篡位從
兄撫軍將軍循在京口以高祖為中兵參軍從循入

朝至建業玄宿憚高祖威名又悅高祖之風儀姿貌
謂司徒王謐曰昨見劉裕卿乃不得獨擅其清

或說玄曰劉裕能行虎步瞻顧不凡恐不為人下宜早為其所
定然後當別議之耳桓玄謂王謐曰昨見劉裕風骨不嘗蓋人傑也

文帝年十四身長七尺五寸
孝武帝少機穎神明爽發

前廢帝蜂目鳥喙長頸銳下

順帝姿貌端華眉目如畫見者以為神人

南齊高帝姿表英異龍額鐘聲長七尺五寸鱗文遍

體

梁武帝狀貌殊特日角龍顏重嶽虎顧古文八字項

有浮光身映無影兩髀駢骨項上隆起有文在右手

曰武初為司州刺史有沙門自稱僧暉謂帝曰君項

有伏龍非人臣也復求莫知所之

簡文帝方頤豐下鬚鬢如畫直髮委地雙眉翠色項

毛左旋連錢入背手執玉如意不相分辨矚目則目

光燭人

元帝背生黑子巫媪見曰此大貴兆當不可言 又云帝初

生患眼高祖自下
意治之遂盲一目

陳武帝身長七尺五寸日角龍顏垂手過膝

文帝美容儀舉動方雅造次必遵禮法

宣帝美容儀身長八尺三寸手垂過膝有勇力

北齊神武帝目有精光長頭高顙齒白如玉

文襄帝年十三神清雋爽便若成人

文宣帝黑色大頰兌下鱗身重蹠

孝昭帝身長八尺腰帶十圍儀望風表迥然獨秀

武成帝儀表環傑神武為帝聘蠕蠕太子菴羅辰女
號隣和公主帝時年八歲冠服端嚴神情閑遠華戎
歎異

後主美容儀

梁大帝山庭月角舜日堯眉鸞鳳之姿自然也
末帝美容儀

智識

真人未興雄才間出雖統乎舊物尚悶於皇階而式
遏橫流頗關於識象其或智參妙有識亮機先變而
能通謀無遺諳稽成敗於度內權禍福於穀中燦書
史而可觀騰風嶽於無際豈惟人謀允協俾黎獻之
宅心將亦天險未夷假雋賢而授手取其成算著之
於篇

蜀先主與龐統從容宴語問曰卿為周公瑾

周瑜功

曹孤到吳聞此人密有白事勸仲謀

孫權

相留有之

乎在君為君卿其無隱統對曰有之先主歎息曰孤
時急危當有所求故不得不往殆不免周瑜之手天

下智謀之士所見畧同耳時孔明

諸葛亮

諫孤莫行其

意獨然亦慮此也孤以仲謀所防在此當賴孤為援
故決意不疑此誠出於險途非萬全之計也

吳孫堅漢靈帝末爲別部司馬時邊章韓遂作亂涼州中即將董卓拒討無功中平三年遣司空張溫行車騎將軍西討章等溫表請堅與叅軍事屯長安溫以詔書召卓卓良久乃詣溫溫責讓卓卓應對不順堅時在坐前耳語謂溫曰卓不悔罪而鴟張大語宜以召不時至陳軍法斬之溫曰卓素著威名於隴蜀之間今日殺之西行無依堅曰明公親率王兵威震天下何賴於卓觀卓所言不假明公輕上無禮一罪也章遂跋扈經年當以時進討而卓云未可沮軍疑衆二罪也卓受任無功應召稽留而軒昂自高三罪也

古之名將仗鉞臨衆未有不斷斬以示威者也是以穰苴斬莊賈魏絳戮楊干今明公垂意於卓不卽加誅虧損威刑於是在矣溫不忍發舉乃曰君且還卓將疑人堅因起出章遂聞大兵至黨衆離散皆乞降軍還議者以軍未臨敵不斷功賞然聞堅數卓三罪勸溫斬之無不歎息拜堅議卽後靈帝晏駕卓擅朝政橫恣堅聞之拊膺歎曰張公昔從吾言朝廷今無此難也

大帝父堅亡兄策起事大帝嘗隨從每參同計謀策甚奇之自以爲不及也劉備定蜀大帝以備已得益

州令諸葛瑾從求荆州諸郡備不許曰吾方圖涼州
涼州定乃盡以荆州與吳耳大帝曰此假而不反而
欲以虛辭引耶遂置三郡長史分荆州東西

嘉禾四年魏文帝遣使求雀頭香大貝明珠象牙犀
角瑋瑁孔雀翡翠鬪鴨長鳴鷄羣臣奏曰荆揚二州
貢有嘗典魏所求珍玩之物非禮也宜勿與大帝曰
昔惠施尊齊為王客難之曰公之學去尊今王齊何
其倒也惠子曰有人於此欲擊其愛子之頭而石可
以代之子頭所重而石所輕也以輕代重何為不可
予方有事於西北江表元元恃主為命非我愛子邪

彼所求者於我瓦石耳孤何惜焉彼在諒闇之中而
所求若此寧可與言禮哉皆具以與之

赤烏七年步騭朱然等上疏曰自蜀還者咸皆欲背
盟與魏交通多作舟船繕治城郭又蔣琬守漢中聞
司馬懿南向不出兵乘虛以犄角之反委漢中還近
成都事已彰灼無所復疑宜為之備大帝揆其不然
曰吾待蜀不薄聘享盟誓無所負之何以致此又司
馬懿前來入舒旬日便退蜀在萬里何知緩急而便

出兵乎昔魏欲入漢川此間始嚴亦未舉動會聞魏
還而止蜀寧可復以此有疑邪又人家治國舟船城

郭何得不獲今此間治軍寧復欲以禦蜀耶人言甚不可信朕為諸君破家保之蜀竟自無謀如大帝所籌

朱異為楊武將軍得魏將文欽詐降密書與異欲令自迎異表呈欽書因陳其偽不可便迎大帝詔曰方今北土未一欽云欲歸命宜且迎之若嫌其有譎者但當設計網以羅之盛重兵以防之耳乃遣呂據督二萬人與異并力至北界欽果不降

景帝時諸葛恪為孫峻所殺後朝臣有乞為恪立碑以銘其勲績者博士盛冲以為不應帝曰盛夏出軍

士卒傷損無尺寸之功不可謂能王欽若等按諸葛恪傳遠來出軍無

功而還受托孤之任死於豎子之手不可謂智冲議為是遂寢

宋高祖時毛循之父瑾為梁州刺史為譙縱所殺循之西討不克後遣朱齡石伐蜀循之固求行高祖慮循之至蜀必多所誅殘土人既與毛氏有嫌亦當以死自固故不許

梁簡文帝年十一便能親庶務歷試藩政所在著美特為高祖所愛焉

北齊神武帝以杜弼為大行臺郎中弼以文武在位

罕有廉潔言之於帝帝曰弼來我語爾天下濁亂習

俗已久今督將家屬多在關西黑獺嘗相招誘黑獺後周

文帝人情去留未定江東復有一吳兒老翁蕭衍者

專事衣冠禮樂中原士大夫望之以為正朔所在我

若急作網法不相饒借恐督將盡投黑獺士子悉奔

蕭衍則人物流散何以為國爾宜少待吾不忘之

文襄帝為渤海王世子時年十二神情雋爽便若成

人神武試問以時事得失辨折無不中禮自是軍國

籌策皆預之

文宣帝少有大度志識沈敏外柔內剛果敢能斷雅

好吏事測始知終理劇處繁終日不倦初踐大位留

心正術以法馭下公道為先或有違犯憲章雖密戚

舊勳必無容舍外內清淨莫不祇肅至於軍國幾務

獨決懷抱規模宏遠有人君大畧

廢帝為皇太子時年六歲性敏慧初學反語於跡字

下注云自反時侍者未達其故太子曰跡字足傍亦

為跡豈非自反耶嘗宴北宮獨令河間王勿入左右

問其故太子曰世宗遇賊處河間王復何宜在此

孝昭帝自居臺留心政術閑明簿領吏所不逮及正

位宸居彌所勉勵輕徭薄賦勤恤人隱內無私寵外

冊封元龜 閏位部 卷之二百九十九 八

收人物雖后父位尊亦待遇無別日曷臨朝務知人之善惡

聰察

夫表微之監禮經實著於嘉猷辨惑之辭先聖嘗形於善答苟甄明之或爽將邪正以罔分是以南面之君嚮明而治必資睿哲以懋丕圖曆數或屯餘閏斯作逃觀敏識咸契言機知臣者有則哲之明擿伏者無非辜之舉雖謳謠獄訟顧寶命之未融而博達聰明諒簡書而可挹

蜀先主定益州以李恢為功曹書佐主簿後為亡虜所誣引恢謀反有司執送先主明其不然更遷恢為別駕從事

吳大帝年少時兄策使呂範典主財計帝時私從有求範必關白不敢專許當時以此見望大帝守陽羨長有所私用策或料覆功曹周谷輒為傳著簿書使無譴問大帝臨時悅之及後統事以範忠誠厚見信任以谷能欺更簿書不用也後範為揚州牧性好威儀時人有白範與賀齊奢麗夸綺服飾僭擬王者大帝曰昔管仲踰禮桓公優而容之無損於霸今子衡公苗子衡呂範字公苗賀齊字身無夷吾之失但其器械精好舟

車巖整耳此適足作軍容何損於治哉告者乃不敢復言

廢帝出西苑方食生梅使黃門至中藏取蜜漬梅蜜中有鼠矢召問藏吏藏吏叩頭帝問吏曰黃門從汝求蜜邪吏曰向求實不敢與黃門不服侍中刁玄張邠啓黃門藏吏辭語不同請付獄推盡帝曰此易知耳令破鼠矢矢裏燥帝大笑謂玄邠曰若矢先在蜜中中外當俱濕今外濕裏燥必是黃門所爲黃門首服左右莫不驚悚一云廢帝使黃門以銀椀并蓋就中藏吏取交州所獻甘蔗錫黃門先恨藏吏以鼠矢投錫中啓言藏吏不謹帝呼吏持錫器入問曰此器既蓋之且有掩覆無緣有此黃門

將有恨於汝邪吏叩頭曰嘗從某求宮中莞席官蒲有數不敢與亮曰必是此也復問黃門具首伏卽於目前加禿鞭斥付外署

宋文帝時孟顓爲會稽太守謝靈運以侍中退居郡中頗輕顓所爲遂構讐隙顓因靈運橫恣百姓驚擾乃表其異志發兵自防靈板上言靈運馳至京都詣闕上表帝知其見誣不罪也不欲使東歸以爲臨川內史加秩中二千石

孝武帝時王玄謨爲雍州刺史民間訛言玄謨欲反時柳元景當權元帝弟僧景爲新城太守以元景之勢制令南陽順陽上庸新城諸郡並發兵討玄謨玄

謨令內外晏然以解衆惑馳啓帝具陳本末帝知其
虛馳遣主書吳喜公撫慰之

南齊太祖初爲齊公時四貴輔政員外郎卞彬謂太
祖曰外間有童謠云可憐可念尸著服孝子不在日
代哭列管慙鳴死滅族尸著服褚字邊衣也孝除子
以日代者謂褚淵也列管簫也彬退太祖笑曰彬自
作此

武帝永明元年謝超宗旣賜死明年超宗門生王永
先又告超宗子才卿死罪二十餘條世祖疑其虛妄
以才卿付廷尉辨之不實見原永先於獄盡之

梁高祖時劉之亨爲湘東王行臺丞嘗督衆大致克
復軍士有功皆錄唯之亨爲蘭欽所訟執政因而陷
之故封賞不行但復本位而已久之帝讀陳湯傳恨
其立功絕域而爲文吏所抵宦者強僧喬曰外聞論
者竊謂劉之亨似之帝感悟乃封爲臨江子固辭不
拜

北齊神武爲東魏大將軍時李密爲襄州刺史侯景
外叛誘密執之授以官爵景敗歸朝帝以密從景非
元心不之罪也

文襄帝爲東魏大將軍時宋遊道爲高隆之等所誣

是時朝士皆忿謂游道不濟而帝聞其與隆之相抗之言謂楊遵彥曰此真是鯁直大剛惡人遵彥曰譬之畜狗本取其吠今以數吠殺之恐將來無復吠狗詔付廷尉遊道坐除名帝使元景康謂曰卿蚤逐我向并州不爾他經畧殺卿遊道從至晉陽以爲大行臺吏部

梁太祖開平中晉州汾西縣百姓蔡奉言論本州游奕將李建不法一十二事帝覽奏曰李建職司防察事極重難若狗愛憎便罹刑網則何以委用邊吏因命奉言移貫內地

器度

夫所享厚者其量必大所圖廣者其志必遠况據偏方而鼎峙承間邑而瓜分建元改號開國承家故有英異之姿發於經綸之際宏遠之度存於聽斷之間不爲疑駭而變聳不爲喜怒而改色使仇敵不能以計撓臣下不得以智闕厭服賢豪容畜民衆所以能成其基業者其繇是矣

蜀先主微時舍籬上有桑樹生高五丈餘遙望兒童重如小車蓋先主與宗中諸小兒於樹下戲言吾必當乘此羽葆蓋車先主不甚樂讀書喜狗馬音樂喜

怒不形於色好交結豪俠年少爭附之既爲益州牧時馬超來降先主待之厚超嘗呼先主字關羽怒請殺之先主曰人窮來歸我卿等怒以呼我字故而殺之何以示於天下也張飛曰如是當示之以禮明日大會請超入羽飛並杖刀立超顧坐席不見羽飛見其立也乃大驚遂止不復呼字明日歎曰我今乃知其所以敗爲呼人主字幾爲關羽張飛所殺自後乃尊事先主

吳大帝性度弘朗仁而多斷好俠養士始有知名侔於父兄矣

南齊太祖少沉深有大量寬嚴清儉喜怒無色從諫

察謀以威嚴得重

一云少有大量喜怒不形於色深沉静默嘗有四海之心

梁簡文帝器宇寬弘未嘗見喜愠色

陳高祖少倣儻有大志不治生產既長讀書多武藝明達果斷爲當時所推服

宣帝少器度弘厚有人君之量

北齊神武深沉有大度輕財重士爲豪俠所宗

文宣帝不好戲弄深沉有大度神武嘗試觀諸子意識各使治亂絲帝獨抽刀斬之曰亂者須斬神武是之又各配兵四出而使甲妓僞攻之文襄等怖撓帝

乃勒衆與彭樂敵樂免胄言情猶擒之以獻幼時師
事范陽盧景裕默識過人景裕不能測也神武爲東
魏相國既薨猶秘凶事衆情疑駭帝雖內嬰巨痛外
若平嘗人情頗安及文襄遇害事出倉卒內外震駭
帝神色不變指麾部分自若嚮斬群賊而漆其頭徐
宣言曰奴反大將軍被傷無大苦也當時內外莫不
驚異焉乃赴晉陽親摠庶政務從寬厚有不便者咸
蠲省焉

梁太祖多大畧恢弘遠度合於霸王之道

才藝

夫以宣尼將聖之資不忘於鄙事姬旦事神之旨自
謂於多才挹遺籍之芳風亦先民之懿範矧或彌綸
百揆摠制萬機而能濬發清衷旁精曲藝雖人君之
度豈獨在茲然天縱之能蓋其餘力傳諸汗簡有助
徽音

宋高祖初不能書劉穆之謂曰但縱筆爲大字一字
徑尺無嫌大既足有所包且其名亦美高祖從之所
書一紙不過六七字

文帝善隸書

孝武帝雄決愛武長於騎射

後廢帝凡諸鄙事過目卽能鍛金銀裁衣作帽莫不精絕未嘗吹箎執管便韻

南齊太祖工草隸書奕棊第二品

鬱林王好隸書武帝特所鍾愛勅皇孫手書不得妄出以貴之

梁高祖有文武才幹六藝備閑棊登逸品陰陽緯候卜筮占決並悉稱善又撰金策三十卷草隸尺牘騎射弓馬莫不奇妙

元帝於岐術無所不該嘗不得南信筮之遇剝之艮

曰南信已至今當遣左右李心往看果如所說賓客咸驚其妙凡所占決皆然

後梁後主善弓馬遣人伏地著帖琮馳馬射之十發十中持帖者亦不懼

陳高祖涉獵史籍好讀兵書明緯候孤虛遁甲之術多武藝明達果斷爲當時所推服

宣帝有勇力善騎射

東魏孝靜帝力能挾石獅子以踰墻射無不中

冊府元龜